


Sorunu Kaläg na Ikä
Caning



Caning Bible Translation

Sorunu Kaläg na Ikä Caning Caning Bible Translation

copyright © 2018 Pioneer Bible Translators

Language: Shatt

Contributor: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source files dated 29 Jan 2022

2b40784a-4366-56e0-9a60-47746d31e227

Contents

Luka	1
----------------	---

Inyil Luka

Täländiccä Legeygi tä Kaxsä Sorunongang

Sorunu Luka näka Luka me dāx biskonu me kälägä Poläs garekärejeyang. Luka garekärejey sorunong ta apangza ngondey säbangäs Tiyafilus. Luka paye Tiyafilus bale legednicc tä ngakä Yasuwa appoyo.

Ma Luka mändey mäpaye kän tä ota kä'day ndey bale zānggä nga tä legednicc ka xānang nās Yasuwa Almasiyang. Luka lapedāng ka yaxsäwecca apo tä ngakä Yasuwa näkä kän kä'dayang dacadas Yaxudiny na känggi nās Yaxudiny songang, kängga sogo ngaka tasiny na känggi apoccong, menggä wiy na känggi wegka tängang.

Sorunu Luka läpedāng ngaki Yasuwa kangad na kasogkang ndey sog kän bale akāsogi Kaläg xonyo kän täng tä ngaka tasiny. Sorunong lege ngakä aygä Yasuwa cawu xongondi musku siyāma tängang basa xongondi mägāmel tiyating.

Luka togodāng bandagä nga tä ngakä yānakä Yoxana me Pac na yānakä Yasuwa. Bandagä ngak-enegi läpedāng ka Yasuwang nās me yaxsäwecci Kaläg kadästākog ka yaxsedāngang. Sorunong koyo yaxsäwecca ngake tādāxiny tä ngakä Yasuwa,

packāma na 'dongädāma na zägädāniccāma, Yasuwa na menggä rābke, wexekä Yasuwa, bäldeygä Yasuwa tä kän, menekāma, gadeygāma tä kalic, xäskāma na ngäsakāma tä xäs.

Läpidānic

¹ Kän mange käsäkädä dackä ngakä wexeki kasogāning na kä'desesāning tä warogkang tä rābāne kä'day, ² winy ka'das luguki känggi wexe ngakä Kaläg na koxtu nga na aga ndä lugung tä kogkang. ³ Nenyang agānang na ngasang karābtä ngakä wegkä'day appoyo tä debic ndä oxowa apo ka agä mändey anggärekejey bandagä rābāne tägi kaxa ngondey Tiyafilus, ⁴ ndey ka gi bale zānggä ngakä wegki kalāpesāning tä giningang.

Duwalegä Iyānakä Yoxana

⁵ Tä butugku Xirudus buguningzä Yaxudiya, me tämed tä Kaläggandāng age ka Zakariya nās wayagkä menggä tämed tä Kaläg tä udsa säbangäs Abija. Ndä uxumandāng age ka Alizapad nās caxsä Xarunag. ⁶ Pädaxkäsa sälelexiny tagä Kaläg ndä sāmene ngakä täsediccä Kaläg kä'day na akāsogi Kaläg payis kānang appoyo. ⁷ Ndä pipindāng täsa säxong xa uxuma Alizapad pixing, ndä sa pädaxkäsa saboxso.

⁸ Xongonendäng Zakariya na udsä menggä wexeki kamen wexetang, kamen wexekä tämed tä Kaläg.

⁹ Na 'dodony* kadel täma täbangä tanyaranä menggä tämed tä Kaläg ka mä'doc taxä tämekä tedeldäkä Kaläg tä lägoygä mäsäs.

¹⁰ Ani mägä'doccus tä lägoygä mäsäsang, kulung kanggi tängang kapasäning tunyu palacca.

¹¹ Na kala malayikanä Kaläggkandäng kawayasa täma dokolo tandä abanic täwang tumunu lägoygä mäsäs. ¹² Na todi Zakariya kox malayika na nyigatäg kamen ma mädätägä.

¹³ Na malayika ngade täma ka, "Zakariya, wanga nyigatäg xa Kaläg kädäng paleygägi. Uxugi Alizapad 'do yedäng päxä apang tägi ndä gi n'doco dogada age ka Yoxana. ¹⁴ Ma mäsogo wanägi laye tidi, ndä kân mange lededäning xa sägäyäng ma, ¹⁵ ndä ma mälayis käxa tädäx na apo tagä Bazuwec. Ndä mäwuxi bux säxong, na mändey wuxiki 'dazic tängang mäwuxi säxong. Ma mälayis käxa päsewa na Ligidä Kaläg cawu cukuma tä bälegkä bosa. ¹⁶ Ma mämelede menggä Israyil mange ta Bazuwec Kaläg. ¹⁷ Ma mälayis käxa päccada tagä Bazuwec na panggu kala panggudugku me logey Iliya ndey mäwex

mäganygä menggäsa ndey laley enggengga, na menggä ko'do mäwexe mäganyga ndey nyangädä lelertäggä däppic ndey mäbolasa kân tä benggä Bazuwec."

¹⁸ Na Zakariya kamänze ka, "Agä asogowa key ndey abäle ka ngakong layecänäs tireneng? Xa agä kaboxsu ndä uxang kaboxsu mändey."

¹⁹ Malayika kabuc ka, "Agänang anäs Jiprayil. Agä awede tä cuku Kaläg ndä Kaläg kayaxsä agä ka agä awung alegeyze tägi agoying yaxsäweccong apong tägi. ²⁰ Ndä gang nyäpäladas gi legecce säxong, basa xongondi ngakong sogoduning tängang, xa gi kämen ngakang säxong, ndä kácag wunosuno layeccänäs tire tä xongondi tängang."

²¹ Ndä kânätäng bene Zakariya tunyu mänedäning ka oxadi siye Zakariya kalaygädä taxä tämeki tedelang mänang. ²² Na kala mawetä tunyu ndä ikäma kaxsäwa mäyex lehey täsa säxong, na todi sabäle ka mägox nimic tä cukuma taxä tedeläccä Kaläg, malewa na läläbey yä mäyex lehey säxong. ²³ Kala wexekäma käpeläning na mägämele tä pa.

²⁴ Na kala todi uxuma Alizapad koxsonga kácätäng asämeny mädag 'da'danyewa. ²⁵ Cängade ka, "Kaläggkang kawex ngakong tagä, tä sänggong

* 1:9 Mändey säbangäs "curungguduni."

nyaläpäng paygänya ndä nyägäcay zänggä motakang tä warä kän.”

Duwalegä Iyänakä Yasuwa Almasi

²⁶ Tä asämexsi aran layis näkä oxsongdugku Alizapatang, Kaläg kayaxsä malayika Jiprayil tä cabärä Calil tä kaxsä pana säbangäs Nasra, ²⁷ ta kedenweccandäng säbangäs Mariyom sader ta apangandäng säbangäs Yusif tä caxsä Dawud. ²⁸ Na malayika kawung täce, kämodey ce ngade täce ka, “Gingang nuxundugkägi käbaxändey tä känang, Kaläggang nagi!”

²⁹ Na Mariyom käbabangwa tä ngaki malayika kangatang, ndä cägäre bangä modeygi mänangang. ³⁰ Na kala malayika ngade täce ka, “Wanga nyigatäg Mariyom, xa Kaläg kadong baxändäg tägi! ³¹ Dänge! Gining no noxsongada ndä niyedäng päxä apang ndä dogada age ka Yasuwa. ³² Ma mälayis käxa ngake tädäxiny ndä säbangäs ma päxä pe Kalägi tiyating, ndä Bazuwec Kaläg togada butugku wawanäma Dawud täma. ³³ Ma mämene butug tä känggä Yaxup ndä sanydenendäng säxong, ndä butugkuma 'desetäsäno säxong.”

³⁴ Mariyom ngade ta malayika ka, “Ngakong layeccä key, yä taxä nuxu kasäng na apang songang?”

³⁵ Na malayika kämeley ngade ka, “Ligidä Kaläg

cocolacca tägi na pang-gugu Kalägi tiyating wunodung wayedäng tä bälegkägi na asämexsägi lada, nenyang päxä pipini niyedängang näka tedelang, ndä säbangäs ma päxä Kaläg. ³⁶ Ndä za, wayigo Alizapad na boxuske mändey oxsong tä päxä apang yä kän bangäs ce pixi, gang satäng täce asämeny aran! ³⁷ Ndä 'doga bedede tä Kaläggandäng song.”

³⁸ Na Mariyom kagixi ngade ka, “E, bi, anäs me wexiccä Kaläg. Wanga ngaki sogoduning tagäng layis wega tä bangä ngakigigong.” Na malayika kä'doc kawangasa ce.

Mariyom na Alizapad

³⁹ Na tä sänggi Mariyom kangäsa tetex kä'doc tä kaxsä pa tä cabärä Yaxudiya, ⁴⁰ na caläs pang Zakariya na cägämodey Alizapad. ⁴¹ Na Alizapad kädäng modeygä Mariyom, na pipini tä bälegkäce Alizapatang käpärawa, na Ligidä Kaläg kälīgä Alizapad. ⁴² Na Alizapad kasan kädawa ka, “Kaläg kadä wanägi tä warä uxu kä'day na päxägini tä bälegkäging! ⁴³ Agänang anäs xäng kädäppa ka bo Bazuweccang wung copu agäng? ⁴⁴ Ani kädängäs modeygägi na wundan-gang, päxä pipinong tä bälegkangang käpärawa na wadäkä tididäg. ⁴⁵ Gi käbaxändey xa gi kämen

ngaki Kaläg kalegey tägi ka
'desetäsäningang."

*Mildä Mariyom tä Logakä
Kaläg*

46 Na Mariyom ngade ka,
"Mägaxsang dädäxti Kaläg,
47 na ligidang kadeb led tä
Kaläg me nayiccang,
48 xa nyägox cuku molgang,
agä me wexiccänya.

Ndä ganang menggä
zädong, kädäy
bangäs agä käxa
kabaxändey.

49 Xa nyang nyäs Bazuwecca
pädäggang kawex
wexeka ngoniny
tagäng ndä agänya
tedeliny.

50 Tä menggä zong na banga,
agänya watasa tä
känggi nyaye nyang.

51 Nya nyawex wexeki
tädäxinyang na
andänya.

Ndä nyawasa känggi
logoduning na
wexe degejey tä
mäganyganang.

52 Nyägäcoccoley menggä
butug

yä nyägäpoka känggi butug
wundung tängang tiy-
ati,

53 ndä nyägämas menggä
xas na weka apoccu,

yä nyamatä känggi näs
tanganuwang na
asängga päloccu.

54 Nyaxony menggä
wexekänya Israyil
xa nyanimäng
agäwaydakänya,

55 kala täseki nyadästäs
wawanakogki mägaccännyang

na ta Apraxim na
atuge näs ur'dug."

56 Kala Mariyom kuccu na
Alizapad ta asämenyga ko-
dos na cägämel tä panäce.

Iyänakä Yoxana

57 Xongondi Alizapad
kiye tängang, cägiyäng
pähä apang. 58 Na
menggä sogalinygäce na
wayakäsa kädäng ka Kaläg
kädädäxti agäwaydad täce
na sägäledäno nace.

59 Tä sänggi tespedespeng
sawuno tä luwuku pähä pipi,
ndä sägäpay ka sädogas
agäma ka Zakariya täbangä
mesa. 60 Neng bosa kämele
täsa ka, "A'a! Basa sädoga
agäma ka Yoxana."

61 Na sängadeccä täce
ka, "Nuxu kigkandäng tä
caxsägo age mänang song."

62 Na sägertäcce ta mesa
Zakariya ndey ka sä'dox
aga mäpaye mädogas ta
penäma.

63 Na mamän owdu
badaxiccä gärekärejey
na mägärekärejeysa ka,
"Age ka Yoxana." Na

sägädongasa kädäy. 64 Na kaccogos ikä Zakariya
kalengesäwa na nyipäräma
kä'dakasäwa na malegeyze,
malog Kaläg.

65 Na menggä sogalinygäsa
kädäy nyigatäg kamen, na
ngaki kasogänong kalaye
legeydäno tä kaxsä cabärä
Yaxudiya kädäy. 66 Na
känggi kädäy kädäng
ngakiyang kameskädä tä
mäganyganang na ndä ngadeccä

ka, “Päxä pipinong wun-
odung layis wi?” Xa andä
Kaläggkang nang seley.

Logeygä Zakariya

⁶⁷ Na Ligidä Kaläg kälīgä
Zakariya me Yoxananag na
malogeza ka,

⁶⁸ “Andädäxti Bazuwec
Kalägä Israyil,

xa nyawung tä posakä kän
na 'dakakä kän.

⁶⁹ Ndä nyägängusey yax-
ticcä xonyad tä kog
tä känggä me wexi-
ccänya Dawud,

⁷⁰ ka'das ani nyalegeyzenäs
na ikänggä menggä
logeygänyagi mägaccäng
tedelinyang,

⁷¹ ndey ka nyäxony kog tä
menggä kurog,
na mändey ta asänggä
känggi kä'day saxe
kogkang.

⁷² Nyasog ngakong ndey
nyälapa agäwaydad
ta wawanagkog,

na ndey nyäniming
axäskänyagi tedelinyang,

⁷³ na täsedicci nyägäloguwa
nang ta wawanog
Apraximang.

Täsedicci lapedäng ka

⁷⁴ kogki nyaxony kog ta
asänggä menggä
kurogkang

ndakä wexedig nya na nyi-
gatäg song,

⁷⁵ tä tedeldäg na lelextäg
tagänya tä loydugkä
aygog.

⁷⁶ Ndä gi päxä penangong
säbandäs gi me lo-
geygä Kalägi tiyating,

xa gi piccadas tagä Bazuwec
ndey bolasa sota
tänya,

⁷⁷ ndey dogä ligiccä xonyad
tä känggä Kaläg na
wangakä ngaka tasiny
tä känggänya.

⁷⁸ Xa agäwaydakä Kaläggog
wunodung xonyo kog
paratasawa ka'das
keyzic

⁷⁹ ndey bowdic wung tä
känggi käcasäng tä
lätäng na tä ligidä
xäsang,

ndey meskede exenggog ta
akäsogä modey.”

⁸⁰ Ndä päxä pipi wed-
ede na kiniy tä wane na
yexkä nga. Ndä mäguccu
tä pumpung basa xongondi
mawesawa na wexed tä Is-
rayil tängang.

2

Iyinakä Yasuwa Almasi

¹ Tä enggä sänggi Axustus
Kaysar kabokung asiriye
tunyu ka kän kä'day

'docco garekärejeysa aga
tä cabär kä'day tä wexekä
tuluba. ² Ndä garekärejeysa
täzäläggkang, tä cuku Ku-
runiyos tä butug tä Suriya.

³ Kän kä'day kä'docco tä
cabärtaga ndey garekärejeysa
aga täng.

⁴ Na kala Yusif kawetä
mändey tä cabärä Nasra
tä Calil kä'doc tiyati tä
Petlaxam cabärä Dawud, tä
Yaxudiya, xa ma mäś me
cabäri ndä mäś wayäwan tä
caxsä Dawudag. ⁵ Mägä'doc
ndey sägärekarjeysa

agäsa na Mariyomzi sader tämang ndä cägä'dosuwa.

⁶ Na tä cuku sa todi, pipi kagasäng ce. ⁷ Na cägiyäng päxäcenä zäläg näs päxä apang na camulungi na tandä ndä cüzänggasa tä kuburicci säziye male tängang, xa axa säzänggasa täng undung.

Copkä Menggä Megäs

⁸ Ndä tänya owdi menggä megäsätäng cuccu käsac tä korongo meske sagunuga ongud. ⁹ Na malayikanä Kaläg kaweyesawa täsa na tädäxticcä Kaläg kábanyeza tä waräsa na nyigatäg kadele sa nano.

¹⁰ Na malayika kangada täsa ka, “Wanga nyigatäg! Ndänge ngakong, agä anduwale yaxsäwecca apo tanggo aki kodung wadäkä tididäg tä kän kä'dayang. ¹¹ Xongondong sägiyäng me nayic tanggo tä cabärä Dawud. Mang mäs Almasiyang ani näs Bazuweccang. ¹² Ndä bol-iccongang lapedäng tanggo ka, anggo 'doxadang päxä pipi kamulungiwa na tandä ndä sängo tä kuburicci säziye male tängang.”

¹³ Na kälilic malayikadagi tiyating kaweyesäno mange na malayikani dädäxti Kaläg ngadeccä ka,

¹⁴ “Dädäxtic tä Kaläg tiyati, na modey täzäg tä känggi nyäpayeng!”

¹⁵ Na kala malayikada kawangasa sa kä'docco tiyati, na menggä megäs

ngadeccä tä ngastängga ka, “Nycugo tä Petlaxam ndey laleyig ngaki kasogäno todiyang, aki Kaläg kaläpäng takogkang.”

¹⁶ Na sägä'docco tetex sa'doxa Mariyom na Yusuf na pipi sägäsänggasa tä kuburicci säziye male tängang. ¹⁷ Kala sägox pipi, na saser ngaki saläpa täsa tä ngakä piping, ¹⁸ na känggi kä'day kädängang käsaydä aga tä ngaki menggä megäs kalegeyang. ¹⁹ Yä Mariyom kameskäde ngaki kä'day tä mägaxse ndä cägäre tä mägaxsäce ka ngakong key.

²⁰ Na kala menggä megäs kämele, dädäxti Kaläg tä ngaki kä'day sägädäng na sägoxang, xa nga kä'day ka'das ngaki saläpe täsang.

²¹ Tä sänggi tespedespeng, salu ma na sadogas agäma ka Yasuwa, agi malayika kadogas musku cägoxsonga täma songang.

Koyakä Yasuwa Taxä Tämed tä Kaläg

²² Ani Mariyom kä'desenäs sänggä iyekeneng, tä bangä asiriyenä Musa, Yusif na Mariyom kagoying Yasuwa tä Ursalim ndey sädogas ma tä Kaläg ²³ ka'das ngaki gärekärejeyno ta asiriyenä Kaläggang, ka “Pipugi siyedäng tä zäläggang näs enggä apangasang sädoga kä'day tagä Kaläg”, ²⁴ ndey sädämze ka'das legeggi asiriyenä Kaläg kangatang, ka sädoga enggä kurugä pa

pädax na cong näs kurugä
kaxsetang sädoga pädax.

Logeygä Simiyan

²⁵ Ndä gang 'doxtiyandäng
tä Ursalim säbangäs
Simiyan apangza lelexang
ndä kamen ngakä Kaläg
ndä bene käxa xonyo Israyil.
Ligidä Kalägkandäng täma.

²⁶ Ligidä Kaläg kaläpe täma
ka mähse song basa ka
mox Almasini Bazuwec
Kaläg kayaxsängang. ²⁷ Na
Ligidä Kaläg koyo Simiyan
na mawung taxä tämed tä
Kaläg, mändey Yusif na
Mariyom kagoying päxä pipi
Yasuwa ndey ka sämog tan-
yara täng tä bangä asiriye,
²⁸ na Simiyan käpokä ma
tä asängge ndä log Kaläg
ngade ka,

²⁹ “Gang, tä bangä
ngadagkägi gi Kalägi
ngondeyang, mene
andang 'daki me
wexiccägi 'doc na
modey.

³⁰ Xa agang kox me 'dagkicci

³¹ käbolasa tagä kän
kä'dayang.

³² Mangang mäs banyiccang,
ndey gi Kaläg, lapasäwa tä
känggi näs Yaxudiny
songang,

na dädäxtic tä känggägi
menggä Israyil.”

³³ Na toti Yusif na
Mariyom käpegse tä ngaki
kalegeyno ta päxasang.

³⁴ Simiyan kapes sa. Na
ngade ta bosa Mariyom
ka, “Ndelde wunggugo
appoyo! Kaläg kalebäng
päxä pipinong ndä mang

mäsogo telänad na ngäsakä
kän mange tä Israyil na
mälayis bolicci kän saxeng.
³⁵ Ndä nästire, mäganygä
kän mange lapetäsäno tä
bangä wexekäma ndä gining
tä ngasägi, mägaxsägi
'dudowa!”

Ngakä Xana

³⁶ Mändey me lo-
geyandäng näs ux säbangäs
Xana päxä pe Fanawil tä
caxsä wayakä Asir. Ce
caboxsä na'do, sabagäning
na yoxuce sägäcuccu tä
jendäg paxtänding basa
xäskäma. ³⁷ Na cäguccu
tä mandurtug tä jendäg
udiny tesped wang tesped
(84). Ndä casäja axä tämed
tä Kaläg song, cädukuru
na uxkud tä ngasäce ndä
cäpalacca ongud na säxe
kä'day.

³⁸ Na tänya xonggondi,
cawung täsa na cadeb
logakä Kaläg ndä cälege
ngakä pipi tä menggä
Yaxudinygi kä'day bene
tegic tä Ursalimang.

³⁹ Na kala Yusif na
Mariyom kä'dese nga
kä'day tä bangä asiriye nä
Kaläg, na sägämele tä Nasra
tä cabärä Calil. ⁴⁰ Na
päxä pipi ka'donga ndä
kalay pädag, käpäsäwa
na lelertäg ndä payicä
Kalägkang na ma.

*Yasuwandäng Taxä
Tämed tä Kaläg*

⁴¹ Me Yasuwanag na bosa
'docco tä Ursalim jenijeni tä

Pärkid*. ⁴² Ani jendägkâ Yasuwa kâcogäs asiny wang pädaxang, sägä'docco tiyati tä Ursalim na bangä adi. ⁴³ Sägä'docco sägä'dese Pärkid na tä melgäsa tä pa, päxä celic Yasuwa kalay tong tä Ursalim. Ndä mesa na bosa yex song. ⁴⁴ Sa säcuccu ka mandäng na känggi säwedeccä nangang, sägäcogu sängädi nuxungang, na sägä'docco sämänecce sänyame ma tä warä wayakäsa na biskodagäsa. ⁴⁵ Ndä sa'doxas ma song na sägämele tä Ursalim tä nyam.

⁴⁶ Tä sänggi kodos tä bangeneng, sa'doxas ma taxä tämed tä Kaläg, tä kaxsä kal. Mägäcca tä pidänä balduwiny, mädelde wunduma täsa ndä mämäne sa. ⁴⁷ Na känggi kä'day kädäng legeygä Yasuwang, kädongo tä yerändägkâma na bucuku nga ta menggä bäldey. ⁴⁸ Mesa na bosa kox ma na wadäka koyo na bosa ngade täma ka, "Päxang, wi siye gi käsogkuwa täwas mänang? Lala, menggo na agänang wanyamedig owdugi paccey."

⁴⁹ Na mägämele täsa ka, "Wi siye anggo nyamadang owdangang? Anggo 'diyang ka pang Appanang nyaza anycu tängang?"

⁵⁰ Ndä musku kax

menggäsa kabäle ngakäma täsa song. ⁵¹ Na sacoccoleza sägämelese tä Nasra ndä mädede nga täsa. Ndä bosa meskede ngaki kasoguningang kä'day tä mägaxse.

⁵² Ndä Yasuwa 'dongada na lelertägke, ndä Kaläg na kân paye ma.

3

Weyekä Yoxana ta Akäsog

¹ Tä jendägki asiny wang mädagkang tä butugku Tapariyos Kaysar, ndä Pälatis Alpondi buguningzä Yaxudiya. Xirudus bazuweccang tä Calil, na päxä bosa Filipus päxä bazuweccang tä cabärä Itoriya na Taruxontis. Yä Lisaniyus bazuweccang tä Apäliya.

² Legeygä Kaläg kawuno ta Yoxana päxä pe Zakariya tä pumpung ani Xanas na Kiyafa, seley layis ngotorpugu menggä tämed tä Kaläggkang. ³ Na mägä'doc tä Colonggonä Urdun kä'day, mäduwale ngakä xajkä kân tä ngaka tasiny, na pac tä ma. Ndey Kaläg cay ngaka tasinygäsa xa sägäxaje.

⁴ Ka'das ani gärekärejesawa tä sorunu legeygä me logey Isayang,

"Ndänge ngasawan logacca tä pumpung ka,

* **2:41** Karamana Yaxudiny sogong ndey säniming 'dakicci Kaläg kä'dakasanäs tä cuku sa tä cäläxtäg tä Masarang. Yaxudiny bangäs sapärkidki "Lägey" ndey ka malayikanä xäs kawungang keley padäggkäsä lägtä xa sägadas tamiccä päxä dopolog tä akäsogalinygäsa.

'Weye akäsog tä Bazuwec-cog,
ndokala akäsog täma.

⁵ Ko'dota kä'day 'docco päseccä,

cabärta na enggä cobocoboriny mäxotusuno,
na akäsogi kagolopewang dokol,

na sogi ngudungudulang zäräzirigiwa,

⁶ ndey kän kä'day laley xonyakä Kaläg.' "

⁷ Na Yoxana ngade tä xä'däni kawuno tä pac-cang ka, "Ama caxsä enggä tämong! Xänang kädaxä anggo ka mpexkeng zängaygä Kaläg tanggong?"

⁸ Ndä gang läpäning 'dogi lapedäng ka anggo kälaysang kängga kämele tä Kaläggang. Ndakä

layisang kängga bangada Apraxim tä ngastängga ka menanang. Ndakä

ngadang ka, 'Doga siyewa tä kogkandäng song.' Agänang aläpedäng tanggo ka Kaläg nguso nganyugong teyis pipu ta Apraxim! ⁹ Seley ganang kompa kəcicilisuwa tä mäxkä ewe ndä eti iyedäng engge apoccu songang saluwutäsa täzäg ndä sägawa tä mas."

¹⁰ Na xä'dä kamän ma ka, "Neng gang wasogig wi?"

¹¹ Yoxana kabuc täsa ka, "Käxa tandu täng pädaxang larä na käxi ne wundungang ndä käxa siyake tängang sog mänang."

¹² Menggä yawgä tuluba mändey kawuno tä pac tä ma na mäne ma ka,

"Me bälidic, yä wasogig wi?" ¹³ Na maläpe täsa ka, "Ndakä yawadang weg mangeccä tä wegki saläpäng tanggong."

¹⁴ Ndä kulung asägaru mändey kamän ma ka, "Yä was, wasogig wi?" Na maläpe ka, "Ndakä bagkadang weg tä kän na rejic mändey na celdug, gixi maxiye na 'dogi sädogodäng tanggong."

¹⁵ Na todi kän wadäka kalaye tidiny xa satäng bene Almasi, na soxo ka Yoxanang näs Almasi. ¹⁶ Yoxana

kabuc täsa kä'daygäsa ka, "Agä anäs käxa pacce anggo tä ma winy, yä kigkandäng wunodung ndä panggudugke mo'do kanggä. Agänang anäs käxa ulidi kabadage song. Ndä ma mäwunodung mägodung Ligidä Kaläg tanggo na mas. ¹⁷ Ndä adalandäng ta andäma ndey mexenäs nyada täpox yä mädogo kuny tä curunuma, yä nyada mädu nyu na masa paxewa song."

¹⁸ Ndä ta akäsogong na pagad mange, Yoxana kalogey yaxsäwecci apo lege ngakä Kaläggang. ¹⁹ Ndä ani Yoxana kä'dedeyis Xirudus tä ngakä batakä uxä päxä bosani säbangäs Xirudiya na wexeki mändey mawex tasiny kä'day, ²⁰ Xirudus kasog 'doga tas mändey. Madene Yoxana tä ax.

²¹ Kän kä'day käpacäning tä ma, na Yasuwa mändey kawung sägäpaccä. Ani mäpalaccanäsäng tiyati kalengesäwa, ²² na Ligidä Kaläg kacoccoleza täma oxowa ka'das kuruwic na legey käpätäsäng tiyati ngadeccä ka, "Giningang nuxundugkägi näs penanggi ampaye ngakeneng. Xa ngakägi kasog wanang tiding."

Caxsä Wawanagä Yasuwa

²³ Ani Yasuwa kadebäs wexekeneng, satäma jendäg ud wang asiny. Ndä kän oxo ka mä s paxä pe Yusif, paxä pe Xali, ²⁴ paxä pe Matad, paxä pe Lawi, paxä pe Malki, paxä pe Yuna, paxä pe Yusif, ²⁵ paxä pe Matäsaya, paxä pe Amus, paxä pe Naxum, paxä pe Xasäli, paxä pe Nacayi, ²⁶ paxä pe Mas, paxä pe Matäsaya, paxä pe Samayin, paxä pe Yusic, paxä pe Goda, ²⁷ paxä pe Yoxanan, paxä pe Resa, paxä pe Zaräpabil, paxä pe Saltil, paxä pe Niri, ²⁸ paxä pe Malki, paxä pe Adi, paxä pe Gäsım, paxä pe Almadam, paxä pe Ir, ²⁹ paxä pe Gesuwa, paxä pe Aläyasär, paxä pe Yoram, paxä pe Matad, paxä pe Lawi, ³⁰ paxä pe Simiyan,

paxä pe Yaxuza, paxä pe Yusif, paxä pe Gonam, paxä pe Aliyakim, ³¹ paxä pe Maliya, paxä pe Minan, paxä pe Matada, paxä pe Nasan, paxä pe Dawud, ³² paxä pe Yasa, paxä pe Oped, paxä pe Pos, paxä pe Sala, paxä pe Naxsun, ³³ paxä pe Aminadip, paxä pe Adämin, paxä pe Arni, paxä pe Xasrun, paxä pe Faris, paxä pe Yaxuza, ³⁴ paxä pe Yaxup, paxä pe Isxag, paxä pe Apraxim, paxä pe Tarex, paxä pe Naxur, ³⁵ paxä pe Suruc, paxä pe Raw, paxä pe Falic, paxä pe Apir, paxä pe Sela, ³⁶ paxä pe Kayinan, paxä pe Arfagäsad, paxä pe Sam, paxä pe Nox, paxä pe Lamag, ³⁷ paxä pe Mätäsalex, paxä pe Anax, paxä pe Yarad, paxä pe Maxalil, paxä pe Kinan, ³⁸ paxä pe Anos, paxä pe Sed, paxä pe Adam, paxä pe Kaläg.

4

Däniye Käläbä Yasuwa

¹ Ndä nyägäligä Yasuwa na Ligidä Kaläg, mägämel na Colonggonä Urdun, Ligidä Kaläg kagoying ma tä pumpung. ² Däniye

käläbä ma tä sängga udiny pädax. 'Doga masi wundung tä sänggi, ani sänggi kä'desesänonusang ma magä'di na'do. ³ Na Däniye ngade täma ka, "Näs Pächä Kaläg seleyang, lapi tä ngayiccong layis zäx." ⁴ Yasuwa kabuc ka, "Gärekärejesawa tä Sorunu Kaläg ka, 'Siyatag tol naye käxa julang song.'"

⁵ Na Däniye kabag ma tä ke'dengge'demes ndä banye ow na gertä bugundugku walangicä täzäg kä'day täma. ⁶ Na Däniye läpadas ta Yasuwa ka, "Adogodung bugundugkong kä'day tä andägi na tädäxtägki wedetese nangang, xa sadogung panggudug tä andang ndä adogada tä käxi ampayeng. ⁷ Ndä känox kundukurusa käpaley agängang, wekong kä'day känggig." ⁸ Yasuwa kabuc ka, "Gärekärejesawa ka, 'Dukurusa pala Kalägägi na wexe ngake tol.'"

⁹ Däniye kabag Yasuwa tä Ursalim, na kädokalasa ma tiyati täzä ndandangzä axä tämed tä Kaläg, na ngade täma ka, "Känox näs Pächä Kaläg seleyang, xudiwa täzäg todong. ¹⁰ Xa garekärejesawa ka, " 'Kaläg yaxsedäng malayikadage tägi

ndey meskädä gi,'

¹¹ 'muso gi ta asängga wange gi ndey ka 'dingäsa exenägi tä ngayic song.'"

¹² Na Yasuwa kabuc ka, "Sorunu Kaläg ngade

ka, 'Ndakä läbä Bazuwec Kalägägi song.'"¹³ Na todi Däniye kä'dese läbke bägälic, na kala kawangasa ma basa xongoda.

Tebekä Wexekä Yasuwa tä Calil

¹⁴ Yasuwa käligäwa na panggudugku Ligidä Kaläg, na kämel tä Calil, na todi lulungudäma kuduwalewa kä'day tä kaxsä cabär. ¹⁵ Na madeb bäldey tä axinygä palicinygä Yaxudiny na kän kä'day kädädäxti ma.

Pexkekä Yasuwa tä Nasra

¹⁶ Ndä kala gang Yasuwa kawung tä Nasra, tä owdi ma'donga tängang, na mägä'doc maläs axä palicä Yaxudiny tä xongondu Sapid, xa nyang näs tanyara tämang. Mangäsa tiyati tä geney, ¹⁷ na sadogas sorunu me logey Isaya täma. Na malenge soru ma'doxa owdi garekärejesawa ka,

¹⁸ "Ligidä Bazuwec Kalägkandäng na agä,

xa nya nyaseny agä ka agä anduwaley yaxsäweccä nyani apong tä menggä wiy.

Ndä nya nyayaxsä agä ka agä anduwale 'dagkic tä känggi kacikiliningang

na ndey ngojony zayza, na känggi sägäcäläxtiyang sä'daka,

¹⁹ ka agä anduwale jendä agä waydagä Bazuwec tä kän."

²⁰ Na kala mägäräkä Sorunu Kaläg na madoga

tä käxi kamen wexetang na mägäcca. Na Känggi kä'day tä axä paliccä Yaxudinyang kamende aga täma. ²¹ Na Yasuwa kăbäldeyza läpede täsa ka, “Ngakä Kalägong kändängeng genewang, xongondong kalayenäs wega.”

²² Na kala kä'daykäsa salegeyze appoyo tä ngakä Yasuwa, na sa'dämde legeygi tidiny kăptäzäng ikämang. Na sängadeccä ka, “Yä 'doxtong de päxä pe Yusifang?”

²³ Yasuwa ngade täsa ka, “Nästire anggo zeredeng ngakong tagä ka, ‘Wanga tumarajuwic, dăxä ngase!’ na kămpayang tagä ka, ‘Dogi kändängig ka gi käsog tä cabärä Kafärnaxumang, sogä todong tä cabärägi mändey.’”

²⁴ Na mapos legey ka, “Alăpedäng zänggä nga tanggo ka, me logeyandäng sägixidi tä cabäre song. ²⁵ Ndä năs tire alăpedäng ngakong tanggo ka madurinyatäng mange tä cabärä Israyil tä cuku me logey Iliya ani zăkoxa kărıgkăwa tä jendăg kodos na asămeny aranang, xas kawung tä walangic kä'day. ²⁶ Yä Kalăg kayaxsă me logey Iliya ta nuxu accăsa song, basa ta uxi năs mandur năs me pungud tä kaxsă pang Sarfa tä cabärä Sayidunang. ²⁷ Ndä menggä omodatäng mange tä Israyil tä cuku me logey Ilisa, yä nuxu accăsandäng kădăxăwa

song, basa Naman me pungudi kăpătäng Suriya.”

²⁸ Ani săgădăngăs ngakongang, kănggi kä'day tä axä paliccä Yaxudinyang kăsăngasa paccey. ²⁹ Na sangusosuno tiyati, samagăng ma tunyu tä kaxsă pa. Na sagoyas ma tä nyixtă päxă cobocoboric, săpaye săzajas ma tăzăg tä ză cabări kăke'decekang. ³⁰ Neng mawetă tä wară xă'dă na măgă'doc tä akăsogăma watăkăma.

Wexekä Yasuwa tă Kafärnaxum

³¹ Yasuwa kä'doc tăgaxsă Kafärnaxum tă Calil, tă xongondu Sapid, na madeb bäldeygä kăn. ³² Na sa'dämde băldiccăma xa soxo bugundug täng.

³³ Ndă tănya axă paliccä Yaxudinygi apangandäng kăxa tasandäng tä wane, ndă kapere ka, ³⁴ “Wayi! Wanga was watăkăsko, Yasuwa me Nasra! Gining kuwung tä paxagăsko? Ayex gi ka giningang Ndedelang na năs năkă Kalăg.”

³⁵ Na Yasuwa kadux kăxa tasti tä wanămang ka, “Păli! Wete tä wanăma!” Na kala kăxa tas kacodasa ma tăzăg tä pidănăsa na kawetă napăl kawung ma kăppărjig.

³⁶ Kănggi taxă paliccang, kădongasa ndă mănedăning ka, “Oxadi sogowa todong manang? Na butug na panggudug mădaxedäng ligitiga tasiny tunyu na wedeccă!” ³⁷ Na kala lulungudă Yasuwa

kawasasäwa tä cabär
bägälic.

Yasuwa Däxä Kän

³⁸ Ani Yasuwa kawan-
gasanäs axä paliccä
Yaxudinyang, maläs
pang Saman. Na
ma'doxa wawana uxu
bäxadiccandäng paccey, na
sägäpay Yasuwa ka däxä
ce. ³⁹ Na mägädokol todü
zäce na maduxsi ka bäxad-
ic lay wundung täce. Na
käccogös cängäsa tiyati
cawexse täsa.

⁴⁰ Tä 'dängakä xong,
känggi wayaka täxäccä na
täxäka cagäcaguwinyang,
sagoying täma. Na
mägäläbtä sa kä'day na
wadäkäsa kädaxäning.

⁴¹ Kängga tasiny kawetäcco
tunyu mangeccä, na
pered ndä ngadeccä ka,
“Giningang näs päxä
Kaläggkang!” Na madux sa
mäleyis sa legey xa sa säyex
ma ka mäś Almasi.

⁴² Na megetuduyzi
täbängeneng, Yasuwa
kawangasa sa ka'doc tä
owda kaculdoy, yä musku
xä'dä nyame bangäma.
Ani sa'doxus mang, säleyis
ma 'doc wangesänakä
sa. ⁴³ Ndä Yasuwa ngade
täsa ka, “Basa anduwaley
yaxsäwecci apo lege ngakä
bugundugku Kaläggkang tä
kulung cabärtagi tängang
mändey, xa ngakongag
Kaläg kayaxsä agä ka
awung awexang.” ⁴⁴ Na todi
mäwedede mabäldecce
tä axinygä paläccinygä
Yaxudiny tä Yaxudiya.

5

Bangänakä Menggä Räb

¹ Xongenendäng, Ya-
suwandäng dokolo tä
nyixtä Colonggonä Calil,
ndä xä'dä kagurma paye
däng ngakä Kaläg. ² Na
mägox dämpejiginy pädax
tä nyixtä colonggo yä
letuganagi näs menggä
menekä asang, kawetäcco
tunyu 'daye ka'dadaga.
³ Na Yasuwa kä'doc tä
kaxsä nuxu dämpejigsi
näs näkä Samanang, na
mäläpede ta Saman ka,
“Zexteyi dämpejigsiginong
na pidänä ma.” Ya-
suwa kacca tä nya kaxsä
dämpejigsi ndä bälde xä'dä.

⁴ Yasuwa kä'dese leg-
eyge, na ngade ta Saman
ka, “Nyasi dämpejig tä
maga tä'duginy na nggawi
ka'dadagägo täng ndey
meneng as.” ⁵ Saman kabuc
ka, “Ngotorpo, wakasängig
kädayi tä wexed ndä
kamenig nuxu 'dog song!
Neng tä legeygäigong
angawada ka'dada tä ma.”

⁶ Na sägädäng ngakäma
sägawa ka'dadakäsa tä
ma na samen as mange
de ka'dadagäsa kacertäno.

⁷ Na sägädawasa ta
biskodagäsagi tä dämpejigsi
nuxungang ka wuno posa.
Na sawuno sägäpäsä
dämpejiginy pädax na as de
paye muxosuno tä ma.

⁸ Saman Putros kox
mänang, na kudukurusa
tagä Yasuwa ngade ka,
“Bazuwec, wede wangasa
agä, xa anäs käxa sogo

ngaka tasiny!”⁹ Na todi Putros na känggi namang, kädongo tä menekä aski samendä mangeng.¹⁰ Yaxup na Yoxana enggä penggä Zapadi menggä wexed na Saman kädongo mändey. Na Yasuwa ngade ta Saman ka, “Wanga nyigatäg, xa gang na ur'dug gi layis me menekä kän.”¹¹ Na kala sagoyas dämpejiginygäsa tä tungurtic, na sawangasa weg bägälic na sägäräbkädä Yasuwa.

Däxkä Me Omo

¹² Tä cuku Yasuwa tä nuxu kaxsä pandäng, apangandäng kawung täma wane kä'dod na omo. Mägox Yasuwa na mägunusawa täzäg mäsäy zäg na manyäxay Yasuwa ka, “Bazuwec, kä'dang mpayeng kax kusog wanag kalay apo.”¹³ Na Yasuwa kälanga ande kápärä ma na ngade ka, “Agä ampaye asog gi lay mpo. Omo caya!” Na kaccogos omo kaway tä wanäma.

¹⁴ Na Yasuwa kä'dedey ma ka andakä mäläpe tä nuxu kig song. Na madästä me omo ka, “Wede koyi ngasägi ta me tämed tä Kaläg na koyi 'dogu tämekägi ndey mäduwalasa ka wanägi käläy apo, tä bangä asiriyenä Musa kadästäse nangang, ndey säbäle ka wanägi käläy apo.”¹⁵ Yä wadi lulungudu wexekä Yasuwa kawasasäwa käked na xä'däni kädängang kawuno tä dänggä ngakäma

ndey Yasuwa däxä sa tä täxäkäsa.

¹⁶ Ndä Yasuwa päledeswa tä owda kaculdoy xondax-onda watäke tä paley.

Yasuwa Kadäxä Pudude

¹⁷ Na xongenendäng Yasuwa bäldecce na Farisiny na menggä lelericcä asiriyenä Musa aki kápädäsäno tä Calil na tä Yaxudiya na tä Ursalimang kăcasäng kăsac, ndä pang-gudugku Kaläggkang kasog Yasuwa däxä kănang.

¹⁸ Kulung apangas kawuno poko pudude tä salany. Säpaye ka sägoxas ma tax tagä Yasuwa.¹⁹ Neng sa'doxa ow kapäs, ndä owda sälangeyis ma undung na sa'dese tazä ax sawe ax ndä sälolas ma nang tax na salany tagä Yasuwa.²⁰ Yasuwa kox menekä ngakäsa täma, na ngade ta pudude ka, “Bisko, ngaka tasinygägi kăcayino.”

²¹ Na menggä lelericcä asiriyenä Musa na Farisiny käre tä ngastängga ka, “Apangza tiyanang degeje Kaläggkang? Xänang caye ngaka tasiny tä kän basa Kaläggkang?”

²² Ani Yasuwa kabälenäs ngakäsagiyang, mäne sa ka, “Wi siye anggo makadang ngakong tä mäganngäggong?”²³ Ngakatiyag kädäppa ka xäxäminy ngadäningang, ‘Ani ka ngaka tasinygägi kăcayining,’ wala ka, ‘Ngäsa tiyati wetäde?’²⁴ Asogo ngakong ndey bäleng ka

agä, Päxä Käxa Jul pang-gudugkatäng tä andang täzäg layis näka anycayis ngaka tasiny.” Na Yasuwa ngade ta pudude ka, “Ngäsa tiyati poka salanygägi wede tä pa.”

²⁵ Na tetex mangäsa tagäsa tiyati na madeccäng salanygäma mägä'doc tä pa, mädädäxti Kaläg. ²⁶ Na mäganygäsa kabalza na sägädongo, na sägädädäxti Kaläg tä ngaki kasogunong. Na kala sanyigata Kaläg, sängadeccä ka, “Was kanoxig ngaka tädäxiny xongondong.”

Yasuwa Kabandä Lawi

²⁷ Tä bangä ngakong Yasuwa kawetä tunyu na kox käxa age ka Lawi, säbängäs ma mändeng Mata, näs me yawgä tuluba kacca gix-inicci taxä burkune. Na Yasuwa ngade täma ka, “Räbta agä.” ²⁸ Na mangäsa tiyati mawangasa weg kä'day mägä'doc tä bangä Yasuwa.

²⁹ Na Lawi kasog led tä pane ta Yasuwa, na kala xä'dä na menggä yawgä tulubada na kulung palangaski tängang, kacasäng sagur siyad nasa. ³⁰ Na Farisiny na menggä lelericä asiriyenä Musa daweccä ta menggä räbkä Yasuwa ka, “Wi siye anggo darjangedänang na ziyaccang na wuxiccing na menggä yawgä tuluba na kängga sogo ngaka tasinyang?”

³¹ Na Yasuwa kabuc ta Farisiny ka, “Känggi täxäccä songang paye me nayic song,

basa känggi täxäccäng kəcag paye me nayiccang. ³² Agä kawung tä bangakä känggi apoccong song, wadi kawung tä känggi sogo ngaka tasinyang ndey meley mäganyga.”

Yasuwa Legey Ngagä Akäsoga Warändi

³³ Sängadeccä ta Yasuwa ka, “Menggä räbkä Yoxana mene uxkud todotol na palacca tä Kaläg, na mändey menggä räbkä Farisiny sogo mänang, yä menggä räbkägi kädil siyad na wuxid tol.”

³⁴ Na kala Yasuwa ngade täsa ka, “Kädäppa ka dogang palangaska kawuno tä batad ka men uxkud yä me batatandäng nang? ³⁵ Musku xa ow wunodung säbate me batad täsa, ndä kala sälayenäs kängga mene uxkud.”

³⁶ Na sax mändey maser nga täsa ka, “Kigkandäng cerede nyonggo tä tandäna warändi ndä debede tä näka kaboxsu song. Käxa kasog mänangang kacere tandäni waränding, ndä nyonggoni waränding 'dasedäning na boxe song. ³⁷ Kigkandäng colada bux tä meldäna näs boxenendäng song. Käxa kacolas buxka warändi tä meldäna näs boxeneng, zage meldä na wanyisäwa. ³⁸ Wadi kädäppa ka buxka warändi säcolas tä kaxsä meldäna warändi. ³⁹ Ndä käxa kawux buxku boxinyganang paye buxka warändi song. 'Do ngade ka, 'Buxku

boxinyga apoccu na wiz-icci.’”

6

Bazuweccä Xongondu Sapid

¹ Xongenendäng Yasuwa kadus kaxsänggä pelow tä xongondu Sapid. Na menggä räbkä ma kabag zänggä kuny kapujuguy kasi. ² Na kulung Farisiny ngadeccä ka, “Wi siye anggo nyca'dadang asiriyenä Musa tä xongondu Sapitang?” *

³ Yasuwa kabuc täsa ka, “Anggo känggeneng ngaki Sorunu Kaläg lege tä ngakä Dawud na biskodage kasog tä xondi xas kapaxäsang song? ⁴ Masogkuwa key maläs axä burkunu tämed tä Kaläg de mägä'doc masi siyaki tedelinyang, yä asiriye ngade ka säsi säxong bal me tämed tä Kaläg watäkeneng, ndä madoga kulung tä enggä biskodagamang?” ⁵ Na mängade täsa ka, “Agä Pächä Käxa Jul anäs bazuwec tä xongondu Sapid.”

Däx tä Xongondu Sapid

⁶ Yasuwa käläs axä paliccä Yaxudiny bäldecce tä nuxu xongondu Sapitandäng. Ndä apangandäng tänya axä owdi andä abanicce käxsä. ⁷ Menggä lelericcä asiriyenä Musa, na Farisiny jenggere Yasuwa käsac. Paye bäle ka cong Yasuwa däxäccä tä

xongondu Sapitang, ndey ka sä'dox rakawza säglinäs nga täma. ⁸ Ndä Yasuwa yex ngakäsagi sabokasa tä zänggäsang, na mängade tä 'doxti ande käxsängang ka, “Ngäsa tiyati dokala tä pidi todong.” Na todi mangäsa magädokol tänya owdi.

⁹ Na Yasuwa ngade täsa ka, “Ampaye amän anggo ka, apo ta asiriye ka wex ngaka apoccu wala ka wex ngaka tasiny tä xongondu Sapid, ka xony rongic wala ka wanydäs?”

¹⁰ Na Yasuwa gaw ze käsaya sa na'anggäsa na ngade ta apangzi ande käxsäng ka, “Langi andägi.” Na apang kälanga ande na ande kaliy apo. ¹¹ Na ngaki mänangang kawaley mäganygäsa na sälegecce säbodo 'doga säsog ta Yasuwa.

Tecekä Yasuwa tä Känggi Sägalägä Asiny wang Pädaxang

¹² Xongondi Yasuwa ka'deg cabär tä paley tängang, masäng kädayi tä paley tä Kaläg. ¹³ Ow kagezä na mabandä menggä räbkäma madec kulung tä wara asiny wang pädax ndey mäligä. ¹⁴ Madeccäng känggong, Saman, ani sabangäs Putrosang, na pächä bona Andrawus, Yaxup, Yoxana, Filipus, na Partalmawus, ¹⁵ Mata, Toma, Yaxup

* **6:2** Farisiny bangäs pujukuygä zänggä kunygi menggä räbkä Yasuwa kapujukuyang, wexed xa asiriye ngade ka kän wang wexed tä xongondu Sapid xa xongondu nunguccä Yaxudinyang.

päxä pe Xalafi, Saman ani sabangäs me mäganygä pädätäggang, ¹⁶ Yaxuza päxä pe Yaxup, na Yaxuza Askariyuti ani kamenes Yasuwang.

Yasuwa Bäldecce na Naye Kän

¹⁷ Yasuwa kawung täzäg na känggenegi kälägäng na mägädokol tä owda kädäpä. Na menggä räbkäma käyawesäno mänge na kän bägälic kädurisäno kätätäsäno tä cabärä Yaxudiya na Ursalim na tä nyäxtä ndandanzä colonggonu Taya na Sayidun. Sawuno tä dänggä bäldecäma Yasuwa na ndey ka mädäxäsa tä täxäkäsa. ¹⁸ Na känggi lititiga tasiny käco'deyang, kalaye käccag. ¹⁹ Xä'dä paye zegeleyi ma, xa pang-gudug päkätäsäng wanäma ndä mädäxä sa na'anggäsa.

²⁰ Na mägäza menggä räbkäma na mängade täsa ka,

“Baxändäg ta anggogong widänangang, xa bugundugku Kaläg kung-gog.

²¹ “Baxändäg ta anggogong xas tanggo gangang, xa edekeny matasang.

“Baxändäg ta anggogong ngecceng gangang, xa edekeny guguccing.

²² “Baxändäg ta anggogong säxaxenggong, na sa'däda tunyang, na sälangeng, na säpexke kala kängga tasiny xa kämeneng

ngakang, agä Päxä Käxa Julang!

²³ “Ledining na zanedicci tä xongondi ngakong kasoguning tang-gong, xa dericcägo ngondey tä pang Kaläg tiyati. Xa wawanakäsagi kä'doccong kasog mänang tä menggä logey.

²⁴ “Woyoy ta anggogong male tanggong, xa anggo ka'doxang buduldugkugo na kä'deseng kala.

²⁵ “Woyoy ta anggogong kämasang gangang, xa edekeny xas lukudi paxe anggo.

“Woyoy ta anggogong guguc-cing gangang, xa edekeny guniccing na ngecceng.

²⁶ “Woyoy ta anggogong kän kä'day lege ngaka apoccu tä ngakägong, xa wawanakäsagi kä'doccong mändey kasog mänang ta menggä logeygi celuwinyang.”

Mpayä Menggä Kurugo

²⁷ Na Yasuwa kapos legey ngade ka, “Ndä agä alegecce tanggogong, ndeldedeng wunggugong. Mpayä menggä kurugo, zoga ngaka apoccu tä känggi saxenggong. ²⁸ Pese känggi cage anggong, na palezi tä känggi cälixtinggong. ²⁹ Tä käxi 'dade abogiccäging, wexi cengicci kalayang täng 'dadä, na käxa bate tandänäging, togi nuxu ani biyeyang täng mändey.

³⁰ Kig kanyäxayging togi 'dogi payeng, ndä kig kabag 'dog täging, adakä naläng täng tunyu. ³¹ Koyada kän kala koyaki mpaye sägoydäs ging.

³² “Gang mpayadang känggi paye anggong, oxadi 'doxadang tä bangeneng? Mändey känggi sogo ngaka tasinyang paye känggi payeng. ³³ Gang zogadang ngaka apoccu tä känggi sogo ngaka apoccu tanggong, oxadiyang 'doxadang tä bangeneng? Mändey känggi sogo ngaka tasinyang sogo mänang. ³⁴ Ndä gang kämeneng amusu tä känggi yexeng ka meledäng tanggong, oxadiyang 'doxadang tä bangeneng? Mändey kängga sogo ngaka tasiny menede amusu tä kängga tasiny ndey mele täng kä'day. ³⁵ Wadi kädäppa ka mpayang menggä kurugo, na zogang ngaka apoccu täng, na meneng 'dog ndä bokosänang ka sämeleyäng tanggo song. Ndey dericcugo lay tädäx, na layisang enggä penggä Kalägi Tädäxang, xa mägaxsänya bow tä kängga mäganya juliny na tä kängga logacca song. ³⁶ Layesi kängga aga watäsa tä kän xa Menggoni Tiyating age watäsa tä kän.”

Wanga Kälignä Nga tä Kän

³⁷ Yasuwa ngade ka, “Wanga kälignä nga tä kän, andakä sägäling tanggo. Wanga zäpkoygä kän, ndey

säwang zäpkoygä ko. Zaxi nga tä kän ndey säsxäng nga tanggo. ³⁸ Begsi ndey säbeg anggo. Kili 'dog appoyo, 'dixisa täzäg ndä ngädengädäsa, ndä didili, ndey säduki tä satä ngorezägi. Tä kiligi gi gilingang sägilidäng tägi.”

³⁹ Na mändey maser nga täsa ka, “Käxa layis ngojox 'dosto ngojox song, kädäppa mänang? Pädaxkäsa sädelgetese taxä 'dog, säxong? ⁴⁰ Me räb ngondey ta me bälidice song, basa käxi sägäbäldey appoyong nyang laye kala me bälidiceneng.

⁴¹ “Wi siye gi zaye nyaxic ta awunu päxä bonggo yä kä'diya sarakaduwecci ta awunuging? ⁴² Käsogkuwa key läpede tä päxä bonggo ka, 'Päxä bisko, wanga agä anycay nyaxic ta awunugi' yä kä'diya bo sarakaduwecci ta awunuging? Ama me fonofoney! Caya bo sarakaduwecci ta awunuging täzäläg ndey zayza käley ndä kala bokung nyaxicci ta awunu päxä bonggong tunyu.”

Ed Bäledeswa na Enggenegi Iyedängang

⁴³ “Eta apo iyedäng päxenena tas song, ndä mändey eta tas iyedäng päxenena apo song. ⁴⁴ Ewe kä'day bälätäsänig na enggengganagi iyedängang. Ewegä kunyu iyedäng enggä 'dami song, na adilu sete tä kenyege song.

45 Käxa apong ngaka apoccu päkätäsäng mägaxse, yä käxa tas ngaka tasiny päkätäsäng mägaxse. Xa 'dogi mälegeng päkädäng mägaxsämani kapäsang."

Padäg Pädax

46 Yasuwa ngade ka, "Wi siye anggo bangadang agä ka, 'Bazuwec, Bazuwec,' ndä wexedeng ngaki aläpedäng tanggo songang?" 47 Käxa kawung tagä ndä delde wunde tä legeygang ndey wexse nangang, agä aläpede täng ka käxeneni ka'das 48 apangza kadony pane kabosasa täzäg loy, ndä repesa kadasu täzä tappa. Faya kawung basa colonggo kämamanya tä pox de käbung pa, ndä kägä'dikiy pa song, xa kärepesawa appoyo. 49 Yä käxa dänge ngakang ndä wexe songang, käxeneni ka'das apangza kadony pane täzäg winy kabosasa kadasu säxong. Ndä colonggo kapäs käsajä pane, na kagurumusawa tetex na kawanydäswe seley!"

7

Nayigä Cäläxsä Ngotorponu Asägaru

1 Ani Yasuwa kä'desenäs bäldeyge kä'day tä känang, maläsa Kafärnaxum. 2 Ndä ngotorponu asägarugu Romanandäng tänya owdi paye cäläxse nano, ndä nya cäläxsämani täxä paccey paye äxsä. 3 Ani ngotorpo kädängäs ka Yasuwa

kawunäsang, mayaxsä ngondowinygä Yaxudiny ta Yasuwa, ka säbandä ma mäwung, ndey mänay cäläxsä ngotorpo.

4 Sawuno ta Yasuwa, na sägä'dedey ma ka, "Wede xonya ngotorpo xa mang mägädäppas xonyatang, 5 xa mäpaye känggä Yaxudiny, na mändey madony axä palic."

6 Na todi Yasuwa kä'doc nasa. Ani sägä'docconäs ngäte tä pang, ngotorpo kayxsa aminuge kaläpe täma ka, "Bazuwec, wanga dereygä ngasägi xa kädäppas ka gi wung tä panang song. 7 Nyang kasog asaxe wunad tägingang. Ndä gang ngadi winy ndey cäläxsang 'dox nayic. 8 Ndä agä mändey anäs käxa panggudug tä ande kamen asägaru, ndä kangada tä nuxu ka, 'Wedeng' na 'docco, na tä nuxung ka, 'Bong' na wunodung, na tä cäläxsang ka, 'Wexe 'dogongang,' na wexe 'dogeneni."

9 Ani Yasuwa kädängäs ngakongang, ma'dämdes ngakäma. Na mawexwa mängade tä xä'däni räbtomang ka, "Aläpedäng tanggo ka tä Israyil bägälic ka'dox käxa kamen ngakang ka'das 'doxtongandäng song!" 10 Na kala känggi sayaxsäng, kämele tä pa ka'doxäng cäläx kalay apo.

Nguseygä Pächä Mandur tä Xäs

11 Kala tetex Yasuwa kä'doc tä kaxsä pana

säbangäs Nayin. Na menggä räbkäma Yasuwa na xä'dä kä'docco nama. ¹² Sawuno saläs kaxsä pa, na sa'doxung apangandäng käxsä kän käpokung tunyu, ndä nyang nuxundugke ta bona ndä cäs mandur, ndä känatäng nace mange.

¹³ Bazuwec kox ce, na agäma kawasa täce na mängade täce ka, “Wanga ngeyig.” ¹⁴ Na mawung mägäläbä salany, na nycogi pokaccangang kädokalasa kisiid. Na mängade ka, “Päxä op, angade tägi ka, ngäsa tiyati!” ¹⁵ Na päxä opi käxsängang kangäsa tiyati na kalegese, na Yasuwa kämeles ma ta bosa.

¹⁶ Na sägädongo kä'daygäsa, na sadelese tä däädäxtigä Kaläg, sängadeccä ka, “Me logeyga tädäxandäng tä warog!” na, “Kaläg kawung tä posakä kängge!” ¹⁷ Na todi lulungudä Yasuwa kawasasäwa tä Yaxudiya na tä cendegä walangic kä'day.

Yasuwa na Yoxana me Pac

¹⁸ Menggä räbkä Yoxana kaläpe ngaki kä'day Yasuwa kasogkang ta Yoxana. Na Yoxana kabandä menggä räbke pädax ¹⁹ na mayaxsa sa ka sägä'docco sāmān Yasuwa ka, “Giningang nās käxi kän beneng*, wala basa abendig käxa caka?”

²⁰ Ani apanginy kawunonäs ta Yasuwang, sängadeccä ka, “Yoxana me pac kayaxsä

was tä gining ka amänzig ka, ‘Giningang nās käxi kän beneng, wala basa abendig käxa caka?’” ²¹ Na tä nya owdi Yasuwa kädäxä kän mange tä däxäka cakucakuny na mägäcay ligitiga tasiny tä wadäkä kän na malende agä ngojony.

²² Na mabuc täsa ka, “Wesi lapi ta Yoxana tä 'dogi känoxangang na kändängengang. Ka

ngojony käsayiza, mexesu kewetädäcco kiccag, na menggä omoda wädägka kalaye apoccu, na bunguny kädängze, na kängga käkse koxsasa, na menggä wiy kädäng duwaleyga warändi.

²³ Baxändäg tä käxi base mägaxse tagä songang.”

²⁴ Ani menggä yaxsäweccä Yoxana kä'docconäsang, Yasuwa kalegese tä ngakä Yoxana tä xä'dä ka, “Oxadi kasog anggo känoccang tä pumpung tä zaygeneng? Päx känoxang mege zäwande nyaxic? A'a! ²⁵ Neng oxadiyang känoc tunyu tä zaygeneng? Apangza kälägäwa na tandäna duladulaje? A'a! Za, känggi lage tanduga duladula-jeccäng, kácag tol cuccu tä owdu buguninginyang!

²⁶ “Oxadiyang känoccang tunyu tä zaygeneng? Me logey? E, neng aläpedäng tanggo ka ma mäs me logeyga tädäx tä menggä logey. ²⁷ Ngakongag gärekärejesäno tāmang,

* 7:19 Menggä Yaxudiny bene Almasini säyaxsedängang.

'Lala, yaxsada me yaxas-awiccang tagägi, ani 'docco weye akäsog ndä kala noccang.'²⁸ Aläpedäng tanggo ka, känggong sägiyängang käxa tädäx kala Yoxanandäng song. yä käxi biyey tä bugundugku Kaläggang tädäx täma."

²⁹ Ani kän kädäy kädängäs ngaki Yasuwa kangatang, na mändey menggä yawgä tulubada, kagixi däppiccä Kaläg, xa Yoxana käpaccä sa.³⁰ Ndä mändey Farisiny na menggä lelericcä asiriyenä Musa käpexkä ngaki Kaläg kabokasa täsang, xa Yoxana käpaccä sa song.

³¹ Yasuwa ngade ka, "Oxadi andäppo na känggä zongang, na sa sa'das wi?"

³² Sa sa'das pipuga kăcasăno ta axă owdu wanyăg ndă bangedăning,

'Was kanusig ndetelegu tanggo ndă anggo kocoxsang song, kangeyig ndă agunicig ndă anggo kăngeydăcceng song.'

³³ "Yoxana me Pac kawung ndă kalăgăji ndă măwuxi bux song. Ndă ngadaccang ka mărămacca!³⁴ Yă agănang Păxă Kăxa Jul kawung asiyacca na awuxicci, ndă anggo ngadaccang ka, 'Za, păxă me kurugurunong na wuxicci de bux paxeng mäs biskonu menggä yawgä tulubada na kăngga tasiny!' ³⁵ Zănggă ngakă lelertăg băledeswa

na cofu'do'dugku logadă menggă răbke."

Wawekä Yasuwa na Mid

³⁶ Nuxu Farisiccandäng säbangäs Saman kabandä Yasuwa ka säsiyza nang tä pane, na mägä'doc tä pang Farisic na sägä'docco sagur siyad. ³⁷ Ndă uxandäng tä nya kaxsă pani, sogo ngaka tasiny, cabăle ka Yasuwandäng tä pang Farisic, na cawung căgo midă măxăs tä belenyza sadotogey săgăluxu tä ngayicca säbangäs alpasta. ³⁸ Na căgă'doc tăwang badadagăma, cănge, ndă cădălbēde uxku agăce tă exenggăma. Ndă căsenye exenggăma na apaxkăce, na mändey căgăbucci exenggăma, ndă cawawe exenggăma na midă măxăs.

³⁹ Farisicci kabandă mang kox ngaki, na ngade tă ngase ka, "Kă'dang apang-zong layis me logey seleyang, kax mabăle ka uxong lăbe mang năka sogo ngaka tasinyang."

⁴⁰ Na Yasuwa kabuc tăma ka, "Saman, ampaye alăpăng nuxu 'dog tăgi." Na mabuc ka, "Lăpăng, me băldic."

⁴¹ Na Yasuwa ngade ka, "Me menekă amusundäng kamene amusudi ta kăn pădax. Nuxu kamen fudada udiny mădăginy mădăg (500), mändey kăxi nuxu-ngang kamen udiny pădax wang asiny (50). ⁴² Ani săgămelenăs wegki samen tăma songang, masaxa

wegki samen tāmang
kā'day. Pādaxkāsa xānang
tāsa kādāppa ka paye ma
mo'do accanang?"

43 Saman kabuc ka,
"Ka'das ka kādāppa ka kaxi
kamen amusu mangeng,
nyaza." Na Yasuwa ngade
tāma ka, "Mānang gi seley
kālegey zānggā nga." 44 Na
mawexwa mägāsāy ce, na
māngade tā Saman ka, "Gin-
ing noxo uxong? Agānang
kālās panāgi. Kudong
magā 'dakā exenggang
song, yā ce ca'day exeng-
gang na uxku agāce ndā
casenydā na apaxkā zāce.

45 Kāmpaxāng agā na modey
na kägappas agā song,
yā ani kalāsās panāging
cāgādokala bucigā exeng-
gang song. 46 Kāwawey zang
na mid song, yā ce cawawey
exenggang na midā māsās.

47 Neng alāpedāng tāgi
ka ngaka tasinyācegi
mangeng kawangesāno
tāce ndā nyang cāpaye
pacceyang. Yā kaxi sasaxa
tāng bālxinyang, paye
bālxiny."

48 Na Yasuwa ngade
tāce ka, "Ngaka tasinyāgi
kācayining tāgi."

49 Ndā palangaski kagur
siyad namang kāre tā
zāngga ka, "Xānanang
kanang māndey caye ngaka
tasinygā tā kānang?"

50 Na Yasuwa ngade tā ux
ka, "Menekā ngakāgi tagā
kaxony gi. Wede na modey."

8

*Wexekā Yasuwa na
Posakā Uxu*

1 Tābangā ngakongang,
Yasuwa kadadara kaxsā pa
na madus enggā cabārta
mābāldecce na mālogo
yaxsāwecca apo tā bugun-
dugku Kalāg. Kānggāmāgi
māgālāgā asiny wang
pādaxang satāng nama,
2 na māndey sag na ku-
lung uxugi māgānāy tā
ligitiga tasinyang na tā
dāxākanang. Mariyomzi
sābangās Macidaliya ani
samagāng kāngga tasiny
paxtānding tunyu tā wane-
neng, 3 Xana uxu Cuza,
ani kamen wexekā pang
buguning Xirudusang, na
Sosana na kulung kān
mange kālarta wegkanagi
layis kākā ngastāngganang
tāsa.

Serekā Ngakā Me Zāb

4 Kān kawuno ta Yasuwa
kāpātāsāno tā kaxsānggā
padāgka cakucakuny
na xā'dā kādurisāwa,
na malegeyze tāsa nās
seredānic.

5 Māngade ka, "Me zāb
kawetā kā'doc tā wasakā
yugke ndā kulung kawosasa
tā kaxsā akāsog na kān
kebtesa, na awiny kaleb ku-
lung. 6 Kulung yug kawosasa
tā cobocoboric, na ani
kalocconāsang kamasasa
xa nyigidiccandāng song.
7 Kulung yug kawosasa tā
warā kunyu na kalocco ap-
poyo ndā kunyu rābta. 8 Na
māndey aki kawosasa tā
zāgka apoccong kalocco na

ka'dongasa appoyo, na kiye kiccag zä kuc nuxung age kasog udiny mädäg (100) taxä mange." Na mängade ka ngakong ngadeccä ka, "Käxa wunde dängecceng, däng ngakong!"

⁹ Na menggä räbkä ma kamän ma ka seredäniccong näkä wiyang. ¹⁰ Na Yasuwa ngade ka, "Anggo nyadogung akäsog tanggo ndey bäleseng bodakä bugundugku Kaläg. Yä tä kulung kän agä alegecce täng na seredänic, ndey kax sälale na oxuswa pele winy, ndä kax sädänge na säbälede 'dogeneni song.

¹¹ "Ndä gang seredäniccong bangeneng ka, yugkag näs ngakä Kaläggang. ¹² Yugki kawoso tä akäsogkang sag näs känggi dänge nga na zeppe tetexang, na Däniye wunodung bate nga tä mäganyga ndey ndakä men ngakä Kaläg ndä 'dox xonyad. ¹³ Yugki kawosasa tä cobocoboriccang sag näs känggi dänge nga na bate na led, ndä mäxkanatäng song. Mene kaccogog, ndä ngaka bedeccä kawunong na zalbangada. ¹⁴ Mändey yugki kawosasa tä warä kunyuwang, sag näs känggi dänge nga ndä kä'docco tunyang 'doxada ngakä kanyakanyanä cabär na ngakä Kalägi samenang 'dongatasa song. ¹⁵ Yä yugki kawosasa tä zäggi apoccu ndä loccong, sag näs känggi dänge nga na mene

pädäte tä mäganyganagi bowinyang na tegetese sogo yugic.

Läpäniccä Banyic

¹⁶ "Kigkandäng banye masäracane ndä xubu song na suxuludi tä boxu salany song. Basa bokasa tä zä tumu ndey känggi luso axang ox owda bow. ¹⁷ 'Dogi kabodwang paredäwa tunyu na 'dogi ka'danywang wedäwa tunyu tä owda bow. ¹⁸ Ndelde wunggugo appoyo. Käxa 'doge tängang säposo täng, ndä käxa oxo ka 'doge täng yä wundungang, säbate täng."

Yasuwa na Menggä Pana

¹⁹ Enggä bonggu Yasuwanag na bosa kawuno täma, ndä kä'docco täma ngäte song xa xä'dä käsekä sa. ²⁰ Na saläpe täma ka, "Enggä bonggugo na bonggo satäng tunyu paye zay gi." ²¹ Na mägämeley täsa ka, "Ngganang na enggä bonggusko sag näs känggi dänge ngakä Kaläg na wexeng."

Dokoleygä Yasuwa tä Megede

²² Xongenendäng Yasuwa kä'doc tä kaxsä dämpejig na menggä räbke na mängade täsa ka, "Nycugo agali andi tagä colonggo." Na sägä'docco tunyu. ²³ Ani säwadaccanäs na dämpejigkang Yasuwa kasändä. Na megede kasagesäng tädäxtiny täsa tä colonggo na dämpejig

soro päsed na ma, ndä paye mäsasa tä ma nasa. ²⁴ Na sägänoxsas ma sängadeccä täma ka, “Bazuwec, bazuwec, kogkatäng täzänggä xäs!” Na mägoxa na madux megede, na dampajeygä ma kädokalasa na kasebesäno.

²⁵ Na mängade täsa ka, “Wi siye anggo mendedeng ngakang songang?” Na nyigadäg kamen sa na sägäsäydä agäsa na samänäno ka, “Xänanang kanang? Rejede megede na ma na dänge ngakeneng!”

Matakä Ligitiga Tasiny

²⁶ Yasuwa na menggä räbke kăca'dä ma na dämpejig kă'docco tä cabärä Gäresa tä xining tagä Calil. ²⁷ Ani Yasuwa kebesanäs exene tä ndandangang, 'doxtiyandäng näs me nya cabäri kăpasa täma kängga tasinyatäng tä wane. Ndä kaleygädä kălagä tandä song ndä uccu tä pa song basa tä warä morota.

²⁸ Na mägox Yasuwa na mapere, madeläng täzäg tagä Yasuwa na mägadawa paccey ka, “Oxadi tagog tä pidi naging Yasuwa, Păxă Kalăgi Tiyyating! Kanyixay gi ka ndakă nycălixti agä!”

²⁹ Mängade tä Yasuwa mänang xa Yasuwa kadux kăxa tasti tä wanämang ka wetä tunyu tä wanăma. Ndä nyacotădasa ma taxă mange, ndă kăn căkili exenggăma na asănggăma na kacăgaliny ndă meske

ma. Neng mă'dexe ndă kăxa tasti tä wanämang koyadas ma tä owda kaculdoy.

³⁰ Yasuwa kamän ma ka, “Săbăngăs gi xăng?” Na mängade ka, “Săbăngăs agă Katiba” xa kăngga tasiny mangeccă tä wanăma. ³¹ Na kăngga tasiny kăpaydă ta Yasuwa ka ndakă yaxsas sa tä owdi săgăpătăsuno tăngang.

³² Ndă buduruginy-atăng mange siyacca tiyati tä păxă cobocoboric na kăngga tasiny kăpay Yasuwa ka mădokas sa tä wadăkă buduruginy ndey ka să'docco nang na măgă'dakas sa tăng. ³³ Na kăngga tasiny kawetăcco tăwang apangzi kă'docco tä buduruginygi mangeng, na kasog buduruginy kawu'daka colonggo kamăxasa tä zăg. ³⁴ Menggă megăskă buduruginy kox 'dogi kasogkuwang na koyo kawasesăning kă'docco kăduwaley tä kaxsă pa na tä enggă cabărta.

³⁵ Na kăn kawetăcco paye zay 'dogi kasogkuwang, na sawuno ta Yasuwa. Sa'doxa nya apangzi kăngga tasiny kawetăcco tä waneneng, ze kalay appoyo, kălagăwa na tandu na kă'doc kăcca tä wară exenggă Yasuwa na kăn kalaye nyăgadiny. ³⁶ Kănggi kox 'dogi kasogkuwang ta apangzi kăngga tasiny kawetăcco tä waneneng, kalăpe tä kănggi kox songang.

³⁷ Na kala menggä Gäresa kă'day na känggi kakukury cabär kă'dayang kăpay Yasuwa ka 'doc wangasa sa xa nyigatäg kadele sa. Na Yasuwa kă'deg dämpejigse ka 'doco, ³⁸ na nya apangzi mägäcay kängga tasiny tängang kăpay ka să'docco nang, neng Yasuwa kayaxsas ma tā pa. ³⁹ Läpede tāma ka, "Mele wede tā panägo na pari ngaki Kaläg kasog täging." Na mägä'doc mägäduwaley tā kaxsä pa tā 'dogi Yasuwa kasog tāmang.

*Yasuwa Däxici na Nay-
acca*

⁴⁰ Yasuwa kămel tā Calil na xă'dă kăpaxas ma xa satäng tā benggä ma. ⁴¹ Ndä apangandäng săbangäs Yayurus năs ngondow kamen axă paliccă Yaxudiny kă'doc kudukurusa tā wară exenggä Yasuwa, kăpay ma ka să'docco nang tā pane, ⁴² xa penāmandäng nuxung layis păxă ux jendägke asiny wang pădax paye äxsă.

Yasuwa kamen akăsog, na xă'dă kagur ma de bungu ma. ⁴³ Ndä uxandäng tā wară xă'dă tamice colowa tā jendägka asiny wang pădax ndă kăxa dăxandäng song. ⁴⁴ Cawung tā ongu Yasuwa ndă căpără munu tandănăma, na tetex waxäd kădokalasa.

⁴⁵ Na Yasuwa kamănze ka, "Xănang kăpără agäng?" Na kăn kă'day kagil, na Putros kabuc ta Yasuwa ka, "Bazuwec, xă'dănong kă'day kagur gi ndă bungu gi!" ⁴⁶ Neng Yasuwa

ngade ka, "Agă kabăle ka kigkandäng kăpără agă xa panggudug kawetăcce tā wanang."

⁴⁷ Na ce uxi cabăle ka că'danyewa song na caparängwa tunyu na cawung cădătăgă cadeläng ta agăma. Na calăpe 'dogi kasog căgăpără Yasuwang na dăxki tetex kasoguno tăceng tagă xă'dăni kă'day. ⁴⁸ Na Yasuwa ngade tăce ka, "Penang, menekă ngakăgi tagă kănay gi. Wede na modey."

⁴⁹ Ani musku mălegeccenăsang nuxu kigkandäng kăpătäng pang Yayurus kawung ngade ta Yayurus ka, "Păxă penăgi kăxsă, wanga dereygă me băldic winy." ⁵⁰ Yasuwa kădäng ngaki na malăpe ta Yayurus ka, "Wanga kărekă nga, yă mene ngakang winy, xa coxsada."

⁵¹ Ani Yasuwa kăcogus pang Yayurusang, mawang kăn kalăs ax nama song basa Putros, Yoxana, Yaxup, Yayurus na uxe.

⁵² Na'anggăsăgi tā pang ngeyigkang săngeccă na săgunuccu tā ngakă ce, neng Yasuwa kawung ngade tăsa ka, "Wanga ngeyig xa căgăxsă song casăndă winy." ⁵³ Na sagug ma, xa săyex beyin ka căgăxsă.

⁵⁴ Na Yasuwa kamen andăce na ngade tăce ka, "Păxă ux, ngăsa tiyati." ⁵⁵ Na ronguccăce kămel, na tetex cangăsa. Na malăpe tăsa ka sădoga nuxu 'dog tăce căsi. ⁵⁶ Menggăsa

kädongo tä ngaki mänang.
Na mägä'dedeyza ka ndakä
säläpe 'dogi kasogkuwang tä
nuxu kig.

9

*Yaxsakä Känggi Ya-
suwa Kälīgä Asiny Wang
Pädaxang*

1 Yasuwa kuduri känggi
mägälīgä asiny wang
pädaxang, na madoga
panggudug täng kä'dayga
na butug ndey layenäs
kängga makadas kängga
tasiny tunyu na däxi kän
2 na mayaxsa sa ndey ka
säduwaley bugundugku
Kaläg na sädäxä känggi
täxäccäng. 3 Mäläpede

täsa ka, "Ndakä seley
bagang nuxu 'dog nanggo
tä wedäg song, kala keced
na 'dogu pokakä tandu,
na siyad na ariyaliny, na
ndakä bagang tandu nanggo.

4 Ndä pani käläsangang,
nycicci täng basa xongondi
wangetäsänang kaxsä pa
tängang. 5 Kaxsä pana

känoccang täng kängge
kabokasa anggo songang,
ndä mpadang wangesänang
kaxsä pang, 'diskisin-
ing käräptänicci ta ex-
enggägong ndey layis ngakä
ngastänggäsa ka känoccang
ndä sagixi yaxsuwiccä Kaläg
song." 6 Na samen sog
sägä'docco sadus kaxsä pa
säduwale yaxsäwecci apo
lege ngakä Kaläggang na
sädäxä kän tä ota bägälic.

*Xirudus Kābabangwa tä
Ngakä Yasuwa*

7 Buguning Xirudus
kädäng ngaki kä'day ka-
sogäningang tä wexekä Ya-
suwang, na zäma kaxsäwa
paccey xa kulung kän
ngadeccä ka kaxong kanang
ndakä layis Yoxana me Pac
kängäsa tä xäs, 8 ndä kulung
kän ngadeccä ka acaka
layis me logey Iliya nyaza
kaparaswa täsa. Ndä musku
kulung kän lege ka mänang
nuxu me logeyga waneng
kängäsa. 9 Xirudus ngade
ka, "Kaluwi zä Yoxana tä
pox yä mändey xānanang
kalugsi sälege ngakeneng?"
Na Xirudus kasäkesawa
paye ox Yasuwa.

*Yasuwa Käsīy Kän
Päsäciny Mādäg (5,000)*

10 Känggi Yasuwa
kälägäng kämele, na saläpe
ngaki kä'day sawexang ta
Yasuwa. Na mabag sa
sägä'docco sapälesäning
sāpaxadas bo pana
säbangäs Petsayida. 11 Neng
xä'dä kapungung owduma
na käräbkädä ma. Na
mabokasa sa ndä mälegey
sa na ngakä butugku Kaläg
na mägädäxä känggi paye
däxang.

12 Xong paye 'däng, na
känggi mägälägä asiny
wang pädaxang kawuno
ngadeccä täma ka, " 'Daki
xä'dänong, ndey 'docco
täwang kaxsä pa ndey
'dox owdu säng na siyad,
xa kogkatäng tä owda
kaculdoy." 13 Neng Yasuwa
kämeley täsa ka, "Anggo
dogi siyad täsa." Na sabuc

täma ka, “Siyatatäng layis kaka kätax song basa raxifiny mädäg na as pädax tol. Basa anoccig anganyig siyad tä känggong kä'dayakang.” ¹⁴ Sangad ngakong xa apanginyatäng päsciny mädäg (5,000) tä warä xä'dä. Na Yasuwa läpede tä menggä räbke ka, “Wanga sa säccasäno tä ud taxä udiny pädax wang asiny (50).” ¹⁵ Na sasog kala ngaki maläpasang. Na kän kä'day käcasäng täzäg.

¹⁶ Na mabag raxifinygi mädägang na aski pädaxang na mägäsa tiyati na malog Kaläg ndä mälarä siyad mädogä ta menggä räbkäma ka sälarta tä xä'dä. ¹⁷ Kä'daygäsa sasiza samasa, na ani kalayang sanyaptä landa asiny wang pädax.

Bucuku Putros ta Yasuwa

¹⁸ Xongenendäng Yasuwa kangäsa kä'doc palacca watägke, ndä menggä räbkämatäng nama na mamän sa ka, “Kän ngadeccä ka agä anäs xäng?” ¹⁹ Na sa sabuc täma ka, “Näs Yoxana me Pac, kulung kän ngadeccä ka me logey Iliya, na musku kulung kän ngadeccä ka nuxus menggä logeygi wane käxseng nuxungang kangäsa.” ²⁰ Na mängade täsa ka, “Yä anggo ngadac-cang ka agä anäs xäng?” Na Putros kabuc ka, “Almasini Kaläg kayaxsängang.” ²¹ Na madästä sa seley ka ndakä säläpe tä nuxu kig song,

²² mängade ka, “Agä, Pächä Käxa Jul anycäläxtiwa tä nga mange, ndä ngondowiny na bazuwinygä tämed tä Kaläg na menggä lelericcä asiriyenä Musa pexke agä, na säpaxe agä ndä tä sängga kodos angäsata tä xäs.”

Ndey ka Layis Seley Me Räbkä Yasuwa

²³ Yasuwa ngade tä kän kä'day ka, “Käxi paye ndey layis me räbkangang basa 'diya ngakä ngase ndä poko kalic todotol na räbkädä bangang.” ²⁴ Xa käxi paye ka xony rongicce täzäg tä ngakä ngaseneng, mesede yä käxi paye mese rongicce täzäg tä ngakangang 'doxo aygä lili. ²⁵ Oxadi kig 'doxo tä bangä tangandäg tä walangic kä'day yä edekeny mese rongicceneng? ²⁶ Käxa ze maye tä agä na tä legeg-gangang, Agä, Pächä Käxa Jul alayis käxa ze maye täng tä xongondi awunodung täng tä xongondu dädäxticcang na tä dädäxticcä Appa na malayikadagi tedelinyang. ²⁷ Ndä gang seley aläpedäng tanggo ka, kulung känatäng tä warägo äxseccä song basa ox bugundugku Kaläg.”

Pasakä Yasuwa ta Menggä Logey Musa na Iliya

²⁸ Yasuwa käbäldeyze ndä mäsäng tespedespe, na mabag Putros na Yoxana na Yaxup sägä'docco tä zä cabär tä paley. ²⁹ Yasuwa palacca na toccäma kalay caka na tanduguma wux-eccä, ndä dulatulajeccä

bowiny. ³⁰ Na apangas pädax kaweyesäno kadeb legey nama, apangaskenegi menggä logeyag, Musang na Iliya. ³¹ Sägaleta na tädäxtic dulatulaje na salegeyze na Yasuwa tä ngakä melgäma tiyati ka mä'doc tä Ursalim ndey ngaki Kaläg kangatang 'desesäning täng.

³² Ndä Putros na känggi nangang kasändäcco, na sägoxsasa na agäsa käyer na sägox tädäxticcäma na apanginy pädax dokoloccu nama. ³³ Na apanginygi pädaxang kamen sog, na Putros ngade ta Yasuwa ka, "Bazuwec, wunakog todong apoccu. Nycugo abola telegudi kodos, nuxu tägi, nuxu ta me logey Musa na nuxu ta me logey Iliya." Xa mabäle 'dogi mälegeng song.

³⁴ Ani mälegeyis ngakon-gang timinggaric kawung kaxub sa, na salaye sänyigadiny. ³⁵ Na sägädäng ngasäwan tä kaxsä timinggaric ka, "Päxä penanggong nyang kadere-sang, ndänge ngake!" ³⁶ Ani ngasäwan kalegezenäsang, Yasuwa ka'doxuwa watäke. Na sägämolosäning saläja 'dogi sägoxang tä nuxu kig song basa xongonda caka.

Caygä Ligida Tas tä Päxä Pipi

³⁷ Edekenydeneni sacoc-coleza na zä cabär na xä'dä käpasasa täma. ³⁸ Na nuxu apangandäng tä warä xä'dä kabandäsa ka, "Me bälidic,

kanyäxay gi ka xony penang xa nyang nuxu tagä tolang! ³⁹ Ligida tas teldedes ma na sogo ma mädawé ndä nyäpapaxe ma na sogo gux-udunic päkädäng ikäma ndä wange ma mänungu song, cäläxti ma nano. ⁴⁰ Ndä kampay tä menggä räbkägi ka cay ligida tas tä wanäma ndä kadeges sa."

⁴¹ Na Yasuwa kabuc ka, "Anggo menggä zong menekä ngakägo bedeccä ndä näsang menggä sogo ngaka tasiny! Alayde nanggo ka'das wi dexä am-panye ngakägong? Koying päxä penägi todong."

⁴² Sagoying päxä pipi ngäte ta Yasuwa na ligida tas kacodasa pipi täzäg pappaxe. Na Yasuwa kadux ligida tas, na kala Yasuwa känay päxä pipi na kämeles ta mena. ⁴³ Na todi kändongo tä panggudugku Kalägi mänangang.

Yasuwa Kanimäng Xäske

Na todi xä'dä kä'day käledäning tä 'dogi Yasuwa wexeng, na Yasuwa ngade tä menggä räbke ka, ⁴⁴ "Mene legegong tä mäganYGägo, xa agä Päxä Käxa Jul sä'doc sämenedes agä ta asänggä menggä kurang." ⁴⁵ Ndä sa sabäle legeygi malegeyag song, xa bange ka'danywa täsa ndey ka ndakä säbäle. Ndä sänyigate mänekä ma tä legeygi mägalajängang.

Xänang Ngake Tädäxiny Tanggong?

46 Na kala matakä nga kadebäning tä warä menggä räbkä Yasuwa ka xänang täsa ngake tädäxiny mo'do acängganang. 47 Neng Yasuwa kabäle ngaki sabokasa tä mäganygäsa, na mabag päxä pipi mägätokalasa tä wanäma. 48 Na malegeyze täsa ka, "Käxi paye päxä päxkunong na agangang, paye agä. Ndä käxi paye agäng, paye Kalägi kayaxsä agäng. Xa käxi biyey tä warägo kä'daygäsong, nyang ngake tädäxiny mo'do acängganang."

Käxa Layis Me Kurugi Songang, Biskonuging

49 Yoxana kabuc ta Yasuwa ka, "Bazuwec, ka'doxig nuxu kigkandäng caye kängga tasiny tä wadäkä kän na agägi, ndä wa kampayedig ka andokoleyig ma xa mäsa me räb na was song." 50 Neng Yasuwa ngade täma ka, "Wanga dokoleygä ma, xa käxi näs me kurog säxongang biskonogkang."

Menggä Samriya Käpexkä Yasuwa

51 Sänggä Yasuwa kalaye bälaxiny ndey ka Kaläg bag ma tiyati, na mägädiri Ursalim. 52 Na todi Yasuwa kayaxsä menggä yaxsäwec kapäccasa tagäma, na sägäcogä ow, na saläs kaxsä pang menggä Samriya ndey säbolasa ow täma. 53 Neng menggä kaxsä pa kabäle ka Yasuwa 'do tä Ursalim, na sägäsekä ma.

54 Ani Yaxup na Yoxana menggä räbkä Yasuwa koxäs mänangang, sängadeccä ka, "Bazuwec, mpaye was abandig masä Kaläg täzä koxa ndey tuny nycokong kä'day?" 55 Neng Yasuwa kawexeswa täsa na kaduxsa, 56 na sawetädese tä kaxsä pana caka.

'Dogi Bede tä Räbkä Yasuwan

57 Tä zänggä wedäkäsa ta akäsog, nuxu accäsa kangad täma ka, "Agä a'dorto banggi todi noco tängang." 58 Na Yasuwa ngade täma ka, "Atorndoru axinygä kudufuganatäng na awiny axinyganatäng, yä agänang Päxä Käxa Jul panangandäng song."

59 Mändey Yasuwa ngade tä nuxu accäsa ka, "Dorkäda agä." Neng kämeley täma ka, "Bazuwec, wanga agä accig anoc abosu appanang." 60 Neng Yasuwa ngade täma ka, "Wanga känggi käxseng bosu kängganagi käxseng, yä gi wede duwala bugundugku Kaläg."

61 Na nuxu accäsa kasan ngade ka, "Agänang a'dorto gi, Bazuwec, neng bende agä accigäne anoc angada tä menggä panang." 62 Na Yasuwa ngade täma ka, "Käxa seley danada ande tä sicci ndä gawada ze tongang kädäppa bugundugku Kaläg song."

10

*Yasuwa Kayaxsa Menggä
Räbke Tunyu tä Wexed*

*Udiny Kodos, wang Asiny
Wang Pädax (72)*

¹ Yasuwa kayaxsa menggä räbke udiny kodos wang asiny wang pädax (72) ka päccasa pädapädax tagäma tä bonggu padäg na tä otagi kä'day ma Yasuwa mäpaye mä'doc tängang.
² Mängade täsa ka, "Jeded mangeccä yä wadi menggä wexed bälaxiny. Neng gang mäne Bazuweccä jeded ndey yaxsäng menggä wexed tä jeded.

³ "Wesi! Ayaxsadas anggo tunyu ka'das sagunuga luluduwinny käraka tä pidi.

⁴ Ndakä bagang ariyaliny mange, na mändey meldänä wedäg, na 'dataginy axinyga pädax, na ndakä galedetäsänang tä kän ta akäsog song.

⁵ "Känoxang käläsang pang, päcci ngada ka, 'Wanga modeygä Kaläg laye tä panong!' ⁶ Ndä käxa mägaxse paye modey tä owdiyang, modey layeccä täng, yä wundungang modeygägo layeccä täsa song.
⁷ Nycicci tä nya pani ziya na wuxi siyaki sadogung tanggong, xa me wexed kädäppa ka sädoga dericce. Wanga 'däla'dälangey tä padäg winy.

⁸ "Känoxang käläsang bo pang, ndä kän kabokasa

anggong, ziya 'dogi säguxis anggo nangang. ⁹ Ndäxi känggi täxäccä tä cabarang na lapi täsa ka, 'Bugundugku Kalägkatäng nanggo!'

¹⁰ "Yä käläsang bo pa ndä kängge kabokasa anggo songang, wesi tä akänggä sota na ngada ka, ¹¹ 'Käräptänicci bo panägonong ta enggäskong a'diskidinig tanggo ndey layis ngakä ngastänggägo ndä bäli ngakong ka, Bugundugku Kaläg kala kawuno ngäte.' ¹² Ndä ndänge, xa tä sanydä ow, ngakong layeccä tasiny täsa mo'do aki kasoguning tä Sudumang!*

¹³ "Woyoy tä menggä pang Korusin! Woyoy tä menggä pang Petsayida! Xa kä'dang weränicci kasoguning tanggo sogkuwa tä Taya na Sayidunang kax sägämele mäganygäsa tä ngaka tasiny wane, säccatetäsäng tä atilisiny, säbugu zänggäsa na uskuc na saxse mäganygäsa. ¹⁴ Neng xongondi xukumzä Kaläg wunodung tängang, nga layeccä bedeccä tanggo paccey 'diti aki tä Taya na Sayidunang! ¹⁵ Ndä anggo menggä Kafärnaxum, anggo noxadang ka edekeny Kaläg dädäxti anggo tiyati? A'a! Wadi kala sägawadas anggo tä mas!

¹⁶ "Käxa kädäng ngakägong kädäng ngakang, yä käxa käpexkä anggong käpexkä

* **10:12** Kaläg kaduny menggä Sudum na Amora na mas xa kafulo sogo ngaka tasiny.

agä ndä käxa käpexkä
agäng käpexkä Kalägi
kayaxsä agäng.”

*Menggä Räbkä Yasuwagi
Udiny Kodos Wang Asiny
Wang Pädaxang Kämele
(72)*

¹⁷ Kala menggä räbki
udiny kodos wang asiny
wang pädaxang (72) kämele
na led, ngadeccä ta Yasuwa
ka, “Bazuwec, mändey
kängga tasiny kädängäng
nga täwas na agägi!” ¹⁸ Na
kala Yasuwa ngade täsa
ka, “Agä kanox Däniye
käpätäng zä koxa kadeläng
kala mälamälajegä koxa.
¹⁹ Ndänge, agä kadong
panggudug tanggo ndey
dereterejeyseng zänggä
dolu na dänu na mändey
ndey mo'dasang me kurugo
Däniye, ndä 'doga siye
anggondäng song. ²⁰ Yä
musku, wanga led ka
ligitiga tasiny kädängäng
nga tanggo, wadi ledäning
xa agägo garekärejesäning
tiyati tä pang Kaläg.”

²¹ Na tänya axä owdi
Yasuwa käligäwa na Ligidä
Kaläg na mägäledäwa
mängade ka, “Agä
andädäxti gi Appanang,
Bazuweccä tiyati na täzäg,
xa gi kä'dany ngakong
tä menggä lelertäg na
känggi yeräninyang, yä
käparäng tunyu ta enggä
pipu. E, Appa, xa wanägi tidi
täng. ²² Appananggi tiyating
nyang kadong ngakong tagä
kä'dayang. Appanangang
tol seley yex agäng, Ndä

agänangang tol seley ayex
Appangang, na mändey
känggi agä käpay ka aparas
Appanang tängang kəcag
tol bäledes mang.”

²³ Na kala Yasuwa kawex-
eswa ta menggä räbke
kabodsa nang na ngade ka,
“Baxändäg tä agäwanggi
lale 'dogi anggo zayadan-
gang! ²⁴ Ndä agä aläpedäng
tanggo ka menggä lo-
geygä Kaläg mange na
buguninginy käpay ka laley
wegkong laladangang ndä
kox song, sapaye ka sädäng
ngakong ndängedengang
ndä sägädäng song.”

*Serekä Ngakä Apangza
Apo tä Samriya*

²⁵ Xongenendäng, me
lelericcä asiriyenä Musa
kangäsa paye ka läbä
Yasuwa, na ngade täma ka,
“Me bälidic, oxadi kädäppa
ka asog ndey a'dox aygä
liliyang?” ²⁶ Na Yasuwa
ngade täma ka, “Oxadi
garekärejesawa tä asiriyenä
Musang? Anggo kábäleng
wi tängang?” ²⁷ Na me
lelericcä asiriyenä Musa
kabuc ka, “Asiriye ngade
ka, ‘Paya Bazuwec Kalägägi
na mägaxsägi nuxung,
na rongiccägi kä'day, na
kutegtägkägi kä'day, na
ngakä zägi kä'day’, na
‘paya menggä sogalinygägi
kä'day ka'das paygi mpayis
ngasäging.’” ²⁸ Na Yasuwa
ngade täma me lelericcä
asiriyenä Musa ka, “Gi
kubuc ngakong appoyo, sogä
mänang ndey nay.”

29 Ndä me lelericcä asiriyenä Musa paye bokung ngase tuny, na ngade ta Yasuwa ka, “Xänang näs me sogaldangang?”

30 Na Yasuwa kabuc täma näs legedanic ka, “Apangandäng kacoccoleza tä Ursalim 'docco tä owda säbangäs Arixa, na kadel ta asänggä menggä bärada na kamen ma kawid ma, käbadä ma ndä wangasa ma tä enggä xäska bälaxiny.

31 “Na todi me tämed tä Kaläg kälaxäng kacoccoleza na nya akäsogi ma'doxung apangzi menggä bärada käbadäng sängo täzäg na mapopporeza mägäläng cengic. 32 Na mändey me Lawi me posakä me tämed kawung kälaxäng na kox apangzi sängo täzäg na kapopporeza käläng cengic. 33 Yä me Samriyani näs me pungutang wede kawung tänya owdu 'doxti sägäbadäng na mägox nya 'doxti sängo na agäma kawasa täng.

34 “Na mägä'doc täng masenyndä penduge ndä mädogä mid täng ndä mäbodey ndä mäpoka tä kaccänäma. Magoya taxä aloc ndä mädäxä. 35 Na edekenydeneni mabag ariyaliny pädax madoga ta me aloc, mängade täng ka, ‘Meskäde 'doxtong appoyo ndä wegki noco wanyäs tämang awunodung ameledäng tägi kä'day.’

36 “Tä känggong ko-dosakang, xänang kädäppa ka näs me sogal tä 'doxti

menggä bärada käbadäng?” 37 Na me lelericcä asiriyenä Musa ngade ka, “Käxi age kawasa tämang.” Na Yasuwa ngade täma ka, “Neng wede sogä ka'das ma mänang.”

Mariyom na Marsa

38 Yasuwa na menggä räbke wedetese na kala sägä'docco saläsa nuxu kaxsä pa na uxandäng säbangäs Marsa kuxis ma xa mäś palangasic. 39 Ndä ce Marsa päxä bosandäng säbangäs Mariyom kacca todä exenggä Bazuwec Yasuwa delde wunde tä bäldeccäma. 40 Yä Marsandäng dalewa tä wexed xa cäpaye cäwex wexed kä'day na cawung ta Yasuwa cängade ka, “Bazuwec, gining seley mpaye ngakang xa'de? Päxäsko kawangäng wexed tagä kä'day. Lapi täce ka cäpos agä.”

41 Na Bazuwec Yasuwa kabuc täce ka, “Marsa, Marsa, gining gare nga ndä käwoldoxu na'do tä ngakä weg mange. 42 Wadi 'dogkandäng nuxu payewa. Mariyom kadere ngaki apoccu pacceyang, 'doga bate täcendäng song.”

11

Palic

1 Xongonendäng Yasuwandäng palacca tä owandäng. Mägädokala paley na nuxu me räbkäma ngade täma ka, “Bazuwec, bälde was na paley, kala ani

Yoxana kâbâldeyis menggä räkkeneng.”² Na Yasuwa läpede tä menggä räkke ka, “Känoxang mpadang palezangang, paleyzi ngada ka,

Kaläg, Appani tiyating wanga agägi laye tädäxiny

wanga bugundugkägi wuno täwas.

³ Togung zäx täwas todotol,

⁴ na saxäng ngaka tasiny-gusko täwas,

xa was wasaxedig nga tä känggi sogo ngaka tasiny täwasang.

Ndakä wang ngakä längädäsko kawas was tä sogkä ngaka tasiny.”

⁵ Na Yasuwa läpede täsa ka, “Kädäppa ka nuxu accägo biskonenendäng, ndey 'doc täng tä pälic läpe täng ka, 'Bisko, bege agä pugandagä zäx kodos,⁶ xa biskonang kápätäng wedäg kawung tä panang, ndä 'doga tä andangandäng song.’⁷ Ndä biskonäma meley täma ka, 'Wanga daw tagä. Xa kala kadäränggälisnig na penggang tax kasändäccig. Päx angäsata tiyati adogodung nuxu 'dog tägi song.’⁸ Agä aläpedäng tanggo ka, kax apang uccu tax na ngäsata togada nuxu 'dog ta biskone xa ka biskoneneng song. Neng apang ngäsata togada 'dogi biskone payeng xa biskone ze kama tä mäneke song.

⁹ “Aläpedäng tanggo ka, mäne owdu 'dog ndey sädogung tanggo, nyamgäda 'dogi mpadanggang ndey 'doxang, dotora sogal ndey sälenge tanggo.

¹⁰ Käxi mänecceng 'doxo 'dogi payeng ndä käxi nyamaccang kaledäng, na käxi totoro sogalang sälengede täng.¹¹ Xänang tä warägo näs appa pene kanyixay axsic täng ndä doga dol tängang, yä sax togakä axsic tängang?¹² Na cong pene kanyixay gäldic täng, ndä toga dän tängang?¹³ Anggogi ndasinyangang yexeng togakä wegka apoccu ta penggägo, neng seley Kaläg, Appani Tiyyating togada Ligide tä känggi mäne mang!”

Yasuwa na Pelizipul

¹⁴ Yasuwa kăcay kăxa tasta kădogosojeý apang. Ani kăxa tas kawetăsang, apangzi kalayis togojosang kalegese, na xă'dă kădongo.

¹⁵ Na kulung acănggăsa ngadeccă ka, “Yasuwa caye kăngga tasiny na panggugu Pelizipul buguningză kăngga tasiny.”¹⁶ Kulung kăn paye lăbă ma na ngadeccă ka măsog bolic pătăng tiyati.

¹⁷ Yă Yasuwa kabăle ngaki tă măganygăsang na măngade täsa ka, “Bugundugka kălartănong wanyetăsăno, ndă caxsăwanda kălarăwang, telgedăng.¹⁸ “Yă gang butugku Dăniye kălarănong, bugundugke

dokoloccu key? Agä kamän anggo xa anggo gasedänang ka agä anycaye kängga tasiny na panggugu Pelizipul. ¹⁹ Ndä gang agä anycaye kängga tasiny na panggugu Pelizipulang, anggo menggä räbkägo caye na panggugu wi? Neng mänangang, sa säparedäng anggo tunyu ka nyceluwinyang. ²⁰ Yä gang agänang anycaye kängga tasiny na andä Kaläggang, mänangang bugundugku Kaläg kácogu anggo.

²¹ “Apangza pädäg kayiwa na wegkä pogutang meske pane, na ka'däka'dinä pane kä'day. ²² Yä apangza pädäg paccey kasakas ma ndä kamo'das mang, soro bupsu pogudumani mápäse andäma nangang na bate wegkäma lare.

²³ “Käxa nagä songang me kurangang ndä käxa poso agä tä wexed songang mace tagä.”

Melgä Ligida Tas

²⁴ Yasuwa legegce ngade ka, “Ligida tas kawetä tunyu täwang kigkang, tusu otaga ma wundung täng nyame owda nundu täng neng 'doxo song. Na ngade tängase ka, ‘Neng mänangang amelede tä boxu pananggi kawan-gasang.’ ²⁵ Na nyämele nyä'doxada boxu pa worowa kälexejeg na weg repetäsäning. ²⁶ Ndä nyäwede mändey nyä'do nyägodung kulung lititiga

tasinyga paxtinding mo'do nya, ndey sä'doc säläs säcuccu täng, ndey säsong 'doxti cuke laye tasiny mo'dä cukenegi täzäläggang.”

²⁷ Ani Yasuwa kalegeyäs ngakongang, uxandäng tä warä xä'dä kädawa ta Yasuwa ka, “Baxändäg tä uxi kiyäng ging na ki'digi kä'dey ging!” ²⁸ Yä Yasuwa kämele täce ka, “Wadi baxändäg tä känggi dänge ngakä Kaläg na wexeng!”

Boliccä me Logey Yunan

²⁹ Xä'dä kaposwa, na Yasuwa kadeb legey ngade ka, “Zong sogo ngaka tasiny paccey, zong paye agä ka asog bolicca sogowa täng, ndä boliccandäng dogadaswa täng song basa boliccä me logey Yunan.

³⁰ 'Dase ani Yunan kawunäs kalayis bolic tä menggä Niniwa, agä Päxä Käxa Jul mändey alayis bolic tä zong. ³¹ Buguningzä uxandäng näs näkä anda täzäg ngäsata na känggä zong tä xongondu xukum.

Na cäsogo asiriye siye sa xa cägäpätäng tä 'denga ndey cädäng lelericcä Seleman. Ndä kigkanang todong ngake tädäxiny mo'do Seleman! ³² Menggä Niniwa ngäsotäsäng na menggä zong tä xongondu xukum. Na säsong asiriye siye menggä zong, xa ani Yunan käbäldeyis menggä Niniwang, sägäxaje tä ngakäsagi säsong tasinyang. Ndä

kigkanang todong ngake
tädäxiny mo'do Yunan!

Owda Bow na Owda Jul

³³ “Käxa banye lampane
ndä 'danye na gumudi 'dog
tängandäng song, basa
bokasa täzä tumu ndey
känggi läsotäng towang za-
yza nang. ³⁴ Awunuging näs
banyicä wanäging. Känox
awunugi apong, wanägi
bägälic päse nyipäxkic, yä
awunugi tasang, wanägi
bägälic lätäng. ³⁵ Neng
gangang bäli, nyipäxkiccägi
ndakä layis lätäng song.
³⁶ Ndä gang känox wanägi
bägälic päse nyipäxkic
ndä nuxu cengiccenendäng
tä lätä songang, wanägi
bägälic päse nyipäxkic kala
pappareygä lampa.”

*Yasuwa Kadux Farisiny
na Menggä Lelericä
Asiriyenä Musa*

³⁷ Yasuwa kä'dese legeyge
na nuxu Farisiccandäng
kabandä ma ka sä'docco
sägur siyad tä pane. Na
Yasuwa kä'doc kaläs tow
na sägäccasäng sagur siyad.
³⁸ Ani Farisic koxus Yasuwa
paye siyza yä ka'dayis
asängge täbangä tanyara
songang, kädonga. ³⁹ Na
Bazuwec kalegesse täma
ka, “Neng gang anggo
Farisiny 'dayadang ondugu
satugugo yä kaxsängga
kaganye. Yä anggog
mänang. Mägan ygägo
päse kuruguru na tastäg.
⁴⁰ Ama anggo abadini,
anggo 'diyang ka Kaläggang

teye wanä 'dog na kaxse-
neng? ⁴¹ Wadi dogi weg
tä känggi widäningang na
mägan ygog nuxung, ndey
ngakä mägan ygägo na
wexekägo laye kälexejeg
tagä Kaläg.

⁴² “Woyoy tanggo Farisiny!
Anggo dogadang asiny tä
udiny mädäg tä kenyu
na enggä ewegä log tä
Kaläg, yä musku anggo
bigiding däppic na payicä
Kaläg! Wadi kädäppa ka
anggo dogang wekgong tä
Kaläg yä wangang bigigä
däppic na payicä Kaläg.
⁴³ Woyoy tanggo Farisiny!
Xa mpadang cad tä otagä
dädäxti tä axä palicä
Yaxudiny na mpadang
ma'ditegä modey tä otagä
nganyatada! ⁴⁴ Woyoy
tanggo! Xa kä'dasang mo-
rotaga kasabe, kän wedeccä
ta zängga ndä yex song!”

⁴⁵ Na nuxung me lelericä
asiriyenä Musa kabuc täma
ka, “Me bälidic, legeyis
ngakongang langatag täwas
mändey.” ⁴⁶ Neng Yasuwa
kämeley ka, “Woyoy ama
menggä lelericä asiriyenä
Musa mändey! Anggo
ndarandadang kän na
ngakä asiriye ndä siyada
tä wädäka, yä musku taxä
nuxuza anggo dogadang
asänggägo täng tä posad
song! ⁴⁷ Woyoy tanggo
xa anggo donyadang mo-
rotagä menggä logeygi
wawanagkägo kapaxang.
⁴⁸ Ka'das ka anggo gix-
ing na käbäleng wexekä

wawanagkägo, xa sapaxtä
menggä logey ndä anggo
kädonydang morotaga!

⁴⁹ Nenyang Kalägi yex nga
kä'dayang ngade ka, 'Agä
ayaxsada menggä logey na
känggi sägäligäng täsa, ndä
kulung acängga säpaxe na
sämaceccä täng säpexke.'

⁵⁰ Ndä zong layis näka
asiriye siye tä tamiccä
menggä logeygi kacolasäwa
cawu tebiccä ow, ⁵¹ cawu
tamiccä Xapil na tä tamiccä
Zakariya, ani sapax tä kaxsä
kaldä axä tämetang. E, agä
aläpedäng ka layeccänäs
ngakä ngastänggä zong.

⁵² Woyoy tänggo menggä
lelericcä asiriyenä Musa!
Anggo kädäringgiling so-
galdä yexkä nga! Anggo
käläsang na ngastänggägo
song, ndä käzekeng känggi
paye läsang."

⁵³ Ani Yasuwa käpayis ka
wetä tä pang Farisiccang,
menggä lelericcä asiriyenä
Musa na Farisiny kadeb
maccad tasiny täma, na
samän ma seley na mäned
tä nga mange, ⁵⁴ ndey
sänyamgädäs rakawza
sämen ma täng tä ngaka
mälege.

12

*Nyigata Kaläg, Wanga
Nyigatägkä Kän*

¹ Ani xä'dä kädurisäno
kasog päsäciny dexä bun-
gudäningang, Yasuwa
kadeb legey täzälägäne
ta menggä räbke ka,

"Meskädäning tä 'daz-
iccä Farisinygi näs fono-
fonyang. ² 'Doga

ka'danywang, 'doxowa
ndä 'doga kabotwa näs
raj paredängwa tunyu.
³ Ndä gang ngaki bägälic
kangadäning ongutang
dängewa säxe, na ngaki
käbodang taxä ndongang
duwaledäning tä owda
lenge.

⁴ "Aläpedäng tanggo
biskodagang ka wanga
nyigatägkä känggi paxe
wanäwanang, xa mändey
'doga sogo täbängenendäng
song. ⁵ Wadi aläpedäng

tanggo ka käxi kädäppas ka
nyigatangang, nyigata Kaläg
xa nyang tol panggudug
täng gawadas anggo tä mas
tä xongondu xäskägong.
E, aläpedäng tanggo ka,
nyigata Kaläg! ⁶ Päx atodu
mädag sänganyada na
mälininy pädax song? Yä
musku nuxung atoduwic-
candäng ka'diyaswa tagä
Kaläg song. ⁷ Ndä näs
tire apaxki täzäging Kaläg
kägänasa. Wanga nyigatäg,
xa anggo ngakägo bedeccä
mo'do atoduga mange.

⁸ "Aläpedäng tanggo ka,
käxa 'dade awage na agä
tagä kän ka räbo agäng,
agä, Päxä Käxa Jul mändey
a'dade awagang nang tagä
malaykadagä Kaläg. ⁹ Yä
käxa käli agä tagä känang
agä mändey agäli tagä
malaykadagä Kaläg. ¹⁰ Ndä
käxa lege ngakä maccad
tä ngakang, agä Päxä Käxa

Julang, nyawangada nga täng yä kăxi degeje Ligidä Kalăgkang nyawangada nga täng song. ¹¹ Yä sagoying anggo tagä axä paliccä Yaxudiny na bugununginy na ngotorpodang, ndakä gâredeng ngaka măxising nang na tă 'doga legedeng, ¹² xa Ligidä Kalăg lapedäng 'doga legedeng tănya owdi."

Serekä Ngakä Apangza Kadangandey ndä Ka'darandey

¹³ Nuxu kigkandäng tă warä xä'dä ngade ta Yasuwa ka, "Me băldic, lapi ta păxă bisko ka walarig malenă appanang."

¹⁴ Neng Yasuwa ngade tăma ka, "Amo, xănang kamenäs agă buguningang de azaye ngakăgong?"

¹⁵ Na măngade tăsa ka, "Lengi agăgo na meskăde ngastănggăgo tă 'dara, xa rongicca 'doxowa tă dangandăgkandäng song."

¹⁶ Na maser nga tăsa ka, " 'Doxtiyandäng năs tanganic pelowge kiyiing păxă kuny, ¹⁷ na măngade ka, 'Asogowa key, ndey a'dox curuna ngotey adoga kunykanğ tăngang?" ¹⁸ Na kala măngade ka, 'Basa asog 'dogong, apaxatasa curugang yă adonyo kăka ngoniny, ndey acolda kuny tăng na ka'dăka'di băgălic. ¹⁹ Ndă angad tăngasang ka, "Gi ka'dăka'dinăgi mange kăyoka mange layis năkă jende, buduldi, sisi, wuxsi, na ledewa!" ' "

²⁰ "Na kala Kalăg ngade tăma ka, 'Ama abad! Ondunong analedäng rongiccăgi tăgi tunyu, yă xănang lugu ka'dăka'dini kăwex tăngasăging?" ²¹ Kăxa xikităsa weg tă ngase mănangang, wadi tăngandăgkenetăng tagă Kalăg song."

Kalăg Paye Ngakog

²² Yasuwa ngade tă menggă răbke ka, "Alăpedäng tanggo ka wanga kărekă ngakă aygăgo, na wegka ziyadang na tă wadăkăgo tă tanduga lagadang. ²³ Xa ay mo'do siyad, ndă wanăwan mo'do lag."

²⁴ "Lala atămidिंगgaru wacca song ndă zăbecce song, ndă curunanandäng song, yă Kalăg ziye. Ndă Kalăg paye anggo paccey mo'do awiny! ²⁵ Xănang tanggo kărekă ngake posada săngădic tă rongeneng? ²⁶ Ndă yexeng ka kărekă ngakăgo posada săngădic tă rongiccăgo songang, wi siye anggo gâredeng ngakă kulung wegkang?"

²⁷ "Lala dudulus 'dongoccu key, ndă wexekanatäng song, ndă secce song. Neng musku alăpedäng tanggo ka, kala Seleman tă bugundugke kălagă tandăna kusu kala nuxu dudulusiccong song! ²⁸ Ndă Kalăg nyaza nyăgădel dudulus mănangang, ndă uccu todong xongong ndă edekeny sădoxus mas tă boxu tămă'di'diccă

zex. Kaläg paye anggo mo'do dudulus. Wi siye anggogong menekä ngakä Kaläg bälaxiny tanggo mänangang?

²⁹ “Ndakä makadang bandagä wegka ziyadang na wegka wuxiding na ndakä gäredeng ngakä weg.

³⁰ Xa känggi kä'day tä walangiccang, mate bandagä siyad na wuxid, ndä Appani Tiyating yex 'dogi mpadangang. ³¹ Anggo basa makadang bangä ngakä Kaläg ndä nyädogung weg tanggo käsär.

³² “Anggo menggä räb kä'dasang sagunu, wanga nyigatäg xa Menggoni Tiyating wane tidi xa buguningzägong na meske anggo.

³³ Nganyi wegkägo kä'day larti tä känggi widänong. Yawi malenägo tä pang Kaläg tä kaxsä meldugi box-soccu na cereduno songang, na me bära bate songang na tondoc wanyäs songang ndey meskädä wegkägo tä pang Kaläg tiyati. ³⁴ Xa owdi mälenägo tängang nyang mäganängägo padasang.

Bolosäning tä Melgä Bazuweccägo

³⁵ “Laga tandugu wex-ekägo na meskädä lam-padagägo kusuccu kä'day.

³⁶ Layi kala kängga bene käxa ngondeza päkädäng owdu ledä batad, ndey mawung madotorezang ndey lenge bäling täma tetex. ³⁷ Baxändäg tä cäläxinygi käxa

ngondey 'doxodung ox-acca kasändäcco song tä melgämang! Aläpedäng

zänggä nga tanggo ka, ma täzäma mälage tandugu wexed, na mäbogatasa sa, ndey mälarta siyad täsa!

³⁸ Kax mäwung tä pälic na mä'doxodängza soxacca, baxändäg tä cäläxinygi mänangang! ³⁹ Wadi bäli ka kä'dang me pa yex xongondi me bära wunodung tängang kax meske pane wange me bära läso song. ⁴⁰ Anggo mändey layesi kängga cuccu meskedäning, xa agä, Pächä Käxa Jul awunodung ndä xongondeneni bäledesäwa song.”

⁴¹ Na Putros ngade ta Yasuwa ka, “Bazuwec, gining zere ngakong täwas wala kän kä'day?”

⁴² Na Bazuwec kabuc ka, “Xänang kädäppa ka mpäse andägi nang na kalelerey tä menekä wexetang, xänang käxa ngondezä wexed bokatasa mene menggä wexed tä ande ndey togadas dericcä menggä wexed layde songang? ⁴³ Baxändäg tä me wexeki käxa ngondeze mele 'doxodung wexecceng.

⁴⁴ Aläpedäng zänggä nga tanggo ka, käxa ngondezä wexed menede ka'däka'di tä andä käxi mänangang.

⁴⁵ “Yä wadi nya me wexeki kä'doc kangad tä ngase ka käxa ngondezang kalaygädas tä mel, na kadeb badkä kulung menggä wexed, bade apanginy na uxu kä'day, ndä siyacca

na wuxicci de bux paxeng,
⁴⁶ ndä käxa ngondezä nya
 me wexeki nuxus wung
 tä xongondi sabokasa ka
 mäwunodung songang na
 tä sani säyex songang, na
 cäläxti ma, ndä matas ma
 tä owdu märinginy. ⁴⁷ Ndä
 me wexeki yex ngaki käxa
 ngondeze paye ndä wexe
 song na käbolasa ngase
 songang, 'dodox bad mange.

⁴⁸ "Wadi me wexeki yex
 ngaki käxa ngondeze paye
 songang ndä wex songang
 säbade päxä bälax winy.
 Käxa sadoga weg täng man-
 geng, säpaye täng mange,
 ndä käxa saposa weg täng
 mange ka mendäng, säläge
 payge täng mange.

*Yasuwa Koyodung Modey
 Song, Mägodung Wasad*

⁴⁹ "Agä kawung täzäg tä
 koyinakä mas, ndä ampaye
 ka nyandäng ganang tunyu
 walangic kä'day! ⁵⁰ Ndä
 mänang agä alayis käxa
 panye xuxubtäg ndä agäre
 bal a'dese! ⁵¹ Anggo
 noxadang ka agä kawung
 tä koyinakä modey täzäg?
 A'a, agä kawung tä koyinakä
 modey song, wadi kawung
 tä koyinakä wasad! ⁵² Caw
 xongong na ur'dug bäl
 ka kän mädäg tä pana
 wasetäsäning, kodos pase
 awaga na pädax ndä pädax
 pase awaga na kodos.

⁵³ Sa säwasetäsäning,
 menäwan kixidi pene
 apang song, ndä
 penäwan kixidi mena
 song,

bonuwan kixidi päxe ux
 song, ndä päxä ux kix-
 idi bona song,
 ux kixidi uxä päxe song,
 ndä päxä ux kixidi
 wawana ux song."

Bälädäniccä Bolu

⁵⁴ Yasuwa mändey kangad
 tä xä'dä ka, "Känoxang
 timingarugu zädongang,
 na kala bälédeng ka koxa
 käje na käje. ⁵⁵ Ndä
 känoxang megenä anda
 täzäg sageng, bälédeng
 ka kämpagänendäng
 sagedäng, na sagedäng.
⁵⁶ Anggo menggä fonofoney!
 Anggo yexeng tetebegä
 ngakä bolicca alacca täzäg
 na täzä koxang, yä wadi
 kasogänang key 'diyang
 tetebegä ngakä bolugu wex-
 ekong awexe ganangang?

Nyca Amusu tä Ngastänggägo

⁵⁷ "Wi siye anggo zax-
 adang terekä ngaka apoc-
 cung? ⁵⁸ Känoxang noc-
 cang na me pokakä nga
 tägi tagä buguningang,
 mäpädägäsing ndey bolang
 ngakägo nama ta akäsog
 ndakä mägoyas gi tagä
 buguning, xa buguning
 menedes gi tä andä polisic,
 ndä polisic rikidis gi tax.
⁵⁹ Agä aläpedäng tanggo ka,
 anggo 'doxadang tunyu song
 basa degänang na milin!"

13

*Yasuwa Kabandä Kän ka
 Xaje tä Ngaka Tasiny*

¹ Xongondi Yasuwa
 bäldeccenäsang, kän
 kawuno kaläja täma ka

Pälatis kapax kulung menggä Calil ndä kurupu tamicca na tamiccä wegki sadämze nangang. ² Na Yasuwa kabuc täsa ka, “Neng anggo kábokosänang ka menggä Calilgi sapaxang sag tasiny mo'do wayaka nyang kasog sapaxang? ³ A'a, aläpedäng tanggo ka bal anggo xajang tä ngaka tasiny mändey xa na'anggägo näxsecceng mändey!”

⁴ Na mändey Yasuwa ngade täsa ka, “Känggi bågäliziccä kumagi kadeles zängga kaxse asiny wang tespedespe tä Salonang, anggo nggeredeng ka sa sädasiny paccey sämo'do känggi kädäy tä Ursalimang? ⁵ A'a, aläpedäng tanggo ka bal anggo xajang tä ngaka tasiny mändey xa na'anggägo näxsecceng mändey!”

Seredäniccä Etä 'Damina Iye Säxong

⁶ Yasuwa kaser nga ka, “Apangandäng käsäbä etä 'dami tä pelowge, na xongonendäng mägä'doc mäpaye ka metä enggenge neng ma'doxa ze pälo. ⁷ Na kala mäläpede tä 'doxti meske pelowang ka, ‘Tä jendäg kodos agä amelde awunodung ndey ka a'dox päxä 'daminong ndä a'doxodung ze pälo. Dagasa täzäg, taxä wi 'dog uccu ndä wanyis zäggang?’ ⁸ Neng me megäskä pelow kabuc täma ka, ‘Bazuwec, accig

wanga etong jenong yä anoc abosu boxe adoga mudura täng. ⁹ Ndä zayig cong kiye baydangang, yä kasax iyetang, ndä lusa täzäg.’”

Yasuwa Kädäxä Uxandäng näs Mexes tä Xongondu Sapid

¹⁰ Yasuwa bäldecce tä nuxu axä paliccä Yaxudiny tä xongondu Sapid, ¹¹ ndä uxandäng tänya owdi ligida tas kämexestey tä jendägka asiny wang tespedespe. Nyägonggozey ce kasog ce seley cäyex dokol kätay song. ¹² Yasuwa kox ce na kabandä ce na ngade täce ka, “Kala käwulegeswa tä ngguxtug.” ¹³ Na Yasuwa kädana asängge täce na tetex cägädokol tiyati kätay na cägädädäxti Kaläg.

¹⁴ Na käxa ngondezä axä paliccä Yaxudiny käsänga ta Yasuwa xa Yasuwa kädäxsi tä xongondu Sapid, na ma käxa ngondey mäläpede tä xä'dä ka wexed wexedäning tä sängga aran. Käxa täxäng wung sädäxä täng ndakä wung tä däx tä xongondu Sapid. ¹⁵ Na Bazuwec Yasuwa kabuc täma ka, “Anggo menggä fonofoney! Anggo nuxu accägondäng tä xongondu Sapid uludi tigide na cong näs kaccäneneng ndey koya tä wuxid song? ¹⁶ Yä cezong cäs päxä pe Apraxim, Däniye gun onguce tä jendägka asiny wang tespedespeng, awang 'dakakä ce tä co'dic tä xongondu Sapid?”

17 Ani Yasuwa kangadäs legeygongang, menggä kuruma kä'day zängga kamaye yä xä'dä kä'day käledäning tä wexeki kädong sa Yasuwa wexeng.

Yasuwa Kädupoy Pächä Yugicca Biyey na Bugundugku Kaläg

18 Yasuwa kamänze ka, "Bugundugku Kaläg ka'das wi? Oxadiyang agänang andäppo nang-gang? 19 Bugundugku Kaläg ka'das päxä yugicca biyey apang kabag käsäbesa tä kaxsänggä pelowge ndä 'donga layis apanggä ed yagäney, ndä awiny 'danydä axinyga tä acayadage."

20 Mändey Yasuwa ngade ka, "Oxadiyang agä andäppo na bugundugku Kalägkang? 21 Bugundugku Kaläg ka'das 'dazicca ux kabag ndä kuru-pu na duc mange ndä kamojey ndä pudi kä'day."

Akäsogalda Kacäbaswa

22 Yasuwa kä'doc tä wedäg kadus kaxsä pa na enggä cabärta bäldecce ndä mäwedede tä Ursalim. 23 Na nuxu kigkandäng kamän ma ka, "Bazuwec, enggä kän bälaxinyag Kaläg xonyong?"

Na mängade täsa ka, 24 "Mpädägäsining ndey läsang akäsogaldi kacäbaswang, xa aläpedäng tanggo ka kän mange zäge läsake ndä mo'dada läsacca song. 25 Xongonda ledä pa kangäsa kärikä sogaldeneng, anggo wuno-sunang ndokalaccang tunyu

dotoraccang ndä nyäxadang ma ka, 'Bazuwec, wanga was aläsig!' Neng mäbucu tanggo ka, 'Agänang ayex anggo song ndä ayex owda känycuccing täng song.'

26 Na noccang ngadac-cang ka, 'Was kasiyzig na kawuxsig nagi, ndä gi käläldeyze tä kaxsä panäsko.' 27 Neng mämele ka, 'Agänang ayex anggo song ndä ayex owda känyciccing täng song! Nycengäning tä wanang, na'anggägo, anggo menggä sogkä ngaka tasiny!'

28 "Na kala todi ngecceng na gasadang nyäxkägo tä oxakä Apraxim na Isxag na Yaxup na menggä logeygi kä'day tä bugundugku Kalägkang yä anggo tä ngastänggägo sä'dädadas anggo tunyu. 29 Ndä kän päkätäsäng zä dong na tawiny na anda tiyati na anda täzäg wunosuno catetäsäng kuru siyad tä owdu Bugundugku Kaläg. 30 Ndä seley känggi päccadas ngastängganang, latasa tong yä känggi latasa tongang, päccatasa."

'Dockä Yasuwa tä Ursalim

31 Tanya xongondi Yasuwa legeccenäsang, kulung Farisinyatäng kawuno ngadeccä täma ka, "Wete wede wangasa owdong xa Xirudus paye pax gi."

32 Neng Yasuwa kabuc täsa ka, "Wesi lapi ta atorundorini ka, 'Laley, agä anycaye kängga tasiny na

andäxäcci xongondong na edekeny yä mugundeneni ampele wexekang. ³³ Ndä gang agä awedede xongondong na edekeny na mugun xa kax kädäppa ka säpaxa me logey täpox song, basa tä Ursalim.'

³⁴ "Ama, ama menggä Ursalim, anggogi paxadang menggä logey na 'dämedeng menggä yaxsäwinygi sägäligäng! Agä tol kampay ka agä anduris anggo kala kuxug na enggengge tä boxu kubugke neng anggo kämpayang song! ³⁵ Ndä ganang lala kala agä awangatasa anggo! Ndä aläpedäng tanggo ka, anggo mpasaccang nagä mändey song basa ngadang ka, 'Baxändäg tä käxi wunodung na agä Bazuwec Kaläggkang!'"

14

Yasuwa Kädäxä Apang tä Xongondü Sapid

¹ Xongondü Sapid Yasuwa kä'doc tä siyad tä pang ngo-torponu Farisiny ndä kulung känatäng tänya owdi jenggere ma käsac. ² Ndä apangandäng tänya owdi exengge na asängge kapuruzu. ³ Na Yasuwa kamän me lelericcä asiriyenä Musa na Farisiny ka, "Kädäppa ta asiriye ka kig däxsi tä xongondü Sapid wala kädäppa song?" ⁴ Neng säpuloccä na todi Yasuwa kädana ande ta apangzi kädäxä na kayaxsas tä pa.

⁵ Na todi Yasuwa kamän sa ka, "Xänang tanggo pene täng na cong näs tigide kadel taxä gol tä xongondü Sapid ndä 'dägane tetex nyasedäng tunyu songang?" ⁶ Ndä sa sabuc ngakenegi song.

Käxa Coccoło Ngaseneng Kaläg Pokada Tiyati

⁷ Ani Yasuwa koxäs palangas teredenäs otagä caka apoccong, maser nga täsa ka, ⁸ "Sabandä gi tä owdu batatang, ndakä dere owdu cakä kängga ngoniny xa nuxus nuxung kigkandäng sabandä ngondey tägi. ⁹ Ndä nuxus käxi kabandä anggong wung lapäng tägi ka, 'Togi komong känyca tängang tä kaxong ngondeyanang', ndä mänangang zänggä matag tägi ndä sogo gi cengedeswa tä päxä owda biyey.

¹⁰ "Wadi känox sabandä ging, wede icca tä päxä owda biyey ndey käxi kabandä gi kox ging, wung lapäng tägi ka, 'Bisko, bo wede icca tä owda apo.' Na kala känggi täng kä'dayang bälede nyaygi sädogodung täging. ¹¹ Xa käxa poko ngaseneng Kaläg maye ze yä käxa coccolo ngaseneng, Kaläg pokada tiyati."

¹² Sax mändey Yasuwa ngade ta apangzi kabandä kän tä siyatang ka, "Xongonda mpaye bandä kän tä siyatang, acaka bandä biskodagägi na enggä bonggugo na wayagkägo na cong näs menggä sogalinygägigi

kadangandeng ndey ka bandä gi tä siyad mändey. ¹³ Wadi xongonda käsog letang, banda menggä wiy na kappudiny na mexesu na ngojony. ¹⁴ Ndey baxändey, xa sa sämeledäng wegki sasiyang tägi song, gi 'dexo wegkägi tä xongondu ngäsakä kanggi lelexinyang tä xäs."

Seredäniccä Leda Tädäx

¹⁵ Nuxung accä kanggi siy-acca na Yasuwa tä pang Farisiccang kädäng ngaki Yasuwa kangatang, na ngade ta Yasuwa ka, "Baxändäg tä kanggi kä'day 'docco siy-acca tä owdu Bugundugku Kaläggang!"

¹⁶ Neng Yasuwa ngade täma ka, "Apangandäng kasog led ngotey ndä bandä palangas mange. ¹⁷ Na tä xongondu led mayaxsä cäläxinygäma ndey ka 'docco läpe kanggi sabandäng ka wuno xa kala siyatatäng benecce.

¹⁸ "Neng kän kä'day kadeb kerekä nga. Nuxu käxi tä zäläggang ngade ka, 'Agänang kangany zäg ndä ampaye anoc anycopu, wanga agä anoc.' ¹⁹ Na mändey ani täbangeneng ngade ka, 'Agä kangany tigitigä way asiny ndä ampaye anoc azägä, wanga agä anoc.' ²⁰ Yä 'doxti layis sanydäsang ngade ka, 'Agänang andalewa xa kabagsa käsactong ndä awunodung song.'

²¹ "Na kala cäläx kämel kä'doc kaläpe ngaki ta

bazuwecce. Na bazuwec ledä pa käsänga na läpedes ta cäläxse ka, 'Wede tetex tä akäsogä bo pa na ta akänggä sotagä kukujiy. Banggäda menggä wiy na mexesu na kappudiny na ngojony ka wuno.'

²² "Neng cäläx ngade ka, 'Bazuwec, ngaki käläpäng ka sogunong, kasog kala ndä musku otagä catatäng päloccä.' ²³ Na kala bazuwec ngade ta cäläxse ka, 'Wede tä akänggä sotagi ngoniny näs sotagä walangang, banggäda kän ka wuno ndey panang päs. ²⁴ Xa agä aläpedäng tanggo ka acaka nuxu käxi kabandäng ndä saxang, wung pong siyakong!'"

'Dogi Bede tä Räbkä Yasuwang

²⁵ Xä'dä mange wedeccä na Yasuwa na mawexwa mäläpede täsa ka, ²⁶ "Käxa paye wung 'doc nagä ndä paye agä paccey mo'do paygi payis mena na bona na uxe na pengge na enggä bongga na mändey ngase songang, layis me räbkang song. ²⁷ Käxa poko kalicce ndä räbo agä songang, layis me räbkang song.

²⁸ "Xänang tanggo paye dony pane ndä cata ndey gan na zay wegka 'desede tonyakä pane nang songang? ²⁹ Känox känyca gärtä nga ndä bosasa kadasuwec appoyo na kä'dese panägi songang, kanggi kä'day zaye panäging kugu gi. ³⁰ 'Docco ngadeccä ka, 'Apangzong

kadonyza ndä käpany
kä'dese pane song!' ”

³¹ Mändey mängade ka,
“Buguningza key paye 'doc
'ding buguningza caka tä
pogud ndä cata bālede
ngase ka 'do tä pogud na
asāgaruge pāsāciny asiny
(10,000) ndey mo'du bugun-
ingza kāne pāsāciny utang
(20,000)? ³² Ndä māyex ka
mä'dingi nya buguningzi
songang, tä cuku menggä
kurusa tāxande, māyaxsada
kulung menggä bolic
pāccatasa tä legeygä ngakä
modey. ³³ Ndä mänang
nuxung accāgondāng layis
me rābkang song basa
wangesānang wegkāgo
kā'day ndey rābkādang
agä.”

Enggälokega Tasiny

³⁴ “Enggäloke apoccu yä
kalaye leminyang, sogodun-
ing key meletāsāno tä coc-
coydgāng? ³⁵ Enggäloke
kalaye leminyang, kax
sāduki tä zāg na tä codoro
na wexekanatāng song
basa sāduki tāpox. Kāxa
wunde dāngecceng, dāng
ngakong!”

15

*Seredāniccä Ngakä
Sagānda Kāmes*

¹ Menggä yawgä tuluba
na känggi sogo ngaka
tasinyang kawuno tä
dānggä legeygä Yasuwa.
² Neng Farisiny na menggä
lelericcä asiriyenā Musa
ngunungunicci ka, “Apang-
zong bokatasa kängga sogo

ngaka tasiny ndä siyacca
nang.”

³ Na kala Yasuwa kaser
nga täsa ka, ⁴ “Xānang
tanggo sagunu tāng udiny
mādāg (100) ndä nuxung
mes ndä wangatasa aki
udiny tesped wang asiny
wang paye nuxung (99) tä
korongic yä 'doco tä nyamgä
ani nuxung kāmēsang
basa 'dox songang? ⁵ Ndä
kala ma'doxang māpoko tä
baccugāma mālededeswa
nang tä akāsog. ⁶ Māmelede
tä pa, mābange amin-
uguma na menggä
akāsogalinygāma ka, 'Posa
agä nycugo aledāning
xa ka'dox sagāndanggi
kāmēsang.' ⁷ Alāpedāng
tanggo ka, ka'das nya bangi
kän leledāning paccey
tä pang Kalāgi tiyating
tä ngakä kāxa nuxungza
kāxajä tä ngaka tasiny. Xa
ledi tiyati tä pang Kalāgkang
kamo'du ledä aki udiny
tesped wang asiny wang
paye nuxung (99) lelexiny
kamen ngakä Kalāgkang.”

*Seredāniccä Ngakä
Ariyaliccä Fudana Kāmes*

⁸ Yasuwa kawetāde
na legey ka, “Cong nās
uxa ariyalinygä fudada
tāng asiny ndä nuxung
mesang, banye lampane
ndä wortacca paccey
ndey 'dox owde song?
⁹ Ndä ca'doxang cābange
aminuguce na menggä
sogalinygāce cāngade ka,
'Nycugo aledāning xa ka'dox
ariyaliccanggi kāmēsang.’

¹⁰ Ka'das nya bangä ledong, aläpedäng tanggo ka, Kaläg na malayikadage lededäning tä ngakä kăxa nuxungza kăxajä tä ngaka tasiny."

Seredäniccä Apang na Pengge Pädax

¹¹ Yasuwa ngade ka, "Apangandäng mägaccäng na enggä pengge pädax.

¹² Penämani biyeyang lapada täma ka, 'Appa, ampaye larä male täwas.' Na kala mesa kălarä male kadoga kăma.

¹³ "Na tä sängga bälaxiny mäguduri malenäma man-ganya kă'day mägä'docco nang tä cabära täxande. Mägä'doc mawanye nang tä wexekä tawustug winy.

¹⁴ "Na kala mägä'dese malenäma, na buxu kamen nya cabäri na xas kapax ma paccey. ¹⁵ Na mängade tä ngasäma ka, 'Anoco ta nuxu me cabärong ani buduruginyge tängang ndey ameskädä buduruginyge.'

¹⁶ Mägä'doc ndä säleye siyad täma kasog ma mäpaye siyakä sa säpärki mädogada ta budurug-inyang.

¹⁷ "Na xongonendäng manimäng pang mesa na mängade tä ngasäma ka, 'Wi siye agä anycu todong xas paxe agä, yä appanang wekenetäng mange menggä wexeke siyacca matasa de kulung tegeteseng.'

¹⁸ Mängade ka, 'Anoco tä pa ta appanang aläpede

täma ka, "Appa, kasog ngaka tasiny tagä Kaläg na tagä gi. ¹⁹ Kandäppas ka bandäs agä penägi mändey song. Wanga agä alayis me wexiccägi."

²⁰ "Na kala mamen sog mämele tä pa ta mesa. Na mesa kox ma täxande na age kawasa täma kăpaxas ma kagapas ma. ²¹ Na mängade ta mesa ka, 'Appa, kasog ngaka tasiny tagä Kaläg na tagä gi. Kandäppas ka agä anäs penägi mändey song.'

²² "Neng mesa kabandä cäläxinyge ka, 'Dägana goyining tandäni appoy-ong laga ma nang, na бага kălingic loxi tä păxä andäma na laga ma na kăbadaga apoccu.' ²³ Na mesa kabandä menggä wexed ka, 'Goyining păxä 'dämädi kawingang ny-cugo ampärki ma nang, na aledäning, ²⁴ xa păxä penanggong kămes neng sa'dox ma! Oxodig ka mägäxsä, neng manang mawung moxacca.' Na kăn kăledäno.

²⁵ "Yä păxä penämani ngondeyang nyandäng tä pelow na kala kawung wede dänge tädăxä kăn buldi na coxad na langad tä pa. ²⁶ Na kala mägädokala täxande mabandä me wexed mamän ka, 'Oxadi kasiwa tä pang?' ²⁷ Na me wexed lapada täma ka, 'Păxä bonggo kămel kawung, neng menggo kăpärkä ma na păxä 'dämädi kawing pacceyang, xa mawung wanäma apo.'

28 “Na mägäsänga malewa täxande na mesa kä'doc täma mäne ma ka, ‘Wi siye gi zaxe wunad towang?’

29 Na mängade ka, ‘Za, kalayigädä nagi ewexecce tägi kala cäläx ndä ande ngagigi, yä kax taxä nuxu kädong päxä ayis ka apax asig na aminugang song. 30 Yä päxä penäginong kasax gi, kabag malene kä'doc kawanye nang na tabany, ndä kawung kämpärkä na käledäwa täng.’

31 “Na mesa kabuc täma ka, ‘Penang, ging nagä tol ndä wegkang kä'day kinggig. 32 Yä päxä bonggonong kämese täpox neng sa'dox, oxodig ka käxsä neng manang mawung moxacca, nyang kasog kämpärkä mang ndey ledänig.’”

16

Seredäniccä me Menekä Wegkä Käxa Kadangandey

1 Yasuwa kaläpe tä menggä räbke ka, “Apan-gandäng näs tanganic saläpe täma ka me menekä wegkämä kawanydäs weg.

2 Na ma 'doxti kadan-gandeyang kabandä me menekä wegke kamän ka, ‘Oxadi kasiwa andänge sälege ngakä wexekäging? Genesa wexeki käwex kä'dayang xa gi mändey noco layis me menekä wegkang song.’

3 “Na me menekä weg ngade tängase ka, ‘Oxadi

gang asogkang, xa bazuwec-cang paye caye agä tä wex-ekangang? Agä ampädäg de ka awacca song ndä zänggä matag tagä ndey ka anyäxayza. 4 Ayex 'doga asogo ndey kax säbogkung agä tunyu tä wexekang na kän bokatasa agä tä padägka.’

5 “Na kala mabanggädä känggi kamendä amusudi tä 'doxti kadangandeyang nunuxundi. Na mamän ani täzäläggkang ka, ‘Gin-ing bazuweccang paye tägi käreny?’ 6 Na nya apangzi kabuc ka, ‘Bälegkä belenyinygä midä kuluc udiny mädäginny tespedespe (800).’ Na me menekä weg ngade täma ka, ‘Koyung faragiccä amusunugi icca täzäg tetex gärekärejesa udiny mädäginny tesped (400).’ 7 Na mändey me menekä weg kamän 'doxti nuxungang ka, ‘Gining bazuwec paye tägi käreny?’ Na nya 'doxti kabuc ka, ‘Mäpaye landagä guruwec päsic nuxung (1,000).’ Na me menekä weg ngade täma ka, ‘Baga faragiccä amusunugi gärekärejesa udiny mädäginny tespedespe (800).’

8 “Na bazuwec käboxey me menekä wegki käläkäläjang xa mawexse na yerändäg. Xa känggi mene ngakä Kaläg songang, yeräniny tä wexekanagi wexe na acängganang mo'do känggi kamen ngakä Kaläggkang. 9 Ndä aläpedäng tanggo ka

zoga biskodagägo na bangä tangandägkă walangic, ndey edekeny asänggägo kalaye päloccung, ndey säbogkasa anggo tä pang Kalägi tiyating.

¹⁰ “Käxa mägaxse bow tä päxä 'doga bälaxang, mändey mägaxse bow tä wegka mangeccä, yä käxa mägaxse jul sogo raj tä päxä 'doga bälaxang, mändey sogo mänang tä wegka mangeccä. ¹¹ Känox gang mägaxsägi bow tä menekä tangandägkă walangic songang, zogowa key mägaxsägi laye bow tä tangandäg tä pang Kalägi tiyating? ¹² Ndä känox mägaxsägi bow tä menekä wegkă käxa caka songang, xänang togodung känggi täging? ¹³ Me wexetandäng päx wexecce ta bazuwecciny pädax song, xa nyäsogo 'do paye nuxung paccey yä saxe nuxung. Mändey nuxus nyäsog gigili nuxung yä ndäridäswa tä nuxung. Kigkandäng dacada wexe ngakä Kaläg na ngakä male song.”

Yasuwa Kalegeyze ta Farisiny

¹⁴ Farisinygi paye ngakä male pacceyang kädäng ngaki Yasuwa kalegey kă'dayang, na sagug ma näs anyad. ¹⁵ Neng Yasuwa ngade täsa ka, “Anggo läpedeng ngastänggägo tagä kăn ka anggo mpoc-cang na'do yä dara Kaläg yex ngakä mäganygägo.

Wegkägogi ngoxodänang nang tagä kăn na tä warä känang, tas tagä Kaläg.

¹⁶ “Asiriyenä Musa na sorunu menggä logey kawexse tä loydägkă ow basa Yoxana me Pac kawung. Ndä kala yaxsäwecci apo lege ngakä bugundugku Kalägang duwaleywa ndä kala kăn kă'day kasägkesäno ndey ka lăs bugundugku Kaläg. ¹⁷ Zäkoxa na täzäg way winy 'diti päxä munu jengicca sacarasa ta asiriyenä Kaläg ka werwa.

¹⁸ “Käxa kasax uxe ndä 'doc bag uxa cakang, kasog ramic, ndä käxa kabag uxa yoxe kasaxang, ramacca.”

Yasuwa Kälegä Ngakä Apangza Kadangandey na Apangza Wiywa

¹⁹ Yasuwa ngade ka, “Apangandäng kadan-gandey ndä lagewa na tanduga dulatulajeccä ndä todotol siye siyaka apoccu.

²⁰ Ndä apangandäng säbangäs Liyasir wane bägälic käpoposu wun-odung sängo tä akäsogaldä pang nyapangzi kadan-gandeyang, ²¹ paye ka 'dox enggä siyaki teldeccä tä tumunu siyakämang ndey ka si. Ndä isu wunosung laxte wanämani käpoposung.

²² “Na kala ani Liyasir käxsäsang, malayikada kabag ma kagoyas ma tä owdi Apraxim tängang. Na apangzi kadangandeyang mändey käxsä na sabosu.

23 Na mägä'doc tä mas na mägäsa tiyati moxada Apraxim täxande na Liyasir kacca tä wane käsac. 24 Na mabandäsa ka, 'Wawa Apraxim, wanga agägi wayesäng tagä, lapi ta Liyasir ka mä'doc mäluji päxä andäma tä ma mäwung mädälbes tä nyiparang xa agänanganang tä cäläxtäg tä mas.' 25 Na Apraxim kabuc täma ka, 'Atä, bäli ka tä cuku gi täzäg kä'dox wegkä apoccu kä'day yä Liyasir ka'dox wegka apoccu song, tabewa winy. Neng gang ma mägäluki buduldug yä gi käwalas tabi. 26 Ndä tä ngakong kä'dayakang, salu ow tägog tä pidi ndey ka kängga paye ca'dsa wuno tanggo tä owdiyang, wunosung song na kängga tanggo tä owdi paye wuno täwas tä owdongang, cogo owduskonong song.'

27 "Na sax mändey apangzi kadangandeyang ngade ta Apraxim ka, 'Wawa, ampaye gi ka yaxsa Liyasir tä menggä panäsko täzäg 28 xa enggä bongguskotäng kawangasa mädäg ndey Liyasir 'doc daxä sa ndey säccagä exenggäsa ndakä sädelese tä mas ka'das agä.' 29 Neng Apraxim ngade täma ka, 'Asiriyenä Musandäng na sorunu menggä logey wanga sa sädäng ngaki legeng.' 30 Na apangzi kadangandeyang ngade ka, 'A, wawa Apraxim,

basa nuxung käxa käxsä kangäsa tä xäs kä'doc kaläpe ngakong täsang, säxajecä säwange ngaka tasiny.' 31 Neng Apraxim kämeley täma ka, 'Känox sägädäng ngakä me logey Musa na menggä logeygi nasa songang, kax kig äxsä ndä ngäsa 'doc läpe nga täsa na sädänge säxong.' "

17

*Yasuwa Käbäldey
Menggä Räbke*

1 Yasuwa ngade tä menggä räbke ka, "Bäli ka ngatatäng wunosung gawadas anggo tä ngaka tasiny! Ndä woyoy tä känggi 'docco sogongang! 2 Ndä käxi kädäppa ka 'doco sogong, saxsa ngay-iccä ngorey tä ngase ndä sägawa nang tä colonggo 'diti togku känggong mäganyga bowinyang tä sogku ngaka tasiny. 3 Meskäde ngastänggägo. Känoxang päxä bonggo sogo ngaka tasinyang, duxi ndä mägäxajä mawang ngaka tasinyang, zaxi täma. 4 Kax mäso ngaka tasiny tägi taxä paxtänding tä xongonda nuxung ndä mämeley ngasäma mäwung tägi taxä paxtänding mangad ka, 'Agä kaxajä tä sogku ngaka tasinyang,' saxi täma."

5 Na känggi Yasuwa käligäng ngadeccä täma Bazuwec Yasuwa ka, "Posa menekä ngakä Kaläg täwas!" 6 Na Bazuwec kabuc ka, "Kä'dang menekä ngakä

Kaläg tanggo biyey kala päxä yugicca biyeyang, kax läpeng tä etong ngoteyang ka zuduwa na mäske 'doc udusawa tä kaxsä colonggo, na dänge ngakägo.

⁷ “Päx nuxung accägondäng cäläxse päkädäng pelow na cong näs megäskä sagunuwang na läpede tänya cäläxseneni ka, ‘Bo icca siysi?’ ⁸ A'a, wadi gi bazuwec noco läpede ta cäläxsägi ka, “Dayawa, wexe siyad ndey dogung siyad tagä accäg asiya na awuxsi ndä kala gang gi ziyza na wuxsi.’ ⁹ Bazuwec logo cäläxse xa ka kasog ngaki maläpe tängang song, päx mälogo täng? ¹⁰ Anggo mändey käwexeng wexeki agä kaläpäng tanggo ka wexengang, kax wexeng na nocang ngadaccang ka, ‘Was anäsig cäläxinyga täbangä wexeki wexedäningang nenyang kandäppig däädäxti song.’”

Yasuwa Kädäxä Menggä Omoda Asiny

¹¹ Ani Yasuwa kä'docus tä Ursalimang, mägalang pidänä Samriya na Calil. ¹² Mägä'doc ngäte tä päxä cabär, na apanginyatäng layis menggä omoda asiny käpasasa täma na kadenggeze täxande, ¹³ kädawasa ngadeccä ka, “Yasuwa, Bazuwec, wanga agägi wayesäng täwas.” ¹⁴ Mägäxo sa na mälapede täsa ka, “Wesi pari ngastänggägo ta menggä

tämed tä Kaläg ndey säduwaley ka wadäkägo kalaye apoccu.” Na kala säwedetese na sa'doxung wadäkäsa kädäxäno salaye säpoccu.

¹⁵ Na nuxung accäsa kox wane kalay apo na kämel dawe däädäxti Kaläg. ¹⁶ Kä'doc kädukurusa tagä Yasuwa logo Kaläg, ndä ma 'doxti me Samriyang. ¹⁷ Na Yasuwa ngade täma ka, “Kädäxä anggo näsang asiny song? Kulung kanggi paye nuxungang sati? ¹⁸ Basa me pungudongang tol kämel kawung kädädäxti Kaläg tä ngakä däxkeneng?” ¹⁹ Na tänya owdi Yasuwa läpede tä nya me Samriyani ka, “Ngäsa wede xa menekä ngakägi tagä kädäxä gi.”

Bugundugku Kaläg Wunosung

²⁰ Xongonendäng kulung Farisiny kamän Yasuwa ka, “Xongonda keyang bugundugku Kaläg wunosung tängang?” Na Yasuwa kabuc ka, “Bugundugku Kaläg wunosung na bolu de oxowa song. ²¹ Oxowa ndey ka anggo ngadang ka, ‘Nyanang!’ na, ‘Nyani!’ song. Bugundugku Kalägkatäng nanggo kala.”

Päxä Käxa Jul Wunodung

²² Yasuwa ngade tä menggä räbke ka, “Owandäng wunodung ndä anggo nocang mpadang ka zang cukang, agä Päxä Käxa Jul tä butug, ndä zadang säxong. ²³ Ndä kän ngadeccä tanggo

ka, 'Lala, mani todil!' na cong ka, 'Lala, manang todong!' Ndä ndakä ndängeng ngakäsa. ²⁴ Xa agä, Pächä Käxa Jul, xongondeneni awunodung kala wuxekä koxana banye tiyati na ota kä'day.

²⁵ "Ndä täzäläg basa agä anyäläxtiwa tä weg mange na mändey menggä zong pexkä agä. ²⁶ Ka'das wexeki kän kawex tä xongondu 'doxti säbangäs Noxang, mändey kän wexe sawex-eki basa xongondi agä, Pächä Käxa Jul awunodung tängang. ²⁷ Kän siyacca na wuxicci na batacca na sädere bal koxasa xongondi Nox kaläsa kaxsä dämpejigseneng. Na faya kawung kapax kän kä'day.

²⁸ "Winy ka'das ani tä xongondu 'doxti säbangäs Lotang, kän siyacca, wuxicci, nganyacca ndä nganyatasa, ndä zäbecce na tonyacca, ²⁹ neng xongondi Lod kawetäs tä kaxsä pana säbangäs Sudumang, Kaläg kayaxsä mas na nganyuga kusuccu kaduny kän bägälic. ³⁰ Ndä kän wexe nya bangongang, mändey laye kala xongondi agä, Pächä Käxa Jul aweyete-sawa tängang. ³¹ Ndä tänya xongondi, käxi täzä ax yä wegke tä axang, ndakä coccolezä ndey ka bag wegke song na mändey känggi tä pelowang ndakä mele tä pa song. ³² Gärning ngaki

kasoguno tä uxu Lotang!*

³³ "Käxa paye ka meske rongicce täzägang wadi mesede yä käxa meske rongicce täzäg songang 'doxo aygä liliy. ³⁴ Aläpedäng tanggo ka ongudeneni kän tugu salany pädapädax, ndä Kaläg bate nuxu yä nuxu laye. ³⁵⁻³⁶ Mändey uxu pädax tugu ngoreygä kuny tä ngayicca nuxu, ndä nuxu ux säbate yä nuxu laye."

³⁷ Na kala menggä räb kamän Yasuwa ka, "Tä owda key, Bazuwec?" Na mabuc täsa ka, "Owda wininy kädurisäno tängang, bäli ka wegka käxsetäng täng."

18

Yasuwa Kälegä Sersedäniccä Mandur na Buguning

¹ Yasuwa kaser nga tä menggä räbke ka palacca todotol ndakä cananga. ² Mängade ka, "Buguningandäng tä nuxu bo pandäng nyigate Kaläg song ndä nyaye kän song. ³ Ndä mändey mandurandäng tänya bo pani wunodung melde täma läpede täma ka, 'Bo geye was na me kurang ndey ndäppoy was.' ⁴ Täzälägäne buguning kalewa, neng magärtä ngaki mandur melde tängang, na mängade tä ngasäma ka, 'Agä anyigate Kaläg song ndä anyaye kän song, ⁵ ndä mandursong nyanang gang nyalange agä todotol, bal

* **17:32** Uxu Lod kaweräswa sudu enggäloke xa cägaw zäce calala Sudum cäsaxe 'doc wangesänake.

anoc agey ta me kure xa cämelde tagä cäwange agä anungu song.’”

6 Na Yasuwa ngade ka, “Ndänge sele ngakä buguningza däppo kän song! 7 Yä päx nya Kaläg nyädäppo känggänyagi nyalebäng ngeyeccä tänya säxe na ongutang song? Yä päx Kaläg waxe posakä kän? 8 Aläpedäng tanggo ka Kaläg däppo kängge tetex, yä tä wunakang agä, Päxä Käxa Jul, päx awunodung a'doxodung menekä ngakä Kaläg täzäg?”

Yasuwa Kaser Ngakä Farisic na me Yawgä Tuluba

9 Mändey Yasuwa kaser seredäniccong ta kulung känggi kabogkasa ngastängga ka yex ngaki wexeng ndä laleyis kän kängga winyang ka, 10 “Apanginyatäng pädax käd'occo taxä tämed tä paley, nuxung Farisicang yä ani nuxungang me yawgä tulubang.

11 “Na Farisic kangäsa tiyati kapaleza ngade ka, ‘Kaläg, alogo gi xa agänangang kala kulung kän song, kala menggä celdug song, na kala menggä ngananganegä nga song, na kala menggä ramiccu song, ndä agäng kala me yawgä tulubanani song. 12 Tä sängga paxtinding, agä amene uxkud tä sängga pädax ndä aluwu asiny tä wegkänggi a'doxo udiny

mädäggang (100) adogodung tägi.’

13 “Yä me yawgä tuluba kädokol täxande ndä gunusawa na zänggä mayad ngade ka, ‘Kaläg, wanga agägi wayesäng tagä, xa kasog ngaka tasiny!’

14 “Aläpedäng tanggo ka kala tä 'dockäsa tä pa, Kaläg kagixi me yawgä tuluba xa mägaxse bow, yä Farisic, Kaläg kagixi song. Käxa poko ngaseneng, Kaläg maye ze yä käxa coccolo ngaseneng, Kaläg pokada tiyati.”

Yasuwa na Enggä Pipu

15 Xongonendäng kän kagoying engga ta Yasuwa ndey ka mäpes. Neng menggä räb kox mänang, na sadux kän ka dokalas koyinakä pipu. 16 Neng Yasuwa kabandä pipu ka, “Wanga pipu wuno tagä, ndakä zekeng sa xa känggi 'dase pipugongang bugundugku Kaläg kănanag. 17 Aläpedäng zänggä nga tanggo ka, käxa käpay bugundugku Kaläg kala päxä pipi songang, Kaläg kixidi tä bugundugke song.”

Apangza Kadangandey

18 Xongonendäng bazuweccä Yaxudinyandäng kamän Yasuwa ka, “Me bälidic, gi mpoyo na'do, asogowa key ndey a'dox aygä liliyang?” 19 Na Yasuwa kabuc täma ka, “Oxadi kasog gi bangäs agä käxa apong? Käxa apondäng

song, basa Kaläg nuxundugke. ²⁰ Anggo yexeng täsedänic ngade ka, 'Acaka rameyza, acaka paxsa, acaka pälze, acaka lege celdug, nyaya menggo na bonggo.'"

²¹ Na nya bazuweccä Yaxudinyi kabuc ka, "Cawu biyeydäggang agändäng awexe ngakong bägälic."

²² Yasuwa kädäng mänang, na lapada täma ka, " 'Dogkandäng nuxung musku käsog song. Nganyi wegki täging kä'day larti tä känggi widunong ndey dangandey tä pang Kaläg tiyati. Ndä bag bangang."

²³ Ani 'doxti kädängäs ngaki Yasuwa kalegey mänangang, mägaxse ka'dexwa xa madangandey nano.

²⁴ Yasuwa kox mänang na ngade ka, "Bede paccey tä käxa kadangandey ndey ka läs bugundugku Kaläg!"

²⁵ Tireneng ka kamalä läso axä wuladä 'diti käxa kadangandey tä läsakä bugundugku Kaläg."

²⁶ Na känggi kädängang ngadeccä ka, "Neng gang mänangang xänang seley xonyo ngaseneng?" ²⁷ Na Yasuwa kabuc ka, "Käxa seley xonyo ngasenendäng song, basa Kaläggang tol xonyacang."

²⁸ Na Putros ngade ka, "Lala, kawangesänig wegkäsö kä'day ndey ka abagig banggi!"

²⁹ Na Yasuwa ngade täsa ka, "Aläpedäng zänggä nga tanggo ka, käxa tanggo

kawangasa pane na uxe na enggä bongga na mena na bona na pengge ndey ka wex ngakä Kaläggang, ³⁰ nyäposo täng mange mo'do aki kalayeng tä jendong na ur'dug tä 'doxakä aygä liliy."

Yasuwa Kanimäng Xäske

³¹ Yasuwa kabag känggenegi käligä asiny wang pädaxang, kä'doc nang tä cengic na mäläpede täsa ka, "Kala lala, 'doccig tä Ursalim, ndä ngaki kä'day menggä logey gärekärejesa tä ngakä agä Pächä Käxa Julang, 'docco 'desetäsäning tä owdi. ³² Kän 'docco menedes agä ta asänggä känggi näs Yaxudiny songang, sä'docco sängobo agä, säcäläxti agä ndä säpädadas agä. ³³ Sä'docco säbade agä na ke'diccä oxay, säpaxe agä ndä asängo pädax na tä sängädi kodosang angäsata tä xäs."

³⁴ Neng känggi mägäligä asiny wang pädaxang, kabäle bangä ngakämagi song, xa legeygi malegeyang kacungguli sa. Sabäle bangä ngaki Yasuwa lege täsang song.

Yasuwa Kalenge Agä Ngojox

³⁵ Ani Yasuwa kawunäs ngäte ta Arixang, apan-gandäng näs ngojox kächä tä nyixtä akäsog nyäxacca. ³⁶ Na mägädäng tädäxä kän na mamänze ka, "Oxadi kiyang kasiwang?" ³⁷ Na säläpede täma ka, "Yasuwa

me Nasra nyang wedeng.”
³⁸ Na kala mabandäsa ka,
 “Yasuwa, päxä pe Dawud,
 ata agägi wayesäng tagä!”
³⁹ Na känggi kädoleyza
 kadux ma ka mäpäla neng
 mägädawa paccey ka,
 “Päxä pe Dawud, ata agägi
 wayesäng tagä.”

⁴⁰ Na kala Yasuwa
 kädokala läpede ka
 sägozung ngojox täma
 ngäte. Sagoyung ma ngäte
 na Yasuwa kamän ma ka,
⁴¹ “Oxadiyang mpaye agä
 asog täging?” Na mabuc
 ta Yasuwa ka, “Bazuwec,
 soga agä azayza mändey.”
⁴² Na Yasuwa ngade täma ka,
 “Laleyzi, menekä ngakägi
 tagä kaxony gi.”
⁴³ Na tetex agäma kalengesuno
 na mabag bangä Yasuwa,
 mädädäxti Kaläg. Kän
 kä'day kox mänang, na
 kädädäxti Kaläg mändey.

19

Yasuwa na Zaka

¹ Yasuwa kadus bo pana
 säbangäs Arixä. ² Ndä
 apangandäng tänya owdi
 säbangäs Zaka näs ngotor-
 ponu menggä yawgä tulbada
 kadangandey. ³ Mäpaye
 ka mälaley Yasuwa neng
 mädäläng tä warä xä'dä ka-
 sog ma moxo Yasuwa song.
⁴ Na mägoy tetex mapäcca
 mägä'doc ma'deg zä balasu
 ndey ka mox Yasuwa, xa
 Yasuwa 'doco lange nya sogi.

⁵ Ani Yasuwa kăcogus
 owdumaniyang, koxas ma
 tiyati täzä ed na ngade täma
 ka, “Zaka, coccoleyzi tetex

bo xa xongondong 'doccig
 cuccig tä panägi.” ⁶ Na tetex
 Zaka kacoccoleza kä'doc
 kabokasa Yasuwa tä pane na
 led.

⁷ Kän kä'day kox mänang
 na kangunungunizi ka Ya-
 suwa kä'doc kalayis palan-
 gasiccä käxa sogo ngaka
 tasiny. ⁸ Neng Zaka kangäsa
 ngade ta Bazuwec ka, “Lala,
 Bazuwec, agä alare wegkang
 tä pidi adogada kulung tä
 menggä wiy, na mändey ka-
 sog käläkäläjtäg tä wegkä
 nuxu kigkang amelede 'dogi
 payeng täng taxä tesped!”

⁹ Na Yasuwa ngade täma
 ka, “Xongondong Kaläg kax-
 ony panong, xa Zaka tirä
 päxä pe Apraximang! ¹⁰ Xa
 agä, Päxä Käxa Jul kawung
 tä nyam na tä xonyakä
 kängga kämese.”

Yasuwa Kaser Ngakä Bu- guning na Cäläxinyge Asiny

¹¹ Ani xä'dä deldeyäs
 wungga tä legeygä Ya-
 suwang, mawung ngäte
 tä Ursalim, ndä kän oxo
 ka bugundugku Kaläg
 kala wunosung kăccogus.
 Na todi maser nga täsa.
¹² Mängade ka, “Päxä pe
 buguningandäng kä'doc tä
 walangicca täxande ndey
 ka sädoga butug täng ndä
 mel. ¹³ Na kala ka mä'doco
 na mabandä cäläxinygäma
 asiny mägälarta ariyaliny
 täng asiny ka dăseydä basa
 mämél măwung.

¹⁴ “Neng känggäma paye
 ngakäma song na sayaxsa
 menggä yaxsäwiny ka läpe
 ka, ‘Ampayedig 'doxtong

layis buguningzäsko song.’
 15 Ani mägä'docus sado-
 ganäs butug täma ndä
 mämeläsang, mabandä
 cäläxinygämagi madoga
 ariyaliny täng ndey ka
 däseydäng. Mäpaye
 mabäle wegki sa'dox tä
 zängganang.

16 “Cäläxsi täzäläggang
 kapäcca täma ngade
 ka, ‘Bazuwec, ariyalicci
 kädogung tagä nuxungang,
 kawexä ka'dox täze asiny.’
 17 Na buguning ngade täma
 ka, ‘Käwexä apo, gi näs
 cäläxsa apo! Xa mägaxsägi
 bow tä päxä 'doga bälax,
 asogus gi ngotorpo mene
 kaxsänggä padäg asiny.’

18 “Na mändey pädaxeneni
 kawung ngade täma
 ka, ‘Bazuwec, ariyalicci
 kädogungang kawexä
 ka'dox täze mädäg.’
 19 Na buguning ngade täma ka,
 ‘Gi noco mene kaxsänggä
 padäg mädäg.’

20 “Na kodoseneni kawung
 täma ngade ka, ‘Bazuwec,
 ariyalicci kädogung tagäng
 nyanang kamulungiy na
 päxä nyonggo kayokas.
 21 Xa anyigate gi xa ayex gi ka
 näs apangza mägaxse täbag
 na'do. Ndä gi bate maleni
 layis nänggi kä'dangas
 songang ndä jede wegki
 käzäbä songang.’
 22 Na buguning ngade täma ka,
 ‘Agänang amene gi tä
 legeygä ikägi, gi näs cäläxsa
 kadawustey! Yex ka agä
 anäs buguningza mägaxse
 täbag abate maleni layis

nänggä kä'dangas songang,
 na ajede wegki käzäbä
 songang? 23 Neng wi siye gi
 kä'danga ariyaliccang tä axä
 owdu däsey ndey koyung ze
 songang?”

24 “Na buguning ngade
 tä menggä wexekenegi
 dokoloccung ka, ‘Gujuyning
 ariyalicci tämang tunyu dogi
 tä cäläxsong käne asinyang.’

25 Neng sängadeccä täma
 ka, ‘Bazuwec, noxo ma
 ariyalinygämatäng asiny!’

26 Na buguning ngade ka,
 ‘Aläpedäng tanggo ka käxi
 kädäsey wegkeneng aposo
 täng, yä käxi kädäsey
 käne songang, agujudung
 täng tunyu. 27 Wadi gang
 menggä kuranggong paye ka
 alayis buguningza songang,
 goyining sa tagang todong
 dämde ngastänggä sa!’ ”

*Ndetelegunu Läsakä Ya-
 suwa tä Ursalim*

28 Ani Yasuwa kä'desenäs
 seredäniccongong, mawetäde
 tiyati tä Ursalim. 29 Kala
 mägä'doc ngäte tä enggä
 cabärtaga säbangäs Faci
 na Petani tä Cabärä Za-
 yitun, na mägäpäcca
 menggä räbkäma pädax.
 30 Mäläpede täsa ka, “Wesi
 tä päxä cabäri taggägong.
 Känoccang käläsangang,
 'doxidang päxä kaccäna
 taxä nuxung kig kasana
 täze song kaxsasawa todä.
 Nyuli goyining tagä todong.
 31 Kä'doxang käxa kamän
 anggo ka, ‘Wi siye anggo
 nyuliding kaccängang?’
 Läpi täng ka, ‘Bazuwec
 paye.’ ”

³² Na sa känggi mayaxsa kapäccasang ka'doxa sangaki maläpe täsang.
³³ Säga'docco säludi päxä kaccä na letuge mäne sa ka, "Nyuliding kaccänong koyadang ti?"
³⁴ Na sabuc täsa ka, "Bazuwec paye."
³⁵ Na kala sagoya päxä kaccä ta Yasuwa sapetäde tandugusa tä onge ndä Yasuwa 'deg.

³⁶ Masana täze na kän kapetädesa tanduga tä akäsog ndey dädäxti ma tä laxänakäma.
³⁷ Kala mawung käsac tä akäsogi coccolacca päkädäng Cabärä Zayitunang, na menggä räbkäma kä'day daweccä lededäning dädäxti Kaläg tä wexeki Kaläg kawex sägoxang.
³⁸ Sängadeccä ka, "Baxändäg tä buguningzi Bazuwec Kaläg yaxsedängang! Modeyatäng tä pang Kaläg tiyati na dädäxtiy tä Kaläg!"

³⁹ Neng kulung Farisinyatäng tä warä xä'dä ngadeccä täma ka, "Me bälidic, daxa menggä räbkägi ka säpälasa."
⁴⁰ Na Yasuwa kämeley täsa ka, "Aläpedäng tanggo ka kax säpälasa na nganyugong dawatasä dädäxti agä!"

Yasuwa Age Kawayasa tä Ursalim

⁴¹ Ani Yasuwa kawunäs ngäte koxus Ursalimang, mangedä tä ngake,
⁴² mängade ka, "Anggo menggä Ursalim, kämeseng xa xongondong kábäleng

ngaki koyodung modey tanggong song, neng gang kala mändey noxadang 'dogi koyodung modey tanggo song.
⁴³ Tä sänggi wunosunong menggä kurugo kakaradas anggo tä kaxsä cabär tä cende kä'day ndä räbadas anggo.
⁴⁴ Säwasadas anggo käked, anggo na penggägo säwange nuxu accägo tä kaxsä Ursalim song, ndä kax ngayicca säwange täzä wayanandäng song. Ngakong sogoduno xa anggo käjenggereng na kábäleng ka Kaläg kawung tanggo song."

Yasuwa Käyegeley Kän Taxä Tämed tä Kaläg

⁴⁵ Yasuwa kaläs kal taxä tämed tä Kaläg mägä'doc mamagäng menggä nganyad tunyu,
⁴⁶ mängade täsa ka, "Gärekärejesawa tä Sorunu Kaläg ka, 'Panang, pang paleyang,' yä anggo käsogasang axä menggä bärada!"

⁴⁷ Yasuwa bäldecce todotol tä kaxsä kaldagä axä tämed tä Kaläg. Ndä bazuwinygä tämed tä Kaläg na menggä lelericcä asiriyenä Musa na kulung ngotorpugä Yaxudiny nyame rajsa ndey ka paxäs Yasuwa,
⁴⁸ neng sa'dox rakawza ndey säpaxäs ma song, xa kän kä'day kagur ma delde wungga tä ngaki mälegeng.

20

Bugundugku Yasuwa

1 Xongenendäng Yasuwa bälde kân tä kaxsä kaldä axä tämed tä Kaläg na mäduwale yaxsäwecci apo lege ngakä Kaläg tä kânang. Na bazuwinygä menggä tämed na menggä lelericcä asiriyenä Musa na ngondowinygä Yaxudiny kawuno täma² ngadeccä täma ka, “Lapäng, xänang kä'dakas gi ka wexseng? Xänang kadong butug tägi ka wexseng?”³ Neng Yasuwa kämeley täsa ka, “Amäne anggo mäned ndä anggo buci tagä.⁴ Kaläggkang kä'daka Yoxana ka pacä kânang, wala kânag kä'dakas ma ka mäpacsang?”

5 Na sacengesuno tä cengic sabodsa watäkäsa sängadeccä ka, “Kax 'doccig ngadig ka, ‘Näs Kaläg’ na mä'do mängade ka, ‘Wi siye anggo kämeneng ngakä ma Yoxana songang?’⁶ Ndä mändey kä'doccig kängadig ka, ‘Näs kânang,’ kân kä'day 'däme kog na nganyu, xa kân oxo ka Yoxana me logeyang.”

7 Na sägä'docco sabuc ta Yasuwa ka säyex käxa kä'dakas Yoxana ka pacsa song.⁸ Na Yasuwa ngade täsa ka, “Neng aläpedäng käxi kä'dakas butug tagä ka awexse nangang song.”

Seredäniccä Kängga Samene Zäg Täng

9 Yasuwa kaser legey tä kân ka, “Apangandäng käsäbä pelowge, ndä menes

tä menggä pelowatäng ndey meskädä yä kä'doc tä wedäg kalaygädä.¹⁰ Kala weg kiye de säjede na mayaxsas cäläxsäma ka 'doc täsa menggä pelowgi mamene zäg tängang, ndey ka larä weg toga käma. Neng sa menggä pelowgi mamene zäg tängang käbadä cäläxsäma ndä matas täma na asängge päloccu mänang.¹¹ Sax mändey mägälasä mayaxsa nuxu cäläx. Na mändey salandä ndä säbadä ndä sämatas täma na asängge päloccu.¹² Sax mändey mayaxsa kodoseneni. Ani kala sägäbadä sägämexestey ndä säмага tunyu.

13 “Na ledä pelow ngade tä ngase ka, ‘Oxadi asog gangang? Basa yaxsas tirä päxä penenggong ampaye ngake pacceyang nuxus sä'doc sänyay ma.’¹⁴ Ani känggi samene zäg täng koxäs nya penämaniyang, sägaxsäning sängadeccä ka, “Doxtongang luguccing, nycugo apaxa ndey lugig pelowge!”¹⁵ Na tetex samene ma sabokung ma tunyu tä kaxsänggä pelow sägä'docco sapax ma.” Na Yasuwa kamän sa ka, “Ledä pelowgi kamenes pelow täsang sogo sa key?¹⁶ Ma mäwunodung mäpaxe känggi mamenes pelow tängang yä mädogada tä kängga cakuny.”

Na kala kân kädäng ngakong na ngadeccä ka, “Nyäzekä ngakong ndakä

soguning mänang!”¹⁷ Neng Yasuwa kalaley sa kätteg na ngade täsa ka, “Ngaki garekärejesuno tä Sorunu Kaläggang ngadeccä ka wi? Ngadeccä ka, ‘Ngayicci menggä tonyad kápexkäng kalayis ngayiccä saluweccä kadasuweccä ax.’”¹⁸ Ndä käxa kadel täzä nya ngayicciyang, nyäroborobogo yä käxa nyadeles zeneng, nyäregerereje.”

¹⁹ Na tänya axä owdi menggä lelericcä asiriyenä Musa na bazuwinyä axä tämed tä Kaläg paye ka men ma xa sabäle ka maser ngaki täsa, neng sänyigate kän.

Yawgä Tuluba ta Kaysar

²⁰ Ngotorpodagä Yaxudiny jenggere Yasuwa käsac ndey ka sä'dox rakawza sämenäs ma na sayaxsas menggä raj ka 'docco paxesäning käräp sogosuning kängga apoccu. Säpaye ka sädäng legey tä ikäma ndey sämenenäs ma tä andä buguningzä Romaniny.²¹ Na menggä raj ngadeccä täma ka, “Me baldic, wa ayexig gi ka nycofu'dono legey ndä bälde zänggä nga tä ngakä Kaläg. Ndä päx gele kän song.”²² Gang kädäppa ka wa yawwig tuluba adogig ta Kaysar wala awangig toke?”

²³ Neng Yasuwa kabäle rajsi tä mäganygäsang na mängade täsa ka,²⁴ “Doguning dinarsä Romaniny tagä. Läpäning ligidä xänang na agä

xänang garekärejesuno tä ongeneng?” Na sängadeccä täma ka, “Näkä Kaysarang.”

²⁵ Na Yasuwa ngade täsa ka, “Dogi wegki layis gäkä Kaysarang ta Kaysar, na aki layis käkä Kaläggang dogi tä Kaläg.”²⁶ Na tänya owdi sägädongasa tä ngaki malegeyang na sa'dox rakawza ndey sämenäs ma tagä kän song, na sägämolosuno.

Batad na Ngäsad tä Xäs

²⁷ Kulung menggä Yaxudinygi säbangäs Saduginy, ngadeccä ka kig äxse ngäsata tä xäs songang, kawuno ta Yasuwa.

²⁸ Sängadeccä täma ka, “Me baldic, me logey Musa garekärejesa nga täwas ka apangza päxä bona kabagsa ndä äxsä yä kiyäng pipu songang, päxä bona bag nya mandursi ndey iyäng pipu tänya päxä bonanani käxsäng.”²⁹ Ndä enggä bonyatäng paxtinding. Päxä bonanani täzäläggang kabagsa ndä käxsä kawan-gasa uxe kiyäng pipu täng song.

³⁰ Ndä ani täbangeneng kasog mänang.³¹ Kodoseneni kasog mänang. Sägädoneydä batakä ce uxi ndä sägäxse na'anggäsa paxtinding sägiyäng pipu song.³² Na ce täzäce cägäxse tä bangäsa.

³³ Gang mänangang, xänang täsa 'do layis yoxuce tä xongondu ngäsad tä

* **20:17** Yasuwa bangäs ngase ngayiccä saluweccä ax.

xäsang, ndä na'anggäsa sägädoneydä batakä ceng?"

³⁴ Na kala Yasuwa ngade täsa ka, "Menggä zong batacca na säbate.

³⁵ Xa känggi lelexiny, ur'dug ngäsotäsäng tä xäs tä xongondu ngäsad tä xäsang, batacca na säbate song.

³⁶ Ndä sa mändey säxseccä song xa kala sa'das malayikada. Säs enggä

Kaläg, xa sänguso sa tä xäs.

³⁷ Mändey me logey Musa kabäle ka kaxa käxsä ngäsata tä xäs. Ka'das ani gärekärejesawa tä Sorunu Kaläg tä ngakä masi kagusi ta Musa tä kaxsetang, ani mabandäs Kaläg ka Kalägä Apraxim, Kalägä Isxag na ka Kalägä Yaxubang.†

³⁸ Kaläg Bazuweccä kängga oxaccang, päx näkä kängga käxseng song. Xa kän ka'day ayeccä tänya."

³⁹ Na kala kulung menggä lelericcä asiriyenä Musa kabuc tä ma ka, "Me bälidic, gi kälegeyze apo na'do!" ⁴⁰ Na todi sanyigatas mänekä ma.

Mäneki Padäginy Yasuwa Kamänäs Kän tä Ngakä Almasiyang

⁴¹ Neng mängade täsa ka, "Oxadi siye sa sängadeccä ka Almasi näs päxä pe Dawutang? ⁴² Dawud täze ngade tä Sorunu Masmur ka, 'Bazuwec Kaläg kangad ta

Bazuweccang ka, "Bo icca tä cengiccä andä abaniccang,

⁴³ bal asog gi nyebesa menggä kurugi täzäg."

⁴⁴ "Dawud bangäs ma 'Bazuwec,' yä mälayis päxä pene key?"

Yasuwa Kädaxä Menggä Räbke ka Wang Poporey

⁴⁵ Ani kän ka'day deldeyäs wungga ta Yasuwang, Yasuwa ngade tä menggä räbke ka,

⁴⁶ "Meskädäning ta menggä lelericcä asiriyenä Musa. Xa säpaye lagkä tanduga apoccu säwalangeccä nang ndä säma'dite modey tä owtagä nganyatada na säpaye cad tä owtagä dädäxti tä axinygä palic-cinygä Yaxudiny na owtagi sänyaye ngotoropu täng tä siyatang. ⁴⁷ Yä sägäläkäläji wegkä manduriny ndä sädertesäno säpalacca mäna'ang. Känggi kala akakiyang, sag seley Kaläg 'doco cäläxti ta'asang."

21

Mandur Kadägesese

¹ Yasuwa jenggeracce tä axä tämed tä Kaläg na kox känggi kadangan-deng gawdadas wegkanagi kabegse nangang tä kaxsä cokonu yawgä weg tä Kaläg. ² Na mändey mägox mandursa wiwandäng gawa enggä ariyaliny pädax tä kaxsä nya cokoni. ³ Na mängade ka, "Aläpedäng zänggä nga tanggo, lala

† 20:37 Kaläg kalegeyze ta me logey Musa tä kaxseti mas kangäsa täng ndä siye kaxsed songang.

päxä me wiygong näs manduranang nyang gawa wegke kamo'du kân kä'dayang. ⁴ Xa känggong kä'day kabegsekan kabag weg tä zänggä wegkä tangandäka ndä toga, yä ce satäng täce kätogo'dog song yä cabag kä'day cadoga tä Kaläg."

Bolugi Läpedäng Sanydä Owang

⁵ Xongenendäng kânätäng legece tä ngakä axä tämed tä Kaläg, tä wegki kabastäning na nganyugi wuxeccä täwang axang na wegkä beged, na Yasuwa ngade täsa ka, ⁶ "Gang anggo nycuccang jenggeredeng wegkong xa owandäng wunodung kax ngayicca tenggelece täzä wayanandäng song, säcobatasa täzäg kä'day!"

⁷ Na samän Yasuwa ka, "Me bälidic, sangakong bägälic kälegeyang sogoduno ogey? Na oxadiyang layis boluge läpedäng ka ngakong sogoduningang?"

⁸ Na mängade täsa ka, "Meskädäning xa acaka sänanangey anggo xa kulung kânätäng mange wunosung nanange anggo nagang, ngadeccä ka, 'Agänang anäs Almasiyang,' ndä kala, 'Sanydä ow kawung.' Acaka anggo ndängeng ngakäsa!"

⁹ Ndä kändängeng pogud na keley na kamatanang, ndakä nyigatäg men anggo. Xa basa ngakong wuno kayesäno täzälägäne tä

loydäggä ow. Ndä sanydä ow wunodung tetex song."

Cäläxtigä Menggä Räbkä Yasuwa

¹⁰ Yasuwa ngade ka, "Pogud ngäsata tä cabärta, ndä buguninginy pogo ngastänga. ¹¹ Ndä mändey wäxäd na buxu na täxäd wunosung 'da'de ota mange ndä nyigatäg mene kân na mändey tädäxtäg na bolu päkätäsäng tiyati.

¹² "Ndey ka ngakong kä'day sogoduno, sä'docco täzälägäne sämen anggo säcäläxti anggo na sämenedes anggo tä asänggä menggä axä paliccä Yaxudiny na särikidis anggo tä ax. Sägodung anggo tagä buguninginy na tagä turuginy xa anggo kämeneng ngakang. ¹³ Ndä xongondeneni layis akäsog tanggo ndey läpeng ngakang.

¹⁴ Ndakä gäredeng 'doga noccang legedeng tagä buguninginy ndey ka mäxising nang. ¹⁵ Xa agä anoco alägi anggo na turaydey tä 'doga noccang legedeng ndey ndakä menggä kurugo mo'du anggo.

¹⁶ "Menggägo na enggä bonggo, na wayakägo na biskodagägo 'docco menedes anggo de sogo kulung acänggägo säpaxe.

¹⁷ Na mändey kân kä'day 'docco saxe anggo xa anggo kämeneng ngakang. ¹⁸ Neng tä ngakong kä'day, 'doga zegeledäng rongiccägondäng song. ¹⁹ Ndä

mäganygä padätägkägo tä ngakang sogo anggo liliccing ur'dug."

Ursalim Wanyiswa

²⁰ "Neng xonga kënoxang Ursalim kagukuriwa na asägaruwang, ndey kala bäleng ka wanyiske kawuno käsac. ²¹ Ndä kënggi tä cabärä Yaxudiyang basa oyasa tä zänggä cabärta. Mändey kënggi tä kaxsä Ursalimang, wulageccä ndä kënggi tunyang ndakä läsa, ²² xa sa sänggi Kaläg cäläxti menggä Ursalim tängang, nyang ndey ngaki gärekärejesänong 'desesäning.

²³ "Ndä tänya xondi kawungang woyoy tä uxugi kä'dosuning na 'deyecce! Xa todi kän zäyazäyangedäning täzäg na bälde xuxubtäg. ²⁴ Sädelgetese ta asänggä menggä salu na menäs sa cäläxiny tä warä kän. Känggi näs Yaxudiny songang 'docco paxatasa Ursalim na teretereje basa xongondäsa 'desedeswa."

Wunakä Pächä Käxa Jul

²⁵ "Ow kawungang, noxadang bolu tä xong tä asämex na tä nyinyiwes ndä kän kä'day täzäg wiyazeccä na käre ngakä xuduxudigä colonggo na dampajeygä ma. ²⁶ Nyigatäg mene kän togada tä woldoxey tä 'dogi sägox wunodung tä walangiccang, xa panggudugki tiyating kala gi'dikidäning seley.

²⁷ "Na kala kän oxo agä, Pächä Käxa Jul ampagacca tä däminggaru na panggudug na tädäxtic. ²⁸ Neng wegkong kasogunongang, ngusosäning bolosuning na mäganygä padätäg xa kala 'dakiccägo kacecce'deyze ngäte."

Seredäniccä Etä 'Dami

²⁹ Yasuwa kaser nga täsa ka, "Lala etä 'dami na kulung ewegong bägäliccakang. ³⁰ Känoxang wungga lilixiccing, na bälédeng ka kala wiwilis ngäte. ³¹ Mändey kënoxang ngakong sogo-duningang kala bälü ka bugundugku Kaläg kasex-tesäng. ³² Aläpedäng zänggä nga tanggo ka menggä zong äxseccä song basa ngakong soguno. ³³ Zäkoxa na täzäg 'desetäsäno yä legeygang wayeccä song.

Nycicci Palecci

³⁴ "Mesekädäning ndey acaka mäganygägo pägäni ndaldänang tä tawustäg na tä wuxid de bux paxe anggo, na kärekä ngakä aygägo ndä acaka sanydä ow wung ndä kurumusa anggo kala kadäbäx. ³⁵ Xa nya xongondi wunodung karamedäng kënggong kä'day täzäggang. ³⁶ Wadi layesi këngga cuccu cagiying na palecci ndey layang mpädägänyang ndey mäsäsing ngaki kä'day wunosung sagoduningang ndey ndokalang tagang agä, Pächä Käxa Jul."

³⁷ Todotol Yasuwa bäldecce tä kaxsä kaldagä axä tämed tä Kaläg ndä ongutang mä'do mäccu tä Cabärä Zayitun. ³⁸ Ndä kän kä'day loxto ow wunotäsäno täma tä kaxsä kaldä axä tämed tä Kaläg tä dänggä bäldeccäma.

22

Yaxusa Kaläpe ta Buguninginygä Yaxudiny ka Mämenede Yasuwa Täsa

¹ Xongondi Tanyaranä Raxifta Säwacce Song, ani säbangäs Pärkitang, kawung käsac. ² Na bazuwinygä menggä tämed tä Kaläg na menggä lelericcä asiriyenä Musa nyame rakawza ndey ka paxäs Yasuwa ndä sänyigate kän neng säpaye säpax ma na raj.

³ Na Däniye kadel tä wang nuxu accä känggämagi mägäligä asiny wang pädaxang, ani säbangäs Yaxusa Iskariyuti.

⁴ Mägä'doc mabodsa na bazuwinygä tämed na ngo-torpugi meske axä tämed tä Kaläggang ndey ka mämenede Yasuwa täsa. ⁵ Na wadäggäsa kalaye tidiny sagixi ka sädogada ariyaliny täma. ⁶ Na kala sägaxsä ngakäsa na ma. Na ma Yaxusa mägä'doc mänyame rakaw ndey mämenenäs Yasuwa täsa tä owda xä'dä wundung täng.

Deleygä Pärkid

⁷ Kala xongondi Tanyaranä Raxifta Säwacce

Songang kawung ndey ka Säpärkisi na sädämze na päxä dopolog. ⁸ Na kala Yasuwa kayaxsa Putros na Yoxana, läpede täsa ka, “Wesi ndele Pärkid ndey wunig siysig täng.”

⁹ Na sängadeccä täma ka, “Owda keyang mpaye anoc-cig andeleyig tängang?”

¹⁰ Na mabuc täsa ka, “Ndänge, känoxang käläsang kaxsä pang 'doxadang apangandäng poko pete päse ma. 'Dorkäda ma tä pani mä'doc mäläsang, ¹¹ na lapi tä ledä pa ka, ‘Me bäldeic kayaxsä was tägi ka wa amänig gi ka axä palangaski mäwunodung Säpärkicci täng na menggä räbkäma na säsiyzang nyandi?’

¹² Mä'do mäläpedäng apanggä axandäng tiyati na ka'dika'dinä kaxse, wesi ndele wexekägo tadi.”

¹³ Na kala sägä'docco sa'doxa sangaki Yasuwa kaläpe täsang, na sägädeley Pärkid täng.

Siyaki Yasuwa Kasiy na Menggä Räkke ndey Niminäs Mang

¹⁴ Kala sanä Pärkid kawung, Na Yasuwa kä'doc kagur siyad na känggi mägäligäng. ¹⁵ Na mängade täsa ka, “Wanang tidi xa kalängädi tä siyakä siyakä Pärkidkong nanggo xa kala sä'docco säcäläxti agä tä bange. ¹⁶ Ndä aläpedäng tanggo ka agä asiye Pärkid nanggo mändey song basa ngaki

Kaläg kayaxsäng agä tängang 'desesäning layis wega tä bugundugku Kaläg.”

¹⁷ Na mabag päxä kobox päse malog Kaläg mängade ka, “Mene dugi na'anggägo.

¹⁸ Aläpedäng tanggo ka xongondong sanydangang tä wuxikä magä adilu basa bugundugku Kaläg wuno.”

¹⁹ Na mändey mabag raxif malog Kaläg ndä mäbeny mädogä täsa mängade ka, “Yanä wanangang kadogung tanggo. Zogada adinong mänang ndey nimidänang agä nang.” ²⁰ Kala sasiyza na mabag päxä kobox, mängade ka, “Päxä koboxsä tamiccanggong coladaswa tanggong, nyang layis axäska warändi tanggo na Kalägang.”*

Paränakä Mäganygäwan Tunyu

²¹ Yasuwa ngade täsa ka, “Lala, käxi 'doc menedes agäng andenenang nagä tä tumunu siyad ganang.

²² Agä, Päxä Käxa Jul a'docco anäxse kala ngaki Kaläg kabogkasang ndä woyoy ta apangzi menedes agäng!” ²³ Na todi sadelese tä mänekä ngastänggäsa ka xänang seley 'docco sogo ngakongang.

²⁴ Na sawaläte ka xänang tä waräsa ngake tädäxiny mo'do acängganang. ²⁵ Na kala Yasuwa ngade täsa

ka, “Buguninginy na ngo-torpugu känggi näs Yax-udiny songang cäläxti kän ndä dalacca ka apoccu.

²⁶ Ndä anggo kändäppang ka layang ka'das sa song, wadi käxi tä warägo ngake tädäxiny kamo'du acängganang, bokasa ngase täzäg na ngotorpo lay kala me wexed. ²⁷ Xänang ngake tädäxiny mo'do accanang, käxi kacca bene siyatang, wala käxi wexe siyatang? Wadi käxi kacca bene siyatang kädäppa ka nyaza ngake tädäxinyang. Neng agänang tä warägo ka'das käxi wexecceng.

²⁸ “Anggog tol kändokalang nagä tä läbang. ²⁹ Nenyang agä adogodung butug tanggo ka'das togunakenegi appanang kadogunäs tagäng, ³⁰ ndey guring siyad tä owdu bugundugkang ndä nycatetäsänang tä komzu bugundug menedeng caxsänggä Israyilinygi asiny wang pädaxang.”

³¹ Na Yasuwa ngade ta Saman Putros ka, “Saman, Saman, dänge! Däniye käpaydä ka läbä anggo na'anggägo ndä Kaläg kä'daka, ndä Däniye 'do pede anggo kala pedeki me pelow pededenäs nyadanä gärwec täpoxang. ³² Neng agä kapaleyza tägi Saman, xa ndakä menekä ngakägi tagä 'dexäning. Xongonda kämeley mägaxsäging, pädäti enggä bonggugo.”

* **22:20** Axäsiki layis kākä boxinyganang sag kän tämecce na oxayda ndey ka cay ngaka tasiny tängang.

³³ Neng Putros ngade täma ka, “Bazuwec, kax ka wi, na agä ano nagi tä ax na tä xäs!” ³⁴ Na Yasuwa kämeley täma ka, “Putros dänge, ndey ka tä kesekä ow mod-olong logo, gi n'do gäli agä taxä kodos ka 'di agä.”

³⁵ Na Yasuwa ngade täsa ka, “Ani kayaxsanäs anggo tä wexed ndä aläpänäs tanggo ka ndakä bagang ariyaliny mange nanggo na meldänä wedäg na 'dataginy axinyga pädaxang, päx nuxu 'dogkandäng kä'disä tanggo?” Sabuc ka, “A'a, päx 'doga kä'disändäng song.” ³⁶ Na mängade täsa ka, “Neng gang käxa tanggo ndarudigä ariyaliny tängang bag na mändey bag meldänä wedäg. Ndä käxa saläne täng songang, nganya tandäne, nganyäs salä. ³⁷ Aläpedäng tanggo ka ngaki menggä logey gärekärejesa tä ngakan-gang, basa 'desesuno. 'Ndä kän bangäs agä märing.' Xa ngaki menggä logey gärekärejesa ka soguno tagäng kala sogoduno.” ³⁸ Na menggä räbkäma ngadeccä täma ka, “Za, Bazuwec, saluwakang todong pädax.” Na Yasuwa läpede täsa ka, “Mangeccä.”

Yasuwa Kapaleyza tä Cabärä Zayitun

³⁹ Yasuwa kawetä ka'das ani todotolang kä'doc tä Cabärä Zayitun, na menggä räbkäma kabag bangäma. ⁴⁰ Säjäcogu ow

na mäläpede tä menggä räbkäma ka, “Palecci ndey Däniye käläbä anggong degeng.”

⁴¹ Na masexte mägä'doc mägädukurusa mäpalacca ka, ⁴² “Appa, känox gixisang, ampaye gi xony agä tä akäsogu cäläxtigong awed-edes tängang. Yä näs giza kämpaydäs agäng, wanga soguning na ngakägi xa na ngakang song.” ⁴³ Na malayika käpätäng tiyati käpädäti ma. ⁴⁴ Tä zänggä paleygämagi mäpalacca na zä'diriy na mapaleyäcca paccey seley dexä mod-iccäma täläbe täzäg ka'das tamic.

⁴⁵ Ani mangäsanäs tä paliccang mägämele ta menggä räbkäma ma'doxas sa sapägini tä kuniy de sasändäcco. ⁴⁶ Na mängade täsa ka, “Oxadi sängadangang? Ngäsosuning! Palezi ndey Däniye käläbä anggong degeng!”

Menekä Yasuwa

⁴⁷ Ani musku mälegeccenäs täsang, nuxu me räbkämani säbängäs Yaxusang kaleza koyo xä'dä na kä'doc kawu'dakas Yasuwa käbuciy. ⁴⁸ Neng Yasuwa ngade täma ka, “Yaxusa, gi gang menedes agä, Päxa Käxa Jul na bucigong?”

⁴⁹ Kulung menggä räbkä Yasuwagi nangang kox 'dogi paye sogkuwang, na ngadeccä ka, “Bazuwec, mpaye was wa ampogig nycokong na salugusko?”

⁵⁰ Na nuxu me räbkäma kajede wundä abaniccä cäläxsä ngotorponu axä tämed tä Kaläg täpox.
⁵¹ Neng Yasuwa ngade ta menggä räbke ka, “Ndokolosi mänang!” Na Yasuwa käläbä wundä cäläx kämele täng na kalay apo.

⁵² Na Yasuwa ngade ta bazuwinygä axä tämed tä Kaläg na ngotorpugu megäskä axä tämed na ngondowinygä Yaxudinygi kawuno tä menekä mang ka, “Anggo käsagang tagä na salu na gany dexä ka'das ka agä anäs märing?”
⁵³ Agä kanycu nanggo tä kaxsä kaldä axä tämed todotol ndä päx tä nuxung kämeneng agä song. Neng ongudong xongondugong na xongondu butugku lätäg!”

Putros Kagil Yasuwa

⁵⁴ Kala samen Yasuwa samagas tagäsa sagoyas tä pang ngotorponu axä tämed tä Kaläg. Yä Putros räbto sa ndä lewa täxandäxang.
⁵⁵ Kulung kän kadox mas tä pidinä kaxsä kal pagedäning na Putros kä'doc kaccä tä waräsa pagewa.
⁵⁶ Na päxä uxandäng näs me wexed kox ma tä banyiccä mas na kajenggerey ma ngade ka, “Apangzong nyang na Yasuwa seley!”
⁵⁷ Neng Putros kagil ngade ka, “Ama kuxong, ayex ma säxong!”

⁵⁸ Sax mändey tä bälaxtäg, nuxu accäsandäng kox ma na ngade täma ka, “Gining mändey näs nuxu me räbkä Yasuwa.” Neng

Putros ngade ka, “Amo, agänang song!”

⁵⁹ Sägäcudisi mäna'ang na nuxu kig kalewa ka, “Kax ka wi, na 'doxton-gang na Yasuwa, xa ma mändey mäs me Calil.”
⁶⁰ Neng Putros kämeley täma ka, “Amo, ayex 'dogani legeng song!” Na tänya owdi musku tä zänggä legeygäma, modolong kalog.

⁶¹ Na kala Yasuwa Bazuwec kawexeswa kalala Putros käteg na Putros kagäräng ngaki Bazuwec kalogey tämang, ka, “Ndey ka tä kesekä ow modolong logo, gi n'do gäli agä taxä kodos.”

⁶² Na Putros koya tunyu kangey paccey.

⁶³ Na kala apangaski kamen Yasuwang kadeb ngobku Yasuwa ndä bade.

⁶⁴ Sägaxsä agäma ndä sämäne ma tetedetex ka, “Logeyzi! Xänang kadä ging?”
⁶⁵ Na mändey sägäcemdä ma.

Sagoya Yasuwa tagä Ngotorpugä Yaxudiny

⁶⁶ Ani ow kagezänäsang, bazuwinygä axä tämed tä Kaläg na menggä lelericcä asiriyenä Musa kudurisuno. Apangaski kamen Yasuwang kagoying ma ta ngotorpugä Yaxudiny.
⁶⁷ Sängadeccä täma ka, “Känox näs Al-masiyang, läpäng täwas.” Neng Yasuwa ngade täsa ka, “Kax aläpäng tanggo, na gix-iding song,
⁶⁸ ndä kax amän anggo na bucing song.
⁶⁹ Neng bäli ka xongondong na tä bange kä'day, agä Päxä

Käxa Jul, anoco anycata tä andä abaniccä Kalägi panggudug tängang.”⁷⁰ Na kala na'anggäsa sängadeccä täma ka, “Neng giningang näs päxä Kaläggang?” Na mabuc täsa ka, “Axe-neng, anggo ngadaccang ka agäng.”⁷¹ Na sängadeccä ka, “Käxa mändey payedig ndey ka mänigkandäng song. Xa kog kädängig na wunggog tä ikäma!”

23

Samenes Yasuwa ta Pälatis

¹ Ngotorpugä Yaxudiny kangusosuno kagoya Yasuwa ta Pälatis. ² Sagäli täma ka, “Wa kamenig 'doxtong woko kän ka sog pogud na ka wang yawgä tuluba ta Kaysar na mägasada tä ngasäma ka ma mäsa Almasi buguning.”

³ Na Pälatis kamän Yasuwa ka, “Giningang näs buguningzä Yaxudinyang?” Na Yasuwa kämeley täma ka, “Axe-neng, gi kangad mänang.”

⁴ Na Pälatis ngade ta bazuwinygä axä tämed tä Kaläg na xä'dä ka, “Ka'dox 'doga tasta de ka giling nga nang tä 'doxtong song.”

⁵ Neng saleyning sängadeccä ka, “Ma mabälde kän mäwoko bägälic tä kaxsä Yaxudiya. Madeb tä Calil ndä mäccogu owdong nang!”

⁶ Ani Pälatis kädängäs ngakiyang, kamänze ka cong Yasuwa näs me

Calilang. ⁷ Pälatis kabäle ka Yasuwa kápätäng Calil ndä Xirudusang näs bazuweccä Calilang, na mayaxsas Yasuwa ta Xirudus xa nya xongongi Xirudusandäng tä Ursalim.

⁸ Ani Xirudus koxus Yasuwang wanäma kalay tidi paccey xa mandäng mäbenecce ka mäpaye mox Yasuwa, xa mägädängdä sälege ngakä Yasuwa ndä mäpaye ka mox boliccä were wexeki Yasuwa wex-eng. ⁹ Xirudus kamändä Yasuwa nano. Neng Yasuwa kabuc täma song. ¹⁰ Ndä bazuwinygä axä tämed tä Kaläg na menggä lelericcä asiriyenä Musa satäng tänya owdi dokoloccu, kaleyning kilidi nga täma. ¹¹ Na todi Xirudus na asägarugu megäske kängobtu Yasuwa ndä lagä ma na tandugu butug ndä meles ma ta Pälatis. ¹² Na tänya xongondi Xirudus na Pälatis kalayenäs aminu xa kalaygädä säs menggä kur.

Sagoyas Yasuwa tagä Xä'dä

¹³ Pälatis kabandä bazuwinygä axä tämed tä Kaläg na ngotorpugä Yaxudiny na kän, ¹⁴ mäläpede täsa ka, “Anggo goynang 'doxtong tagä ka wanyis kän. Ndä kamändä ma tagägo ndä 'doga ka'dox täma tasandäng näs 'dogi anggo giling täma ka mäso gondäng song. ¹⁵ Ndä wala Xirudus ka'dox nuxu 'doga tas täma,

nenyang mägämeleyäng ma tägogkang. Za, ma masog 'doga de ka säpaxe ma täng song. ¹⁶⁻¹⁷ Gang adogadas ma säbade ma na ke'diccä oxay ndä kala a'dakas ma."

¹⁸ Neng sägädawasa na'anggäsa ka, "Baga 'dox-tong paxa! Yä 'daki Parapas täwas!" ¹⁹ Parapas apangza sägäräki tä axang xa kageley ngase pogo turugsä Ru-mandi kamen Ursalimang ndä kapaxsa. ²⁰ Pälatis kalegeyze täsa mändey tä ngakä Yasuwa xa mäpaye mä'dakas Yasuwa. ²¹ Neng saleyning sädaweccä ka, "Nggadi ma tä kalic, nggadi ma tä kalic!" ²² Pälatis käläsä taxä kodeseneni ngade täsa ka, "Xanya? Oxadi masog tasang? Agä ka'dox 'doga ma masog tas kädäppa ka apax ma täng song. Agänang adogadas ma säbade ma na ke'diccä oxay winy ndä a'dakas ma." ²³ Neng musku saleyno na daw ka sägadas ma tä kalic. Na mägädänge täsa. ²⁴ Kala Pälatis kagixi 'dogi säpayeng na kä'dakas Yasuwa ka säpax. ²⁵ Na mägä'daka 'doxti säbangäs Parapas sägäräki tä ax xa kageley ngase pogo turug na kapaxsang yä macananga madoga Yasuwa ka säpax xa kän paye mänang.

Gadeygä Yasuwa tä Kalic

²⁶ Ani sabokunäs Yasuwa tunyang, sägäpasasa na Samandi näs me Sayrunang. Kăpätäng tä xining ka läso Ursalim na sägänagey

sägäpoka kalic tä ngase ka 'dorkädä bangä Yasuwa nang. ²⁷ Na kän kawuno mange kabag bangäsa, ndä tä warä sa känggi uxuwatäng kunuccu na ngeccä tä ngakä Yasuwa.

²⁸ Neng Yasuwa gaw ze läpede täsa ka, "Anggo uxugu Ursalim, wanga ngeyig tä ngakang, wadi ngeyi tä ngakä ngastänggägo na tä enggenggägo. ²⁹ Xa ngakong ngaletäsäno, seley owda tasandäng wunodung ndä kän 'docco ngadeccä ka, 'Baxändäg ta pixu na kuxtugi taxä nuxu kăpoku pipi songang na ki'digi kă'deyze songang!" ³⁰ Ndä nya owda tasti kawungang, kän 'docco ngadeccä tä cabărta ka, 'Delesäning tä zänggäsko!' na tä cobo-coboriny ka, 'Măxosuning nawas täzäg!" ³¹ Gang kän kasog ngakong tä eta musku tuduwinyang, oxadi sogowa tä eta kamasäng?"

³² Kulung märinginyatäng pädax sabokung tunyu ndey ka sä'doc säpax na Yasuwa. ³³ Ani sägäcogus owdi säpaxe kän täng säbangäs "owdu zänggä kängga kăxseng", sägä'docco sägadas ma ta kalic na mändey märinginygi sägadas tä käna. Nuxu ta cengiccä abaniccäma na nuxu tä cengiccä nyo-goldäma. ³⁴ Neng Yasuwa ngade ka, "Appa, wangi täsa xa säyex ngakong säsogong song." Na sa asägarugi gadas Yasuwa

tä kaliccang sägä'docco
sägäcasäng sawany atapyu
ndey sälartäs tandugu
Yasuwa.

35 Kän kädokolo lale ma,
na mändeng ngotorpugä
Yaxudiny kädegejeydä ma
ngadeccä täma ka, "Ma
maxonydä kän. Wanga ma
mäxony ngasäma ka cong
mäś Almasinä Kaläggang,
ani Kaläg kayaxsäng nuxu-
ngang!" 36 Mändey asägaru
kängobtä ma ndä 'docco
toga buxka kawace täma
ka mäwux 37 ndä ngadeccä
täma ka, "Yex ngasägi
ka näs buguningzä Yax-
udinyang, xonya ngasägi!"
38 Badaxiccandäng sägäreka
rejeze täng tä owdu zäma ngade
ka, "Buguningzä Yax-
udinyanang."

39 Nuxung märingzi
sägadasa tä cengiccämang
kalegeyze täma näs langad
ngade ka, "Gi näs Almasi
song? Ata xony ngasägi
na xony was!" 40 Neng
märingzi nuxungang kadux
nya accanani ngade ka, "Gi
nyigate Kaläg song? Noxo
kogkakang na'anggog tä
zänggä xäs. 41 Tä ngakog
tireneng xa kog käsogig
ngaka siye kog, yä 'doxtong
kasog nuxung 'doga tas
song." 42 Na mawetäde
na legey mängade ka,
"Yasuwa, känox känoc tä
butugkucing wanga agägi
wayesäng tagä." 43 Na
Yasuwa ngade täma ka,
"Aläpedäng zänggä nga
tägi, xongondong agänang

nagi 'doccig tä Pang Kaläg
tiyati."

44 Ani xong kawunäs tä
piding, ow kälämaswa täng
bägälic kasog sada kodos,
45 xa xong kadärändä. Na
tandänä akäsogaldä axä
tämed tä Kaläg kacereswa tä
pidi kälaräswa pädax. 46 Na
kala Yasuwa, kabandäsa
paccey ka, "Appa, agä
ka'daka ligidang tä andägi
kala!" Ani mangadäs
ngakiyang na mägänungis
sanydä nunggäma.

47 Ngotorponu asägarugu
Roman kox 'dogi ka-
sogkuwang, na kädädäxti
Kaläg ngade ka, "Pezängga
'doxtong käxa lelexang!"
48 Na kala xä'däni dokoloccu
kox 'dogi kasogkuwang,
kämele tä pa na zängay.
49 Na känggi kä'day yex Ya-
suwang kädokolo täxande
na uxugi käräbkädä bangä
Yasuwa cawu Calilang kox
'dogi kasogkuwang.

Bosku Yasuwa

50 Apangandäng säbangäs
Yusif nuxung ngotorponu
Yaxudinyang, ndä käxa
lelexang. 51 Ndä ma mäpaye
'dogi nycoki kawex ta
Yasuwang song. Ma mäś me
bo pana säbangäs Armataya
tä cabärä Yaxudiya ndä
mäbene bugundugku Kaläg.

52 Yusif kä'doc ta Pälatis
ka toga wanä Yasuwa täma.
53 Na Pälatis kagixi kadogas
ma ka mä'doc mäcoccoley
wanä Yasuwa. Na kala
mamulungi na darnase
mägä'doc mägälola taxä
morogsa sadotogey tä ngayic

ndä kax taxä nuxung sabosu kig täng song. ⁵⁴ Ndä nya xongondeneni xongondu deleygä wexetang xa xongondu Sapid ngäte.

⁵⁵ Uxugi kabag bangä Yasuwa cawu Calilang, kä'docco tä bangä Yusuf käsay morog na bokosänaki sabokasanäs wanä Yasuwang. ⁵⁶ Na sägämele tä pa sägä'docco sägädeley may na midä mäsäs. Na sägänunducco tä xongondu Sapid xa asiriye Musa kangad mänang.

24

Ngäsakä Yasuwa tä Xäs

¹ Xongondi tä bangä xongondu Sapidang, tä kesekä ow uxuwatäng kä'docco tä copku morog koyo mäsäsi sägädeleyang. ² Säga'docco sa'doxa kädandafi gärenggärengeswa tä cengic, ³ ani sägä'docconäs saläsäs axä morogkang, sa'doxa wanä Bazuwec Yasuwa wundung taxä morog.

⁴ Na sägädongasa sägäre ngakä 'dogi kasogkuwang, na tetex apanginy pädax kawayesäno kälägä tanduga dulatulajecä kädokolo tä wadäkäsa. ⁵ Na nyigatäg kadeles sa uxugi de kädukurusuno täzäg neng sa apanginygi pädaxang ngadeccä täsa ka, "Oxadi siye anggo nyamadang käxa oxacca tä warä kangga käxseng?" ⁶ Mandäng todong song, mabägäng tä xäs! Nimäning ngaki

maläpäng tanggo tä cukuma tä Calilang, ⁷ aki ka Pächä Käxa Jul basa sä'docco sämenes tä asänggä kangga tasiny ndey gadas ma tä kalic, na tä sängädi sogo kodoseneng, mängäsata tä xäs."

⁸ Na sa uxugi sagäräng legeygi Yasuwa kalegey täsang, ⁹ na sägämele na morog säga'docco saläpe ngaki kä'day kasogunong ta kanggi Yasuwa käligä asiny wang nuxungang na tä kulung kanggi tängang. ¹⁰ Sa uxugi kox ngakiyang Mariyom Macidalinang na Xana na Mariyom bo Yaxupag na kulung uxugi nasang sag kaläpe ngaki tä kanggi Yasuwa käligäng. ¹¹ Neng ngaki uxugi kácopu morog kaläpe täsang samen song xa sälaleyis degejey winy.

¹² Na Putros kangäsa koy kä'doc kälim morog ka'doxa darnaseni samulungis Yasuwang winy. Na mägämel tä pa mägäbabangwa tä ngaki kasogunong.

Yasuwa Kaparaswa tä Menggä Räkbe Pädax

¹³ Tänya xongondi menggä räbkä Yasuwagi pädaxang wedetese tä päxä cabära säbangäs Imawus, ndä kä'dalangaswa bate sada pädax na Ursalim. ¹⁴ Ndä sälege ngakä wegki kä'day kasoguning ta Yasuwang. ¹⁵ Na tä zänggä legeygäsagi, Yasuwa kacubugiswa täsa wedeccä nasa ¹⁶ neng agäsa

kamägäning sabäles ma song.

¹⁷ Na Yasuwa kangada täsa ka, "Legeygiatayang legedeng ndä wedetesengang?" Na käkäräb sägädokalasa sägänyonyey agäsa.

¹⁸ Na nuxung accäsani age ka Kiloppasang kabuc täma ka, "Giningang watäkägi näs palangasic tä Ursalim tä enggä sänggongang dexä 'di ngaki kasogunong?" ¹⁹ Na mängade täsa ka, "Ngaka keyag?"

Na sabuc täma ka, "Dogi kasogkuwa ta Yasuwa me Nasrang. 'Doxteneni Kaläg kadoga panggudug täng na wexed na legey kasog kabälesäwa ka me logeygä Kaläggkang kayaxsäng tä kän kä'day, ²⁰ ndä bazuwinygä axä tämed tä Kaläg na ngotorpugusko kamenes ma sägadas ma tä kalic ndä säpax ma. ²¹ Yä was wakabokosunig ka mang mäsa Almasini kawung ndey ka xony Israyilang. Ndä ganang seley ngakong kala satäng säng pädax ndä kodosenang. ²² Ndä mändey kulung uxugi tä waräskong kabal mäganangusko ow tudizong xa saloxtu ow sägä'docco tä morog. ²³ Sägä'docco sa'doxa ngaccä wanäma song na sawuno saläpäng täwas ka sägox malayikada läpede täsa ka moxacca. ²⁴ Ndä kulung känggi nawasang kä'docco tä morog ka'doxa

sangaki saläpäng täwasang kalayenäs wega ndä sägox ma song."

²⁵ Na Yasuwa ngade täsa ka, "Ama kängga kamanande, oxadi mägananggä päpäxiny tä menekä ngakä menggä logeygi kalegeyze tanggong!" ²⁶ Anggo käläleng ka basa Almasi cäläxtiwa ndey sädädäxti song?" ²⁷ Na madeb geneygä ngakä me logey Musa na menggä logeygi kä'dayang, mägene kä'day ngaki gärekärejesäno tä ngakä ngasäma tä kaxsä Sorunu Kaläggkang.

²⁸ Ani sawunonäs käsac tä wang päxä cabarang, Yasuwa kasoguswa käxa paye warä päxä cabär, ²⁹ neng sapappaledä ma ka mä'doc mälay nasa xa ow kamo'dsa. Na kala mägä'doc nasa.

³⁰ Ani magurus siyad nasang, mabag raxif, malog Kaläg ndä mäbeny, ndä mälarä täsa. ³¹ Na todi agäsa kalengesäning, na sajenggerey ma sabäles ma. Na käkäräb mägä'duywa täsa. ³² Na sängadeccä tä ngastänggäsa ka, "Yä päx mägananggog kalaye tidiny tä ngaki kä'dang mägene tägog tä akäsog näs kälä Sorunu Kaläggkang song?"

³³ Na tänya owdi sägämelese tä Ursalim. Sägä'docco sa'doxas känggämagi mägaligä asiny wang nuxungang na kulung känggi todiyang kudurisuno ³⁴ na sa känggi sa'doxa kädurisunong läpede täsa

ka, “Nästire Bazuwec kangäsa tä xäs, de ma-paraswa ta Saman Putros!”
³⁵ Na sagi pädaxang mändey sadedebeyle ngaki kaso-guno täsa tä akäsogkang, na benyeki mabenysis raxif de sabälenäs mang.

Yasuwa Kaparaswa tä Menggä Räbke

³⁶ Ani menggä räbkä Yasuwa legeyis ngakämang, ma Yasuwa täzäma magaya-sawa tä waräsa mängade täsa ka, “Amodo anggo.”

³⁷ Neng sägox ma na mäganygäsa kabal sa na nyigatäg kamen sa soxo ka sägox arälodic.

³⁸ Na mängade täsa ka, “Oxadi siye anggo nyägadänyang na basadang mäganygägong?”
³⁹ Lala asänggang na badagä exenggang, agänangang! Läbe wanang na lala, arälodic yandäng tä wane na ngay song yä lalang agä gang anggo noxadang ngayakang tä wanang na ya.”
⁴⁰ Ani malegeyis legegonggang, madoga badadagä exenggäma na asänggäma ka säzay.

⁴¹ Ndä musku säcukuludäning samen ngaki mangatang song xa wadäkäsa tidiny tä oxakäma de sägädongo. Na mamän sa ka, “'Doga siyewa tanggo todongandäng päx?”

⁴² Na tetex sabag axsicca kábux sadoga täma
⁴³ na mabag masiy tagäsa tänya owdi.

⁴⁴ Na mängade tä menggä räbke ka, “Ngakanggongag

kaläpäng tanggo ani musku cuccusig nanggong, ka ngaki kä'day gärekärejesäno tä ngakang tä asiriyenä Musa na tä sorunu menggä logey na tä Sorunu Masmurang ka bal päsesäwa.”

⁴⁵ Na malenge zänggäsa ndey ka säbäle ngakä Sorunu Kaläg,
⁴⁶ ndä mängade täsa ka, “Sägädokoley gärekärejey tä Sorunu Kaläg ka Almasi bal cäläxtiwa ndä äxsä ndä ngäsa tä xäs tä sängädi kodosang.”
⁴⁷ Sädebe duwaleygä agä Almasi tä Ursalim na tä cabärta kä'day. Säduwale nga tä kän ka xajkä mäganyga tä ngaka tasiny ndey Kaläg wanga ngaka tasiny täng.
⁴⁸ Ndä anggo käzayang ngakong nagägo seley ndey läpeng tä kulung kän.
⁴⁹ Ndä gang lala, agä ayaxsedäng 'dogi Appanang kangad ngakeneng. Neng nycicci tä Ursalim basa Kaläg yaxsäng panggudug tanggo.”

'Dockä Yasuwa Tiyati tä Pang Kaläg

⁵⁰ Na Yasuwa kabag menggä räbke kä'docco nang tä owda säbängäs Petani, na mayuxi asänggäma tiyati mapes sa.
⁵¹ Ani mäpesecenäsang, Kaläg kabag ma tä pane tiyati.

⁵² Na kala sägädukurusuno sägädädäxti ma. Na kala sägämelese tä Ursalim na led,
⁵³ na todotol sädädäxti Kaläg tä axä tämed tä Kaläg.